

Leidse charters van de Pieterskerk betreffende Zoeterwoude en Stompwijk.

bewerkt door

Anthonius van der Tuijn

Inventaris 0502-30

Regest 385 d.d. 21-03-1492.

Wij Aernt Jans zoon ende Bruijninck Spruijt scepenen in Leijden oirkonden dat voir ons quamen die procuratoirs van sinte Crispijn ende sinte Crispiaens broederscip datmen hout in sinte Pieters kerck tot Leijden, alsoe Jacob Dircxz., Jan van Deventer, Jan van der Morssch ende Volkert Jacobsz. ende gelieden dat sij voir hem ende horen nacomelingen van des voirsz. broederscip wege vercoft hebben Jan van Lochorst, sulke renten mitten houde als hier nae bescreven staen. Item twintich comans groot siaers mitten houde, staende op Heijnrick Heijnricxz. hujs ende erve gelegen in Duijsent Raede stege. Ende heeft belegen an die een zijde Bien Jansz. ende an die ander zijde die graft die dair onder gaet, streckende voir wt die stege after an Gherijt Claisz. erve. Item noch twintich comans groot siaers mitten houde, staende op Bien Jansz. voirsz. hujs ende erve, gelegen in Duijsent Raede stege. Ende heeft belegen an die een zijde Heijnrick Heijnricxz. ende an die ander zijde Jacob Dircxz., streckende voir wt die stege after an Gherijt Claisz. erve. Ende die procuratoirs voirsz. geloveden voir hem ende voir den ghenen die namails procuratoirs wesen sullen van des voirsz. broederscip wegen Jan van Lochorst voirn. dese voirsz. renten mitten houde vrij te waren jair ende dach als recht is ende alsmen vrije renten mitten houde sculdich is te waren. Ende die procuratoirs voirsz. belieden hem hier of tot des voirsz. broederscip behoef van Jan van Lochorst voirn. wel voldaan ende betailt, den lesten pennijnck mitten eersten. In oirkonden desen brieve bezegelt mit onsen zegelen. Int jair ons heren duijsent vierhondert twee ende tnegentich opten een ende twintichsten dach in maerte.

Regest 397 d.d. 24-03-1494.

Ic Huce van Zwieten scout inden ambocht van Zoeterwoude doe condit allen luijden dat voir mij quam Ewout Jansz. ende geliede dat hij ververcoft heeft Jan van Lochorst ses rinsche gulden des tsaers ewige ende erflike renten, veertich comans groot voir den rinsche gulden gerekent. Ende te versien ende te verhalen aen acht ende twintich morgen lants die Ewout voirsz. leggende heeft inden ambocht van Zoeterwoude ende ander hujsinge ende potinge die upte voirsz. landen staen. Ende heeft belegen an die oestzijde Jan Jan Corstersz., an die weestzijde den Heijligen Geest tot Voirschoten, an dat noorteijnde Meerburger weteringe ende an dat zuijteijnde Stompicker wech. Ende dese voirsz. renten sellen alle jair verschijnen tot Voirschoten ende Valkenburger marcten. Ende den dach van betalinge sel alle jair wesen tot Beloken Paesschen of binnen viertien dagen dair na onbegrepen. Ende Ewout voirsz. gelovede Jan voirn. dese voirsz. renten vrij te waren jair ende dach alsoe recht is ende alsmen vrije renten up landen ende hujsinghe sculdich is te waren tot ewige dagen. Ende Ewout voirsz. en sel hem hier tegens niet verweren, noch doen verweren mit ghenen rechten, geestelijc ofte wairlic, noch mit ghenen nuwe vonden diemen hier inne ter contrarie soude mogen dencken, peijnsen, vinden of visieren, in enigerhande manieren. Des soe sijn voirwairden wairt sake dat up dese voirsz. landen meer stonden dan tien comans groten des tsaers die den heijligen geest tot Voirschoten nu ter tijt dair op heeft ende dese voirsz. renten, dat geloven Ewout Jansz., Jan Jansz. ende Heijnric Jans zoen gebroederen mit gesamender hant tot alre tijt of te doen ende Jan van Lochorst voirsz. te vrijen. Ende Ewout voirsz. gelovede Jan ende Heijnric sijn gebroederen voirn. hier of schadelois te houden. Voirt soe beliede hem Ewout voirsz. van desen coep wel voldaan ende betailt, den lesten pennijnck mitten eersten. Ende hier hebben bij, an ende over geweest als tugen Gerijt Meesz. ende Heijnric Jansz. In kennisse der wairheijt soe hebben ic Huce van Zwieten scout inden ambocht voirsz. desen brieve bezegelt mit mijnen zegel in tegenwoordicheijt der tugen voirn. hier an gehangen. Int jair ons heren duijsent vierhondert vier ende tnegentich upten vier ende twintichsten dach in mairte.

Regest 398 d.d. 18-07-1494.

Wij Dirck Dircxz. ende Jan Claisz. scepenen in Leijden oirkonden dat voir gerechte quam Jan van Lochorst ende gaf over die deputaten ende memorij meesteren der cappellanen ende vice cappellanen van sinte Pieters kerck tot Leijden alsoe meester Pieter Florijsz. ende heer Jan van den Broeck ende den ghenen die naemaels deputaten ende memorij meesteren wesen sullen totten gemeenen cappellanen ende vice cappellanen voirsz. behoef, twee brieven dair desen brief doirsteken is, mit recht ende mit vonnisse alsoe recht is. Ende scepenen wijsden die deputaten ende memorij meesteren voirsz. ende diet naemaels wesen sullen totten gemeenen cappellanen ende vice cappellanen voirsz. behoef, dair mede te winnen ende te verliesen in allen schijn oft Jan van Lochorst selver waer. Voor welcke renten inden principalen brieven begrepen, dair dese brieve doirsteken is,

die deputaten ende memorije meesteren die cappellanen ende vice cappellanen voirsz., iairlicx doen sullen sulck memorijen ende dair toe wtreycken sulck aelmissen, soe als den scepenen brief die zij Jan van Lochorst voorsz. dair van gegeven hebben, dat int lange inhoud ende wtwijst. In oirkonden desen brief bezegelt mit onsen zegelen. Int iair ons heeren duijsent vierhondert vier ende tnegentich opten seventiende julio.

Inventaris 0502-96

Regest 551 d.d. 16-11-1529.

Ick jonge Jacop Gheritsz. schoudt inden ambocht van Benthuijsen oirconde dat voir mij en voir twee ghetuijgen nae ghescreven ghecomen is Wouter Cornelisz., bekende ende ghelide sculdich te wesen die Deputaten ende Memorij meijsters van sinte Pieters kercke tho Leijden of den houder van desen brieve, drie rijns guldens des jaers an eewijghe ende eefflicke losrenten stuc veertich groot gherekent, jaerlicx verschijnende ende betalende binnen die octave van sinte Martijn inden winter, wairvan die eerste der betalinge sal sijn in die octave van sinte Martijn alsmen saijst vijftien hondert ende dertich ende also voirt. Ende dese voirsz. renten heeft Wouter Cornelisz. voirn. gheset ende versekert op drie morghen landts, luttel min of meer. Te weten een morgen inden ban van Bentuijsen legghende int Langhe landt ende hebben beleggen an die west sijde Martijn Oetsiersz., an die oost sijde Huijch Heijnricxz., strekende van dat Cruisvairtgen of zuijtwert tot Claes Aert Rolandt toe. Ende die ander twee morgen leggende inden Vrijen Oock ende hebben beleggen an die noortsijde ende ant westeijnde Pouwels Adriaensz., an die zuijtsijde Jacop Gielisz., ant oosteijnde dat Oockwechghen. Ende die voirsz. landen niet te verarghen maer te verbeteren na die reeden. Ende oick mede dese voirsz. rente te voirsien ende te verhalen an alle alsulck guet ende have alsmen op dese voirsz. landen bevinden sal moghen ende an alle Wouter Cornelisz. ander gueden ofte zijne erven, roerende ende onroerende, wonnen ende onghewonnen, gheen gueden vuytghesondert wairse ghelegen ende bevonden worden. Ende wairt bij so dat den houder van desen brieve eenige oncosten hadde ende dede om dese voirsz. renten mit recht in te winnen, die oncosten sal den besitter des voirsz. landes ghehouden wesen op te legghen ende te betalen, also wel als die principael renten voirsz. is. Ende tot meerder vasticheijt ende sekerheijt soe ordonnere ende sette ick Allart Ghijsbrechtsz. wonende in Gelderssou tot causije ende tot borge alle mijne gueden, roerende ende onroerende gheen gueden vuytghesondert, wairse ghelegen ende bevonden mogen worden, dese renten an te versien ende te verhalen etc. In ghebreken vande betalinge, so sal den houder van desen brieve hem voirsien ende verhalen an Wouter Cornelisz. gueden voirsz. ofte an Allart Ghijsbrechtsz. gueden wairt hem believen sal. Ende dat na reale ende heerlixse executie. Ende wij Wouter Cornelisz. ende Allart Ghijsbrechtsz. voirn gheloven voir ons onse erven ende nacomelingen hier tegens niet te verweren noch doen verweren mit gheener manieren van recht tsij sijn geestelic ofte wairlic noch mit gheenen hoofts rechten ofte ander loose vonden diemen contrarie desen brief soude connen dencken of versieren. Alle dinck sonder begrip ende arg. Wel verstaende dat Wouter Cornelisz. voirsz. dese voirsz. renten sal mogen lossen tot sijnen wille ende beliefte die penninck mit sestien ghelike penningen ende mit den voirscreven ende onbetaelde renten naden belope des tijts. Ende jaerlicx te betalen ende te lossen mit dusdanige pajment, den goeden philips gulden vijf ende twintich stuvers, een gouden keijzers gulden twintich stuvers, een vierijser vier groot ende een halve groten ende ander ons ghenadichs heren pajment na avenandt. Alle dinck sonder. Sij dese brief overghegeven, bekendt ende verlien voir den schoudt voirsz., voir twee guede mannen als tuijgen Martijn Oetsiersz. ende Quirijn Ghijsbrechtsz. In oirconde den wairheijt ende doir verlide ende begeerte van Wouter Cornelisz. ende Allart Ghijsbrechtsz. voirsz., also hebbe ick jonge Jacop Gheritsz. schoudt voirn. dese brief vuyt hanghende bezegelt mit mijn zelfs zeghel in presencie vanden tuijgen voirn. Ghedaen den sestiensten dach in November anno vijftien hondert ende neghen ende twintich.

Inventaris 0502-133

Regest 583 d.d. 15-02-1546

Wij Lourijs Willemsz. scoudt inden ban van Stompick ende Jan Cornelisz. ende Cornelis Phillipsz. getuijgen ende bueren inden selfden ban, Cornelis Willemsz. van Rijn scoudt inden ambocht van Voerscoten ende Aelbrecht Dircxz., Claes Cornelisz. getuijgen ende bueren inden selfden ambocht oirkonden dat voir ons gecomen ende gecompareert sijn in haer eijgen properen personen Claes Hugesz. buijerman inden ambocht van Voorschoten voorsz. ende Cornelis Hugesz. buerman inden ambocht van Soeterwoude ende bekenden ende beleden mit gesamender handt ende elcx een voor al als principale schuldenaers voir hem, huere erfven ende nacomelingen wel ende wettelick vercoft te hebben ende sculdich te wesen den Deputaten ende Memorie meesteren der cappellanen ende vice cappellanen in sinte Pieters kerck binnen Leijden als Mr. Jan Willemsz., heer Bartelmees Dijck ende heer Pieter Jansz. priesteren diet nu zijn off namaels wesen zullen tot den gemenen cappellanen

ende vice cappelanen behouf, die somme van ses gouden karolus guldens van veertich groten tstück tsiaers eewige ende erflicke losrenten. Te betalen alle jaers tot Onser Liever Vrouwen dage Lichtmisse, den tweeden dach in Febrero off binnen een maent daer nae onbegrepen. Daer off teerste jaer renten verschijnen zal tot Onser Liever Vrouwen dage Lichtmisse als men schrijft duysent vijfhondert negen ende veertich nae tgemeen schrijven ende soe voorts van jare te jare daeran volgende, te betalen alle jaers de voorsz. renten geduijrende zoe lange ende ter tijt toe de voorsz. renten off gecoft ende gelost zullen wesen, twelck zijluijden comparanten voorn., haren erven ende nacomelingen tot alre tijt zullen mogen doen teffens ende tot eenen male, de penninck mit seshien gelijcke penningen in hooftgelde ende mit den verschenen ende onbetaelde renten die naer beloop des tijts verschenen sullen wesen als die lossinge geschiet. Te weeten een gouden kourvorster gulden van gewichte voir ses ende vijftich groten vlaems, den gouden phillippus gulden van gewichte voir vijftich groten vlaems, den gouden karolus gulden van gewichte voir veertich groten vlaems ende alle anderen gouden ende silveren penningen gevalueert naer de laetste cualuatie der keijserlicke M^t dier waerde. Ende bekenden hem die voorsz. comparanten van dese coope al wel voldaan ende betaelt te sijn vanden Deputaten voorn., den lesten penninck mitten eersten. Belovende die voorn. comparanten voir hem, hoiren erfven ende nacomelingen den Deputaten voorsz. alle jaers ten dage voorseijt eerlicken te betalen binnen der stede van Leijden, vrij ende onbecommert. In seeckeren behout off bij gebreecke van dien zullen die voorsz. Deputaten de voorsz. rente, mitsgaders alle costen, schaden ende interesten daer om gedaen ende geleden, versien ende verhalen mit heerlicke ende reale executie sHoofs van Hollant, in sulcken ende gelijcken verbant als off sij comparanten bij hoer selfs personen anden Raedt sHoofs voorsz. versocht hadden daer in gecondempneert te sijn ende doir hoir selfs versouck daer inne gecondempneert waren of te executeren op dijkagie recht of mit erf penninck hoe den Deputaten believen sal. Ende beloofden die voorsz. comparanten hem hier tegens niet te verweren, noch doen verweren mit ghenen rechten, geestelick noch waerlick. Ende renunchiëren bij deesen gelijckelick ende elcx van hem bijsonders alle exceptionen, pantkeringen, hantvesten, kueren, defentien, noch te behelpen mit respjten, cessien, privilegien, in geenre manieren tzij appellatien, ofschriften, vrijheijden van marcten ende gratien van princen ter contrarie ende generalick van all tgundt dat hemluijden ter contrarie des voorsz. is te hulpe off tot defentie zoude mogen sijn. Alle archlist ende fraude buijten gesloten. Daer onder stellende ende ijpotieckquerende als speciael ijpoteeckque seven morgen lants bijden hoop sonder maet, Claes Hugesz. eiggentick toebehorende, gelegen inden ban van Stompick voorsz. ende is nu ter tijt belent ende belegen ande zijtoostzijde Mr. Arent Cobel inden Hage, an dat zijteijnde Dirck Dircxz., an die westzijde Pieter Jansz. Velsen, ant noorteijnde de Vliet. Niet belast noch bezwaert dan met sessenveertichstalve stuver tsiaers eewige renten ende ses karolus groten tsiaers losrenten den penninck seshien ende voort met deese tegenwoirdige renten. Noch die gerechte helft van sijn woninge, huijs, berch, schuijeren ende gel.... staende ende leggende inden ambocht van Voorschoten gemengeder voir gemengeder airden mit Jan Wiggersz. binnen ende wesende belegen an die oostzijde Claes Ariaensz. ende Willem Gherijtsz., ant zijteijnde tcloester tot Conincxvelt buijten Delf, ande westende tot Voorschoten, ant noorteijde den heerwech mit ses morgen lants, bijden hoop sonder maet daer dat huijs, berch voorsz. up staende is gemeen mit Jan Wiggersz. voorsz., belent ende belegen die voorn. belenden vanden voorn. woninge. Noch vier morgen lants bijden hoop sonder maet, gelegen Stompick, Cornelis Hugesz. eiggentick toebehorende ende is nu ter tijt belent ende belegen an die oostzijde Jan Willemsz., ant zijteijnde den Ommedijck, ande westzijde Jan Meeusz., ant noorteijnde Stompicker wech. Ende voort alle haer comparanten ghueden roerende, onroerende, waer ende waer an (gelegen) of bevonden sullen worden, binnen steden, dorpen ende daer en buijten nergens gheen ghueden of plaetsen vuytbesondert. Des toirconde wij Louijs Willemsz. scout voorsz., Cornelis Willemsz. van Rijn scout voorsz. deur bede vande voirn., comparanten desen brijeff vuythangende (bezegelt) mit onse segelen hier onder an gehangen in presentie vande tuijgen ende bueren voorsz. Upten 15^e dach februaris anno 1500 acht ende veertich na gemeen schrijven. Mij tegenwoirdich.

Inventaris 0502-144

Regest 421 d.d. 28-05-1499.

Wij Hoge Hugensz. van Zwieten ende Florijs Heerman scepenen in Leijden oirkonden dat voor ons quam Lijsbeth vander Laen mit hoere gecoren voochts hant ende geliede dat sij vercoft heeft die Deputaten ende memorie meesteren van sinte Pieters kercke binnen Leijden also heer Jan vanden Broeck, heer Jacop van Lochorst ende meester Jacop Pietersz. priesteren ende die gene diet namaels wesen sullen totten gemenen cappelanen ende vice cappelanen behoef alsulcken half morgen lants ende twee perchelen van renten als hier nae bescreven staet. Item een half morgen lants, gemengeder vuer mit meester Pieter Wiggersz. in een camp van een morgen lants, gelegen

inden ambocht van Warmond. Welck morgen lants belegen heeft an die oestsijde meester Cornelis van Noorde, ande westsijde de susteren van sinte Margrieten, an de noortsijde Willem Heerman ende an die zuijtzijde tcloester van Reijnsburch. Item noch vijftien comans groten tsiaers erflicke renten staende up IJsbrant Pietersz. hujs ende erve gelegen up tie Vliet. Ende heeft belegen an die een sijde Willem Louwerijsz. ende an die ander sijde Pieter Eleijsz., streckende voor wt die Vliet after an Willems voorsz. erve. Item ende noch een pont comans pajments tsiaers mitte houde, staende up Pieter Aelbrechtsz. thuijn mit horen erve, gelegen buijten de Coepoirt inde ambocht van Soeterwoude. Ende heeft belegen an die een sijde coman Pieter Dircxz. ende an die ander sijde Pieter van Zijll, streckende voor van Adriaen vander Mijen ernamen laen, after an Hüge Meesz. thuijn ende erve. Ende Lisbet voorsz. ende Phillips van der Laen loveden mit gesamender hant ende elcx voor all de Deputaten voornt. totten gemeenen cappellanen ende vice cappellanen behoef dit voorsz. half morgen lants ende twee perchelen van renten vrij te waren jair ende dach als recht is ende als men vrij lant ende vrije renten schuldich is te waren. Ende Lijsbet vander Laen voorsz. lovede Phillips van der Laen voornt. hier of schadelois te houden. Voort so beliede hoir Lijsbet voorsz. van desen cope wel voldaan ende betaelt den lesten penninc mitten eersten. In oirkonden desen brieve besegelt mit onsen segelen. In jair ons heren duijsent vierhondert negen ende tnegentich upten achtendetwintichsten dach in meije.

.....

Inventaris 0502-168

Regest 25 d.d. 02-01-1376.

Ik Dirc vanden Busch scout in Soeterwoude doe cont ende kenlic allen luden dat quam voer mi Jan Hoven zoen ende gheliede dat hi vercoft heeft Claes buterman of houder des briefs vier pont hollantsch tsiaers comans pajments, te betalen all jaer die ene helfte tote Voerscotenre marckte ende die ander helft tote Valkenborgher marckte. Te versien ende staende op dertien morghen lants ende ghelegghen sien in des ambocht van Soeterwoude ende is ghehieten Dirc Hoffels weer ende belegghen heeft an die noert side Florijs van Raphorst ende an dat oest eijnde Jan die Brune ende Claes buterman ende an die suut side Meinsse van Aemstel met sinen kinderen ende an dat west eijnde die suet (=zwet). Ende waer dat zake dat men dese voerseijte reijnten alle iaer niet en betaelre alse voerscreven staet ende Claes voerscreven of houder des briefs quamen vijftien daech na dien (maachten?) voerscreven, soe soude men hem gheven ghelt of pande die men dregghen of derven mochte, den eersten penninck beter ende die burnen drie daghe verloren. Ende waer dat men dat niet en dede, Claes voerscreven of houder des briefs soe soude dan hebben Claes voerscreven of houder des briefs een scellinck des daghes tote viertich daghen toe. Ende waer dat men Jan Claes voerscreven of houder des briefs dese voerghenoemde reijnten niet en betaelen mit den cost voernoemt (buinen?) leijten, zoe waer dit voerghenoemde lant Claes voerscreven vrie eijghen of den houder des briefs ende wanneer Jan wil of die houder is van desen lante voerscreven, soe mach hi dese reijnten belegghen binnen den ambocht van Zoeterwoude of binnen den ambocht van Hasartsoude op anderen lande dat die rechter mit seven buren kent dat alsoe goet is als die dertien morghen voerscreven buten Claes voerscreven cost of houder des briefs. In kennesse der waerheijt heb ic Dirc van den Busch scout voernoemt desen brief beseghelt mit minen seghel. Int iaer ons heren dusent drie hondert ses ende tseventich tsoendaghes na jaersdaghe.

.....

Inventaris 0502-169

Regest 69 d.d. 15-06-1412.

Regest 71 d.d. 01-11-1412.

Regest 72 d.d. 08-12-1412.

Het eerste stuk van dit regest is in het Latijn. De achtste regel wordt de tekst Nederlands. Harman Willemsz. ende Jan Heerman doen condit allen luden dat wi machtich onser sinnen in oflaet van onsen sonden in vermeeringhen onser salicheit ende in ghedenkenisse onser ouders sielen ende der onser ende alle onser vriende siel, ghemaect hebben ende maken mit desen jeghenwordichen brieve inder eeren goids, sijne lieve moeder, sijne Jacop die meerre ende alle goids heiligen, een cappelrie verdienen in sinte Pieters kerc te Leijden op sinte Jacops outaer in die noortside inden die ganc van dat choor der kercken voorsz. mit twee missen ter weke te bidden voir onser ouders sielen, die onser ende alle ons vriende siel, durende tot ewighen daghe. Ende gheven tot deser cappelrie voorsz. sestien morghen lants, luttel min of meer. Ghelegen inden ambocht van Zoeterwoude schelden qwijt voirt heeft belegghen an die westside heer Dirc van Zwieten ende an die noirtside Katrin, Aernt Jacopsz. weedwij, streckende voir vten Rijn afterwaerts in die Kerfmade. Ende van desen lande voorsz. so gheven wi Harman ende Jan voorsz. den eijghendom over tot deser cappelrien voorsz. Ende schelden qwijt voirt alle recht die wi dair toe hebben ghehadt also dat die ghene die dese cappelrie ghegeven wort dit lant voirsch. vrijliken anvaren zel moghen sonder wederseggen van ons of van

onsen nacomelingen, also ghewoenliken is van anderen cappeliren. Ende voirt so sullen wi Harman ende Jan voirsz. van dese cappelrie in allen schijn als voirsz. staet, ghevers of bliven also lange als wi leven, in deser manieren dat Jan Heerman die eerste ghifte gheven sel van der cappelrie voirscr. Ende als dese cappelrie weder verscijnt te gheven so selse Harman Willemsz. voirscr. gheven of Willem Harmansz. of dat van Willems voirscr. live ghecome wair van enen wittachtighen bedde ende van die zw...tside ijmmer den jonghen man voir dat ouder wijf, dair si enen nae sijn te gheven wair Harman voirscr. doot. Ende aldus so selt bliven staen tot ewighen daghen dat Jan Heerman sijn soen of sine rechte erfnaem ende immer den jongheren man voir dat ouder wijf dair si even nae sijn die ghifte gheven sullen. Ende Harman Willemsz. of Willem sijn soen voirscr. of dat van sinen live ghecome is als voirsz. is, die ander ghifte gheven sullen. Ende Jan Heerman ghift dese cappelrie voirsz. nu ter tijt in goids namen Gherijd Hoochstraet Dirxsoen vanden Werve sijnre suster soen die daer op priester worden sel ende verdienen of doen verdienen so wair hi wil also lange als hij levet mit twee missen die weec, maer wair dat sake dat hi dese cappelrie pronuviteerde of dat hi storve, so soudmen dese cappelrie voirscr. verdienen in sinte Pieters kerc also voirscr. staet. Ende presenteren minen ghedachten heer van Vtrecht ende bidde hem oetmoedeliken dat hi Gherijd Hoichstraet voirsz. minen neve inder pointen voirsz. institueren wil als ghewoenlic is ende dese cappelrie conformeren wil mit alsulken recht als voirsz. is. Ende om dat dit onse vterste wille is ende dat dese cappelrie voirtganc hebbe, vaste ende gestade blive eweliken durende, so hebben wi Harman Willemsz. ende Jan Heerman voirsz., desen brief besegelt mit onsen seghelen in jair ons heren duijsent vierhondert ende twalif upten vijftiende dach in Junio.

Dit regest vervolgt weer in het Latijn.

Volgt nog een apart stuk, eveneens in het Latijn.

.....

Inventaris 0502-170

Regest 155 d.d. 05-09-1441.

Ic Pieter van Bossch scout inden ambocht van Zoeterwoude doe condit allen luijden dat voir mij quam Claes Dircxz. tot Zoeterwoude ende geliede dat hij vercoft heeft Jacop Willemsz. een comans pont tsiaers, staende up een stuck lants van vijff morgen, luttel min off meer, dat geheten is die Zwet, streckende mitten oestelijnde an Zoeterwouder wech ende heeft belegen mitten zuijtzijside dat gootshuijs van Zoeterwoude ende an die noortsijde Jacop Willemsoon zelve mit eijgen erve ende lant. Ende des so zijnt voirwairde dat Claes Dircxz. voirsz. niet (vr...re) delven en sal dan tot den dwers sloot. Dat lant is omtrent een ende dertich roeden, luttel min off meer ende dair over niet te delven. Te betalen houder des briefs off maenre des gelts alle jare jairlicxe renten up sinte Lambrechts dage off binnen vierthien dagen dair na onbegrepen. Ende des soe lije ic Claes Dircxz. voirn. wel voldaan ende betailt, den lesten penninc mitten eersten. Ende hier hebben an ende over geweest als tugen Jacop Claesz. ende Ellart Gerijtsz. In kennesse der wairheden so heb ic Pieter van Bossch als een scout dese brieff bezegelt mit mijnen zegel hier angehangen. Int jair ons heren duijsent vierhondert een ende veertich upten vijften dach in Septembri.

Regest 514 d.d. 18-10-1518.

Wij Jan Stoop Kerstantsz. ende Volpert Roelofsz. scepenen in Leijden oirconden dat voirden gerechte quamen Bouwen Willemsz. van Warmonde als man ende voicht van Eenise Heijnricx dochter sijn wijf, Oetghijft, Willem Heijnricxz. weduwe mit Aelbarent van Noirde hoeren gecoren voicht in dese saecke, Heijnrick Willemsz., Jacop Jansz., Heijnrick Jansz., Steffenie Jans dochter mit Aelbarent voirsz. hoeren gecoren voicht in dese saecke, Cornelis Mouwerijnsz. als man ende voicht van Hillegondt Gerijts dochter sijn wijf, Willem Adriaensz. als man ende voicht van Alijde Gerijts dochter sijn wijf ende Geertruijt Gerijts dochter mit Aelbarent voirsz. hoeren gecoren voicht in dese saecke, alle als erfnamen van Jan Heijnricxz. van Warmonde saliger gedachten, Jan Claes Cornelisz. ende Heijnrick Frans als erfgenamen van Margriete Jan Heijnricxz. weduwe van Warmonde hair moeije saliger gedachten. Ende gaven over die deputaten ende memorie meesteren van sinte Pieters kerck binnen Leijden als heer Roelof van Asten, heer Willem Dircxz. ende meester Willem Paeds priesteren ende diet naemaels wesen sullen tot des voirsz. gemeen cappellanen ende vice cappellanen behoef, een schouten brief van Soeterwoude daer desen brieff doirsteken is. Mit recht ende mit vonnisse als recht is. Ende scepenen wijsden die deputaten ende memorie meesteren voirsz. ende diet namaels wesen sullen dair mede te winnen ende te verliesen in allen schijn oft Bouwen Willemsz., Oetghijft Willem Heijnricxz. weduwe, Heijnrick Willemsz., Jacop Jansz., Heijnrick Jansz., Steffenie Jans dochter, Cornelis Mouwerijnsz., Willem Adriaensz., Geertruijt Gerijts dochter, Jan Claes Cornelisz. ende Heijnrick Fransz. voirn. selver waren. In oirconden desen brieff besegelt mit onsen segelen. Int jaer ons heren duijsent vijfhondert ende achtienden upten achtienden dach in Octobri.

.....

Inventaris 0502-171
Regest 272 d.d. 21-02-1462.

Ic Pieter van Bossch scout inden ambocht van Zoeterwoude doe condit allen luijden dat voir mij quam Harmen Lou ende geliede dat hij vercoft heeft Jacop Scout eenen gouden rijnsche gulden off veertich groot vlaems mitten houde ewigen renten. Te betalen jairlicx alle jair tsint Pieters dage ad Cathedram. Te versien ende staende op zijn huys ende erve, gelegen buten Leijden bij die zuijdze ende is geheten dat Veessche velt, inden ambocht van Zoeterwoude. Ende heeft belegen an die oestzijde Aernt Arent Pouwels soons, an die westzijde Aelbrecht van Doenen, streckende vanden Rijndijck after inden Rijn. Mit voirwairden dat Harman Lou voirsz. up tselve erve een huys tijmmeren ende setten sal, dat woenbair is tusschen hier ende Meije naestcomende. Ende Harman Lou voirsz. loefde Jacop Scout voirsz. dese voirsz. rijnsche gulden tsiairs mitten houde, gewaren jair ende dach alsoe recht is als men vrij renten mitten houde op huijse ende erve sculdich is te waren, niet meer op die voirsz. huys ende erve staende dan dese voirsz. rijnsche gulden als voirsz. is. Voirt so beliede hem Harmen Lou van dese voirsz. coope van Jacop Scout voirn. wel voldaan ende betaelt, den lesten penninc mitten eersten. In kennisse der wairheden so heb ic Pieter van Bossch als scout voirsz. ende ter begeerten van Harman Lou voirsz. desen brief bezegelt met mijne zegel hier an gehangen. Int jair ons heren duysent vierhondert twee ende tsestich up sinte Pieters avond ad Cathedram.

Regest 418 d.d. 30-07-1498.

Wij Dirck Dircxz. ende Hugu Huguensz. van Zwieten scepenen in Leijden oirkonden dat voirden gerechte quam Gerijt Claesz. Gruijter ende ghaff over die deputaten ende memorie meesteren van sinte Pieters kercke binnen Leijden, alsoe heer Frans vander Horn, heer Jan vanden Broeck ende heer Ghijsbrecht van Cuijck priesteren totten gemeenen cappellanen ende vice cappellanen behoef, eenen scepenen brief van Zoeterwoude, dair desen brief doirsteken is. Mit recht ende mit vonnisse als recht is. Ende scepenen wijsden die deputaten ende memorie meesteren voirsz. totten gemeenen cappellanen behoef, dair mede te winnen ende te verliesen in allen schijn oft Gerijt Claesz. Gruijter zelve waire. Ende wairt saick dat die renten inden principalen brieve begrepen bij Gerijt Claesz. voirsz. ijet becommert, belast ofte bezwaert wairen boven dat inhouden van den voirsz. principalen brieve dair dese brieve doirsteken is, dat gelovede Gerijt Claesz. voirsz. die deputaten ende memorie meesteren voirnt. ende die gene diet namaels wesen sullen, totten gemeenen cappellanen behoef tot alre tijt of te doen, ofte rechten ende te beteren. Welcken brieve Gerijt Claesz. Gruijter op gecomen ende an bestorven is van Jacop Scout sijnen oude vader was. In oirkonden desen brieve besegelt mit onsen zegelen int jair ons heren duysent vierhondert acht ende negentich opten dertichsten dach in Julio.

Inventaris 0502-172
Regest 321 d.d. 12-02-1472.

Ic Dirck van Bossch scout inden ambocht van Zoeterwoude doe condit allen luijden dat voer mij quam Pieter Clais die Blindensz. ende geliede dat hij in een ewige erfpacht angenommen heeft van Florijs van der Horst off vanden houder des briefs, vijff morgen lands, biden den hoop sonder maet, alsoe groot ende alsoe cleijn alst gelegen is inden ambocht van Zoeterwoude. Ende belegen heeft an die oestzijde Pieter die Blinde voirsz. selve, an die westzijde Fije van Bosschen erfnamen, an dat zuijteijnde Vranck meester Pietersz. weedwij Willehorst ende an dat noorteijnde Meerburger weteringe. Den hoop om twintich stuvers tsiairs ewige ende erflike renten. Te versien ende staende up dese voirsz. vijff morgen lands. Ende verschijnen sullen tot Voircoten ende Valkenburger marcten alle jairs als alle lanthure, renten verschijnen. Ende Pieter voirsz. gelovede voir hem ende voir sijnen erven ende nacomingen Florijs van der Horst voirn. off den houder des briefs, dese voirsz. renten alle jaire te betalen ten dage voirsz. Ende wairt sake datter gebreck viel ander betalinge dat gelieft Pieter voirsz. dat Florijs voirn. off den houder des briefs dat versien ende verhalen soude mogen an die voirsz. landen. Ende waren die voirsz. landen niet goet genoeg dese voirsz. renten an te verhalen, dat soude Florijs voirsz. off den houder des briefs voirt verhalen an alle Pieter voirsz. sijne gueden die hij nu ter tijt heeft off namails vercrijgen mach, roerende ende onroerende wair die gelegen sijn binnen den ambocht off dair buten wairmen die bevinden mach. Ende Pieter voirsz. geloefde hem des niet te verweren mit genen recht, gestelic noch wairlic, alle dinghe sonder argelist. Ende Pieter voirsz. geliede hem mit dese voirsz. vijff morgen lands die hij hier voer ontfangen heeft, van dese voirsz. jairlicxe rente wel voldaan ende betaelt, den lesten penninck mitten eersten. In kennisse der waerheit so heb ic Dirck van Bossch scout voirsz. desen brief besegelt mit mijnen segel hier an gehangen. Int jaer ons heren duysent vierhondert twee ende tseventich upten twalfsten dach in Februario.

Regest 344 d.d. 25-02-1479.

Wij Claes van Leijden ende Pieter die Grebber scepene in Leijden oirkonden dat voir gerechte quam Florijs van der Horst ende gaf over die deputaten ende memorie meesteren der cappellanen ende vice

cappellanen in sinte Pieters kerck tot Leijden, alse heer Willem Jacopsz., meester Aelbrecht van der Hem ende meester Sijmon Andriesz. priesteren tot der gemeen cappellanen ende vice cappellanen voirsch. behoef enen brief dair dese brief doersteken is. Met recht ende mit vonnisse alse recht is. Ende scepenen wijsden die deputaten voirsch. ende diet namaels wesen sullen tot der gemeen cappellanen ende vice cappellanen voirsch. behoef dair mede te winnen ende te verliesen in allen schijn oft Florijs voirn. selve wair. Mit voirwaerden dat die deputaten voirsch. ende diet namaels wesen sullen vanden gemeen cappellanen ende vice cappellanen voirsch. wegen hier voir jaarlicx doen sullen een ewige memorie alse voir heer Willem van der Horst zijn vader ende zijn moeder ende voir heer Vranc van der Horst ende Florijs van der Horst voirsch. na (vouwtje in het regest) hoer memorie voirsch. In oirconden desen brieve besegelt mit onsen segelene in jaar ons heeren dusent vierhondert negen ende tseventich upten vijf ende twinchsten dach in Februario.

Inventaris 0502-173

Regest 324 d.d. 18-04-1472.

Ic Dirc van Bossch schout inden ambocht van Zoeterwoude doe condit allen luijden dat voir mij gecomen is Claes Claesz. ende geliede dat hij vercoft heeft heer Jacop van Werve priester twintich scellingen hollants comans pajments tsiaers ewige ende erflike rente. Te betalen alle jaar tot Voirschoten ende Valkenburger marcten. Te versien, te verhalen ende staende op twee morgen lants die Clais voirsch. nu ter tijt leggende heeft inden ambacht van Zoeterwoude. Ende hebben belegen an die oestzijde die heijlige geest van Zoeterwoude, an die westzijde Louwe Willem Hazen, Pieter Willemsz., Jacop Louwensz. erfnamen, Clais Claisz. voirsch. selve, Willem Claisz. ende Coenraets camp, an dat zuiteijnde den heerwech ende an dat noorteijnde die weteringe. Ende Clais Claisz. voirsch. voir hem ende zijnen erven lovede heer Jacop voirn. ende zijnen erven die voirsch. twintich scellingen comans pajments tsiaers vrij te waren jaar ende dach alse recht is ende als men vrij renten sculdich is te waren. Ende dat up die voirsch. twee morgen lants niet meer renten en staen dan dese voirsch. twintich scellingen pajments tsiaers die heer Jacop voirsch. daer op gecoft heeft. Ende want sake dat die voirsch. twee morgen lants tot eniger tijt niet goet genoeg en waren die voirsch. renten an te verhalen, soe sel heer Jacop voirsch. ende zijnen erven die voirsch. renten voirt versien ende verhalen mogen an alle die goeden die Clais voirsch. nu ter tijt heeft of hier namails vercrigen mach, roerende ende onroerende, waer ende wair an dat die gelegen zijn, binnen steden, dorpen of daer buijten. Alle dinck sonder argelist. Ende hier of beliede hem Clais voirsch. wel voldoen ende betaelt den lesten penninc mitten eersten. In kennisse der waarheijt soe hebbe ic Dirc van Bossch als schout inder ambocht voirsch. desen brieve bezegelt mit mijnen zegele hier an gehangen. Int jaar ons heeren duisent vierhondert twee ende tseventich upten achtienden dach in Aprille. Aan de achterzijde van dit regest is nog een tekst in het Latijn geschreven.

Inventaris 0502-174

Regest 325 d.d. 11-06-1472.

Wij Jorij Rijswijc ende Cornelis van Zonnevelt scepenen in Leijden oirconden dat voir ons quam Geertruijt Clemments dochter mit hoirs gecoeren voichts hant ende geliede dat zij tot enen vrijen eijgen gegeven heeft ende ghift die deputaten ende memorie meesteren der cappellanen ende vice cappellanen in sinte Pieters kerck tot Leijden, alse heer Pieter Dirc Hillensz., meester Heijnric Paedze ende heer Adriaen Willemsz. priesteren totter gheemeen cappellanen ende vice cappellanen voirsch. behouff een morgen lants, gelegen inden ambocht van Zoeterwoude ende gemeen mit Aechte, Gerijt Lieven weduwe, Jacop Willem Martijnsz. ende mit Geertruijt voirsch. Ende heeft belegen an die zuitzijde Pieter Noeijsz. ende an die noortzijde Maes Hoene Gerijtsz., streckende voir van Zoeterwouder wech after an den Ommedijck in die Puijxsloet toe. Ende Geertruijt voirsch. gaf over ende schout quijt die deputaten ende memorie meesteren voirn. ende diet namaels wesen sullen totter gemeen cappellanen ende vice cappellanen voirsch. behoef alle recht eijgendom ende toe seggen dat zij an dat voirsch. morgen lants te seggen heeft of gehadt mach hebben tot desen dage toe datum des briefs. Ende gelovede die deputaten ende memorie meesteren van sinte Pieters kerck voirsch. daer omme nimmer meer aentalinge, aensprake noch moeijenisse te doen, noch te doen doen, in gheenre manieren met ghener rechte geestelic noch waerlic. Ende Geertruijt voirsch. gelovede die deputaten ende memorie meesteren voirn. ende diet namails wesen sullen totter gemeen cappellanen ende vice cappellanen voirsch. behoef die voirsch. morgen lants vrij te waren jaar ende dach alse recht is ende als men vrij lant ende eijgen erve sculdich is te waren. In oirconden desen brieve bezegelt mit onsen zegelen. Int jaar ons heeren duisent vierhondert twee ende tseventich upten elften dach in Junio.

Inventaris 0502-175
Regest 354 d.d. 01-02-1482.

Ic Hüge Hugensz. van Zwieten schout inden ambocht van Zoeterwoude doe condit allen luijden dat voir mij quam Pieter Willemsz. ende geliede dat hij vercoft heeft Machtelt, Gerijt Dirc Hillensz. weduwe twee pont hollants comans pajment tsiaers ewige renten. Te betalen alle jair tot Onser Liever Vrouwendage te Lichtmisse. Te versien, te verhalen ende staende op vijf morgen lants die Pieter voirsz. leggende heeft inden ambocht van Zoeterwoude. Ende hebben belegen an die oestzijde Jan Claes Dircxz., an die westzijde Jacop Louwensz. erfnamen, an dat zuiteijnde Stompickerwech ende dat noorteijnde die Westwech. Ende Pieter voirsz. van hem ende zijnen erven lovede Machtelt voirn. ende hoeren erven dese voirsz. twee pont pajment tsiaers vrij te waren jair ende dach als recht is ende als men vrij renten op vrij eijgen landen sculdich is te waren ende datter gheen meer renten op en staen dan dese renten voirsz. Ende waert sake datter enige meer renten op stonden ende meer dair op bevonden werden dan dese voirsz. renten, soe stelde Machtelt voirsz. ende hoeren erven dese voirsz. renten als dan versien ende verhalen mogen an alle die goeden die Pieter voirsz. nu ter tijt heeft of hier namails vercrigen mach, roerende ende onroerende, gewonnen ende ongewonnen, wair ende wair an dat die gelegen zijn, binnen steden, dorpen of dair buijten. Ende hier of beliede hem Pieter voirsz. wel voldaan ende betaelt, den lesten pennijnc mitten eersten. Ende hier hebben bij geweest als tugen Ewout Jansz. ende Aem Martijnsz. In kennesse der waerheijt soe heb ic Hüge Hugensz. als schout voirsz. desen brieve besegelt mit mijnen zegel hier an gehangen in tegenwoerdicheijt der tugen voirn. Int jair ons heeren duijssent vierhondert twee ende tachtich upten eersten dach in Februario.

Regest 430 d.d. 18-08-1500.

Ic Huijge Huijgensz. van Zwieten scout inden ambocht van Zoeterwoude doe condit allen luijden dat voir mij quam Willem Claesz. ende geliede dat hij vercoft heeft Martijn Roelofsz. twee pondt hollants comans pajments tsiaers ewijge ende erflijcke renten. Te betalen alle jaire tot sinte Jeroens dage. Te versien, te verhalen ende staende op twee morgen lants, luttel min off meer, bij den hoop sonder maet, gelegen inden ambocht van Zoeterwoude. Ende heeft belegen an die westzijde en dat zuijtende ende an dat noertende IJewout Coster ende an die oestzijde Willem Clais voirsz. selver. Welcke voirsz. twee morgen lants zijn vrij sonder enich opstal van renten. Ende noch voirt te versien ende te verhalen op die wonijnge mitte schuij, barge, boemte ende "petijnge" ende mit elff morgen lants dair toebehoerende, dair Willem voirsz. nu ter tijt inne woent. Ende heeft belegen an die oestzijde IJewout Jansz., an die westzijde IJewout Coster, an die zuijtzijde Stompwijcker wech ende an dat noortende Meerburger weterijnge. Hier waren over ende an als tuijgen ende buijerluijden Willem IJewoutsz. ende Dirc Ponciaensz. In kennisse der wairheijt soe hebbe ick Huijge van Zwieten scout voirsz. mijn zegel in tiegenwoirdicheijt vanden tuijgen an desen brieff gehangen. Int jair ons heeren duijssent ende vijffhondert upten achtienden dach in Augusto.

Regest 504 d.d. 04-05-1517.

Wij Volpert Roelofsz. ende Jan Reijersz. scepenen in Leijden oirconden dat voirden gerechte quamen die testamentoirs van Martijn Roelofsz. saliger gedachten als meester Dirck Jacobsz. priester, canoninck van sinte Panraes collegium binnen Leijden mit Aelbarent van Noirde zijnen gecoren voicht in dese zake ende Gerijt Roelofsz., ende gaven over de deputaten ende memorie meesteren van sinte Pieters kerck binnen Leijden als heer Pieter Stien, heer Gerijt Vinck ende meester Karel Jansz. van der Laen priesteren tot den gemeen cappellanen ende vice cappellanen behoef, twee schouten brieven van Soeterwoude dair desen brief doirsteken is. Mit recht ende mit vonnisse als recht is. Ende scepenen wijsden die deputaten ende memorie meesteren voirsz. ende diet naemails wesen zullen, dair mede te winnen ende te verliesen in allen schijn oft die testamentoirs voirn. selver waren. In oirconden desen brieff besegelt mit onsen segelen. Int jair ons heeren duijssent vijffhondert ende zeventien upten vierden dach in Meije.

.....

Inventaris 0502-176
Regest 367 d.d. 16-07-1486.

Ic Huich Hugensz. van Zwieten scout inden ambocht van Soeterwoude doe condit allen luden dat voir mij quam Gherijt Dircxz. Bograven ende gelide dat hij vercocht heeft Mees Jansz. twee pont tsiairs hollants pajment ewige ende ervelike renten. Te betalen alle iair tot sinte Jans dage te midsomer, te versien, te verhalen staende op vier morgen vrij lants, gelegen in die Weijpoort. Ende heeft belegen an die noortside Ghijsbrecht Claisz. ende an die suijside Dirck Vranckensz. ende an die oestside den Ommedick ende an die westside Gherijt Dircsz. voirn. ende voert te versien ende te verhalen of dese goeden niet goet genoich en waren, an alle die goeden die Gherijt voirn. nu ter tijt heeft of hier namails crigen mach. Ende Gherijt Dircxz. voirn. gheloefde voir hem ende voir sinen erven ende nacomelingen Mees Jans zoen voirn. ende sinen erven ende nacomelingen dese voirsz. twee pont siaers vrij te

waren iaer ende dach als recht is ende als men vrij renten op vrij lant ende erve sculdich is te waren. Ende waert dat Gherijt voirsz. of sinen erven ende nacomelingen dese voirsz. renten alle iaer niet en betaelden ten dage voirsz., so soude Mees Jansz. voirn. of sinen erven ende nacomelingen alle dage mogen verteren voor vier groot sdages totter tijt toe dat dese voirsz. renten mitten dachgelde voirsz. betaelt wair. Ende hier of belide hem Gerijt Dircxz. van Mees Jansz. voirn. wel voldaan ende betaelt, den lesten penninc mitten eersten. Ende hier hebben bij, an ende over gheweest als tughen Gherijt Woutersz. ende Dirc Claes Willemsz. In kennisse der wairheit so heb ic Huich Hugensz. als scout voirsz. om bede van Gherijt Dircxz. voirn. in tegenwoirdicheit der tughen, desen brief besegelt mit minen segele hier an ghehangen. Int jair ons heeren dusent vierhondert sesentachtich opten sestieneen dach in Julio.

Regest 409 d.d. 09-01-1498.

Wij Coen van Bosschuijsen ende Dirck Florijsz. scepenen in Leijden oirkonden dat voir gerechte quam Mees Jansz. ende gaff over die deputaten ende memorie meesteren van sinte Pieters kercke tot Leijden, also heer Frans van der Horn, heer Jan vanden Broeck ende heer Ghijsbrecht van Kuijck priesteren totten vicarijsen behoef eenen scouten brief van Soeterwoude dair desen brief doirsteken is. Mit recht ende mit vonnisse also recht is. Ende scepenen wijsden die deputaten ende memorie meesteren voirsz. ende den genen diet hier namaels wesen sullen, totten voirsz. vicarijsen behoef dair mede te winnen ende te verliesen in allen schijn oft Mees Jansz. voirsz. selver wair. In oirkonden desen brieve bezegelt mit onsen zegelen int jair ons heeren duysent vierhondert achtendenegentich upten negenden dach in Januario.

.....
Inventaris 0502-177

Regest 407 d.d. 10-02-1497.

Wij Pieter de Grebber ende Coen van Bosschuijsen scepenen in Leijden oirkonden dat voer ons quam coman Gerijt Dircxz. ende geliede dat hij vercoft heeft meester Cornelis Jacopsz., heere Sijmon IJewoutsz. ende heer Frans van der Horn priesteren, memorie meesteren der cappellanen ende vice cappellanen in sinte Pieters kerck tot Leijden totter voirsz. cappellanen ende vice cappellanen behoef twintich comans groten tsiairs ewige ende erfflicke renten. Te betalen alle jair tot Alre Heijligen daege. Te versien, te verhalen ende staende op vier morgen lants mitter huijsinge, barge, boemte ende potinge dair op staende die comen Gerijt voirsz. leggende heeft inden ambochte van Zoeterwoude. Ende hebben belegen an die westzijde die abdisse van Rhijnsburch ende an die oestzijde coman Gherijt voirsz. selve, streckende van Stompijcker wech tot in die Goeij toe. Ende coman Gerijt voirsz. lovede die cappellanen ende vice cappellanen voirsz. dese voirsz. twintich comans grooten tsiairs vrij te waren jair ende dach also recht is ende als men vrije renten sculdich is te waren ende datter niet meer renten op en staen dan dese twintich comans grooten ende noch vijff phillippus scilden, acht ende twintich comans grooten voirde scilde gerekent, ewige ende erfflicke renten die des cappellanen ende vice cappellanen in sinte Pieters kerck voortijts dair op gecoft hebben nae inhoud der brieve die dair off sijn. Voirt soe beliede hem coman Gerijt voirsz. van desen coepe wel voldaan ende betaelt den lesten pennijnck mitten eersten. In oirkonde desen brieve bezegelt mit onsen zegelen. Int jair ons heeren duysent vier hondert sevenendetnegentich upte tienden dach in Februario.

.....
Inventaris 0502-178

Regest 438 d.d. 06-08-1502.

Wij Martijn Roelofsz. ende Martijn Pietersz. scepenen in Leijden oirkonden dat voer ons quam Geertruijt, Gerijt Buijtewechs wedewij mit hoers gecoren voochts handt ende geliede dat zij vercoft heeft den deputaten ende memorie meesteren van sinte Pieters kerck tot Leijden, also meester Dirck Jacobsz., meester Pieter van Sassenem ende heer Aernt Lievijn priesteren tot den ghemeene cappellanen ende vice cappellanen behoef van sinte Pieters kerck voersz., derdalse morgen lants gelegen inden ambocht van Zoeterwoude anden Naectsluijs. Ende heeft belegen an die oestzijde die bansloet leggende tusschen die thuijnen ende dit voersz. landt, an die zuijtzijde die vier cappelrien van Leijden, an dat westeiijnde ende an dat noorteijnde beijde die Vliet. Ende Geertruijt voersz. lovede die deputaten ende memorie meesteren voern. ende diet namaels wesen zullen tot der voersz. gemeene cappellanen ende vice cappellanen behoef, dit voersz. landt vrij te waren jaer ende dach als recht is ende als men vrij lant ende eijgen erve schuldich is te waren, gelijk buijrlandt inden ambocht daert gelegen is. Voert zoe beliede hier die voern. Geertruijt hier of wel voldaan ende betaelt te wesen, mits dat die deputaten ende memorie meesteren voersz. achtervolgen ende volbrengen zullen tinhouden vanden instrument dat zij Geertruijt voersz. hier voer gegeven hebben. In oerkonden desen brief bezegelt mit onsen zegelen. Int jaer ons heren duysent vijf hondert ende twee upten zesten dach in Augustis.

Inventaris 0502-179
Regest 443 d.d. 19-02-1504.

Ick Huijge Huijgensz. van Zwieten scout inden ambocht van Zoeterwoude doe condit allen luijden dat voir mij quam Claes Pouwelsz. ende geliede dat hij vercoft heeft Maertijn Roelofsz. ende zijnen erven twee pondt hollants comans pajments tsiaers ewijge ende erflijcke renten. Te betalen alle jairs upten Kersavont, dair Kersavont naistkomende den eersten dach van betalijnghe of wesen sal. Ende dan zoe voirt van jare te jare upten Kersavont dair naestkomende dese voirsz. renten te betalen dienende erflijcken ewelijck. Te versien, te verhalen ende staende op derdalve mergen lants, luttel min off meer bijden hoep sonder maet, gelegen inden ambocht van Zoeterwoude. Ende heeft belegen an die zuijsijde Fije Vrancken wedewij, an die noortsijde Pieter Boeijensz., an dat oestende die dijepe Vliet ende an dat westende Vranck Jacobsz. Ende Claes Pouwelsz. voirsz. loefde Martijn Roelofsz. voirnt. dese voirsz. renten vrij te waren jair ende dach als recht is gelijck men vrije erfrenten up landt ende eijgen erve sculdich is te waren. Ende dat op die voirsz. landt gheen ander voir renten staende zijn dan vijf comans groten siairs papelijke proven die de kerck tot Zoetermeer dairup heeft. Voirt soe belijede hem Claes Pouwelsz. voirsz. van desen coope wel voldaan ende betaelt, den lesten pennijck mitten eersten. Hier waren an ende over als tuijgen ende buijerluijden Wichman Meesz. ende Cornelis Gerijtsz. In kennesse der wairheijt soe hebbe ick Huijge van Zwieten scout inden ambocht voirsz. mijn zegel in tegenwoordicheijt der tuijgen voirnt an dese brief gehangen. Int jair ons heren duijsent vijff hondert ende vier upten neghentienden dach is Februario.

Regest 449 d.d. 16-01-1505.

Wij Willem Stoop ende Florijs van Bosch scepenen in Leijden oerkonden dat voordien gerechte quam Maertijn Roelofsz. ende gaf over die deputaten ende memorie meesteren van sinte Pieters kerck, alse meester Jacob van Lochorst, heer Ghijsbrecht Pietersz. ende heer Jan Govertsz. priesteren ende die geene diet namaels wesen zullen, tot den voersz. gemeene cappellanen ende vice cappellanen behoeft, eenen scouten brief van Zoeterwoude daer desen brief doersteken is. Mit recht ende mit vonnesse als recht is. Ende scepenen wijsden die deputaten ende memorie meesteren voorn. ende diet namaels wesen zullen tot den voersz. gemeene cappellanen ende vice cappellanen behouf, daer mede te winnen ende te verliesen in allen schijn oft Maertijn Roelofsz. voern zelve waer. In oerconden desen brieve besegelt mit onsen zegelen. Int jaer ons heren duijsent vijfhondert ende vijff upten zestienden dach in Januario.

.....

Inventaris 0502-180
Regest 451 d.d. 01-03-1505.

Ic Huijge Huijgen zoon van Zwieten scout inden ambocht van Zoeterwoude doe condit allen luijden dat voir mij quam Pieter Vranckensz. ende geliede dat hij vercoft heeft Maertijn Roelofsz. drie enckele gouden coirvorster rijnsche gulden off pajment haer wairde, gemunt ende geslegen voir datum van desen brieve, tsiaers ewijge ende erflijcke losrenten. Te betalen alle jairs up Onser Lieve Vrouwen avont te Lichtmisse off binnen vierthien dagen daer nae ombegrepen. Te versien ende te verhalen alle jairs up vijff morgen lants gelegen indie Weijpoort inden ambocht van Zoeterwoude. Ende heeft belegen an die noortsijde Pieter Pietersz., an die zuijsijde Dirck Dircxz., an dat oostende den Brouckwech ende an dat westeynde die Vliet. Ende voert te versien ende te verhalen an alle die goeden die Pieter Vranckensz. nu ter tijt heeft off hier namaels vercrijgen mach, zij sijn roerende oft onroerende ende wair an dat die gelegen zijn ofte bevonden zullen worden. Ende Pieter Vranckensz. voirnt. ende Vranck Jacopsz. sijn vader geloefden mit gesamender handt ende elcx voir all Martijn Roelofs voirnt. dese voirsz. renten vrij te waren jaer ende dach als recht is ende als men vrij losrenten up landt ende eijghen erve sculdich is te waren. Des zijn voirwairden dat Pieter Vranckensz. voirnt. dese voirsz. renten van Martijn Roelofsz. voirnt. tot alre tijt sal mogen vrijen, lossen ende off coopen mit eens die somme van acht ende viertich der zelve gouden rijns gulden oft pajment datter goet voir is ende mitten verschenen ende onbetaelde renten die naden beloop vander tijt verschenen ende onbetaelt zullen wesen als die lossinghe geschiet. Ende dese lossing sal Pieter voirsz. mogen doen in zoe voirt hij die voersz. renten ten voirsz. dagen ende termijne alle jairs duech(delicken) betaelt ende voldoet. Ende bij gebreke van dien zoe en sal Pieter voirsz. daer gheen losinghe an hebben, in geenre manieren. Ende Pieter voirsz. loefden Vranck Jacopsz. zijnen vader voirnt. hier off scadeloes te houden. Voort zoe beliede him Pieter voirsz. van desen coope wel voldaan ende betaelt den lesten penninck mitten eersten. In kennesse der wairheijt soe heb ick Huijge van Zwieten scout voirsz. mijn zegel an desen brief gehangen. Upten eersten dach van Maerte int jair ons heren duijsent vijff hondert ende vijff naer scrijven der stede van Leijden.

Regest 538 d.d. 13-07-1523.

Wij Frans Gerijt Doensz. ende Frans Gerijtsz. Goel scepenen in Leijden oirkonden dat voordien gerechte quam Marie van Zonnevelts dochter inden name ende als gemachticht van Zijvert Willemsz.

hair man, naer inhoud een acte vanden Hove van Hollant in date upten derthienden dach van Febrero anno vijftien hondert ende achtene stilo curie hollandie, die wij scepenen voirsz. dair van gesien ende gelesen hebben, mit Jacop Deijman horen gecoren voicht in dese zake ende gaff over den deputaten ende memorie meesteren van sinte Pieters kerck binnen Leijden, als heren Gerijt Vinck, heren Pieter Stien ende meester Heijnrick Jansz. priesteren tot de gemeen cappellanen ende vice cappellanen behoef, een schouten brieve van Zoeterwoude dair dezen brief doirstekende is. Met recht ende mit vonnisse als recht is. Ende scepenen wijsden den deputaten ende memorie meesteren voirsz. ende diet naemaels wesen zullen tot den voorsz. gemeen cappellanen ende vice cappellanen behoef dair mede te winnen ende te verliesen in allen schijn oft Marie voirn. gemachticht als boven, zelve waer. Ende waert sake dat de renten inden principalen brieve begrepen ijert becommert, belast of bezwaert waen boven tindhouden vanden selven principalen brieve dair dezen brieve doirsteken is, dat gelovede Marie voirsz. gemachticht als voren, den voirn. deputaten ende diet naemaels wesen zullen tot alre tijt of te doen up te rechten ende te beteren. Dair onder stellende alle hoer goeden, roerende ende onroerende die zij nu ter tijt heeft ende naemael vercrijgen zal, wair ende wair an die gelegen zijn, geen wtgesondert zonder enich weer van recht tzij geestelic of waerlick dair jegens te doen of te doen doen, in eniger manieren. In oirkonden desen brief bezegelt mit onsen zegelen. Int jair ons heren duijsent vijfhondert drie ende twintich upten dertienden dach in Julio.

.....

Inventaris 0502-181

Regest 475 d.d. 25-05-1529.

Wij Pieter de Grebber ende Willem Heerman scepenen in Leijden oirkonden dat voir ons quamen joncfrou Adriana van der Does Jans wedewij van Lochorst mit hoers gecoerens voichts handt, Jacop Heerman als man ende voich van Heijnrick van der Does zijn wijff ende Willem Jan Kerstantsz. als man ende voicht van joncfrou Margriet van der Does zijn wijff, alle als ernamen van Willem van der Does hoir vader ende gelieden dat zij samentlic vercoft hebben den deputaten ende memorie meesteren der capellanen ende vice capellanen van sinte Pieters kerck, als heer Jan van den Broeck, meester Pieter van Sassenen ende heer Jacop Maes priesteren ende diet naemaels wesen zullen totter voirsz. capellanen ende vice capellanen behoef, dese naebescreven perchelen van jairlicxe renten mitten houde. Eerst zekere perchelen van renten mitten houde staende up zekere thuijnen buijten die Coepoert inden ambocht van Zoeterwoude als hier nae bescreven staen. Eerst derthien comans groten tsiars staende up Jan Pietersz. van Thienders thuijn ende erve. Ende heeft belegen an die een zijde die wech die men ande weije gaet ende dander zijde Jan Dircxz. Tellepeper, streckende voir vanden dijck after an die weije. Item thien comans groten tsiars staende up Jan Dircxz. Tellepepers thuijn ende erve. Ende heeft belegen an deen zijde Jan Pietersz. voirsz. ende an dander zijde Claes Jacopsz. snijder, streckende voir vande dijck after an die weije. Item thien comans groten tsiars staende up Claes Jacopsz. thuijn ende erve. Ende heeft belegen an die een zijde Jan Dircxz. voirsz. ende an die ander zijde Martijn Roelofsz., streckende voir vanden dijck after an die weije. Item twintich comans groten tsiars staende up Martijn Roelofsz. thuijn ende erve. Ende heeft belegen an die een zijde Claes Jacopsz. voirsz. ende an die ander zijde Willem Willemsz. meecoper, streckende voir vanden dijck after an die weije. Item twintich comans groten tsiars, staende op Willem Willemsz. meemans thuijn ende erve. Ende heeft belegen an die een zijde Martijn Roelofsz. voirsz. ende an die ander zijde Jan Aerntsz. van Beringen, streckende voir vanden dijck after an die weije. Item een ende twintich comans groten tsiars, staende op Jan Aerntsz. van Beringens thuijn ende erve. Ende heeft belegen an die een zijde Willem Willemsz. voirsz. ende an die ander zijde Gerijt Hugensz., Aechte Goverts dochter, Gobburch Gerijt Aelwijnsz. dochter, Jacop Huijch ende Gerijt Heije, streckende voir vanden dijck after an die weije. Item drie ende twintich comans groten tsiars, staende op Gerijt Hugensz. thuijn ende erve. Ende heeft belegen an die een zijde die gemeen wech ende an die ander zijde Aechte Goverts dochter, streckende voir van der laen sloet after an Jan Aerntsz. voirsz. thuijn. Item twalef comans groten ende een penning pajments tsiars, staende up Aechte Goverts dochter thuijn ende erve. Ende heeft belegen an die een zijde Gerijt Hugensz. voirsz. ende an die ander zijde Gobburch Gerijt Aelwijnsz. dochter, streckende voir vande laen sloet after an Jan Aerntsz. voirsz. thuijn. Item vijf ende twintichstelve comans groten tsiars, staende up Gobberch Gerijt Aelwijnsz. thuijn ende erve. Ende heeft belegen an die een zijde Aechte Goverts dochter voirsz. ende an die ander zijde Jacop Huijch, streckende voir vande laen sloet after an Jan Aerntsz. voirsz. thuijn. Item twaleff comans groten ende twee penningen pajments tsiars, staende up Jacop Huijch voirsz. thuijn ende erve. Ende heeft belegen an die een zijde Gobburch voirsz. ende an die ander zijde Gerijt Heije, streckende voir vande laen sloet after an Jan Aerntsz. voirsz. thuijn. Item acht ende twintich comans groten ende drie penningen pajments tsiars, staende up Gerijt Heijen thuijn ende erve. Ende heeft belegen an die een zijde Jacop Huijch ende an die ander zijde die weije, streckende voir vande laen sloet after an Jan Aerntsz. voirsz. thuijn. Item ende noch zekere percelen

van renten mitten houde, staende up zekere huijsen ende erven binnen der stede van Leijden als hier nae volgen. Item eerst thien schellinc pajments tsiairs, staende up Katrijn Harmans dochters huijs ende erve gelegen in Onzer Liever Vrouwen stege in Onzer Vrouwen prochie. Ende heeft belegen an die een zijde Ruppert die garensijeder ende an die ander zijde Bertelmees Aerntsz., streckende voor vuyter stege after an meester Jacop berbiers erve. Item thien scellinc pajments tsiairs, staende up Ruppert die garensijeders huijs ende erve gelegen inde voirsz. stege. Ende heeft belegen an die een zijde Katrijn Harmans dochter voirsz. ende an die ander zijde Cornelis Sijmonsz., streckende voir vuyter stege after an Claer Dirck van Delf dochters erve. Item thien schellinc pajments, staende up sinte Cralien susterhuijs, gelegen in Onzer Liever Vrouwen prochie. Item drie schellinc ende negen penningen pajments tsiairs, staende up Jan Heijnricxz. van Warmons huijs ende erve, gelegen in Levendeel. Ende heeft belegen an die een zijde Kerstant Pietersz. volre ende an die ander zijde Florijs Martijnsz., streckende voor vuyt Levendeel after an Willem Gerijtsz. erve. Item drie scellinc negen penningen pajments tsiairs, staende up Kerstant Pietersz. volres huijs ende erve, gelegen in Levendeel. Ende heeft belegen an die een zijde Jan Heijnricxz. voirsz. ende an die ander zijn Coenen stege, streckende voir vuyt Levendeel after an Willem Gerijtsz. erve. Item vijff schellinc pajments tsiairs, staende up Claes Rutgersz. huijs ende erve, gelegen up die Middelwech. Ende heeft belegen an die een sijde Greet, Sijmon van Banckens weduwe ende an die ander sijde IJsbrant die houtcoper, streckende voir van de straet after an Gerijt Willemsz. Coddens erve. Item vijff schellinc pajments tsiairs, staende op Willem Banniersz. huijs ende erve, gelegen op die Middelwech. Ende heeft belegen an die een sijde Gerijt Willemsz. Codde ende an die ander zijde IJsbrant voirsz., streckende voir vande straet after an IJsbrants voirsz. erve. Item thien schellinc pajments tsiairs, staende up Cornelia, Jan Gerijtsz. weduwe huijs ende erve, gelegen up die Corte Maren. Ende heeft belegen an die een zijde Pieter Dircxz. scrienmaker ende an die ander zijde den Rijn, streckende voir vuyt die Maren after an Pieter Dircxz. voirscreve. Item ende noch achten scellinc ende acht penningen pajments tsiairs, staende op Cornelis Gerijts zoon volres huijs ende erve, gelegen up die Zijdtgraft bij den Raem. Ende heeft belegen an die een zijde Jan Ghijsbrechtsz. ende an die ander zijde Cornelis Jansz. die Wilde, streckende voir vuyt de graft after an Jan Aelwijnsz. erve. Ende joncfrou Adriane Heerman ende Willem Jan Kerstantsz. voirsz. geloveden mit gesamender handt ende elcx voir al den deputaten ende memorie meesteren voirn. ende diet naemaels wesen zullen tot der voirsz. capellanen ende vive capellanen behoeff dese voirsz. renten mitten houde vrij te waren jair ende dach als recht is ende als men vrije renten mitten houde sculdich is te waren. Ende joncfrou Adriane Jacop Heerman ende Willem Jan Kerstantsz. voirsz. loveden malcander ende elcx den anderen van een derdendeel hier off schadeloes te houden. Voert zoe belieden hem die voirsz. personen van desen coepe wel voldaan ende betaelt, den lesten penninc mitten eersten. In oirkonden desen brieff bezegelt mit onzen segelen. Int jair ons heren duysent vijfhondert ende negen opten vijfendetwintichsten dach in Meije.

Inventaris 0502-182

Regest 491 d.d. 23-06-1514.

Wij provisoir ende deken van Rijnlandt doe condit alle luijden dat voor ons gecomen sijn Boudewijn Willemsz. van Warmondte ende Cornelis Jansz. die Wilde ende bekenden dat sij angenommen hebben in enen ewige erfpacht vanden deputaten ende memorij meesteren van sinte Pieters kerck binnen Leijden als heer Jan van den Kuijck ende heer Roeloff van Asten, een morgen lants gelegen inden ambocht van Zoeterwou ende leijt gemeen mit Aechie, Gerijt Lieven weduwe, Jacop Willemsz. ende mitte goede mannen voirsz. Ende heeft belegen an die zijdzijde Pieter Noes ende an die noortzijde Maes Hove Gerijtsz., streckende voer vander Zoeterwouder wech after ande Ommedijck in die Pijnsloet (= Puiksloot) toe. Ende Boudewijn Willemsz. ende Cornelis Jansz. voirsz. loveden mit gesamender hant ende elcx voir al den deputaten inder tijt wesende, te betalen alle jairs tot sinte Lambertij dage twee ende twintich stuvers vrij gelt. Ende waert saecke dat sij niet en betaelde als voirsz. is, soe sullen die deputaten inder tijt wesende dat mogen verhalen mitten onkosten dair op comende, an dat lant voirsz. sonder hem luijden dair tegens ijert te verweren, mit rechten geestelick of waerlick. Dit sijnt voirwairden datmen dit lant voirsz. niet en sal wtdelven, verarghen ofte ontgronden, maer verbeteren. Alle dinck sonder arch ofte liste. In oirkonden soe hebben wij porvisoir ende deken voirn. desen brief bezegelt mit onsen zegelen onser officien hier an gehanghen. Int jair ons heeren duysent vijfhondert ende vierthien upten drieentwintichsten dach in Junio.

Inventaris 0502-183

Regest 510 d.d. 17-01-1518.

Ic Ghisbrecht van Zwiten ambocht heer ende scout in Zoeterwoude doen condit allen luden dat voer mijn quam Willem Aellwijnsz. ende geliede dat hij angenommen heeft van die deputaten ende memorie meesteren van sinte Pieters kerck binnen Leijden als heer Gerijt Vinck, heer Roeloff van Asten ende

heer Pieter van Aken priesteren, bi consent der capellanen ende vice capellanen, drie morghen lants (...en) ewige erfpacht leggende inden ambocht voirsz. in een weer groet wesende twintich morgen gemengeder voer ende airde mit Willem voirsz. om drie rinse gulden ende drie st. tsiaers, streckende wt Zoeterwouder wateringe an die Puijtsloet. Ende heeft belegen an die noortzijde Willem Bouwen Willemsz. ende an die zuijtzijde den heijlige gheest tot Leijden. Om vrij ghelt van allen onghelden ... verhalen sullen, verscinen alle jairs Lamberti ende te betalen inden twaleff nach(ten) van Kersavont ende alsoe van jair tot jaer durende ten ewigen dage. Ende dese jairlicxe renten te mogen versien ende te verhalen an die voirsz. landen ende noch an twee morgens leggende inder selve weer van twintich morgen groot wesende. Ende voirt an allen goeden die Willem voirn. heeft of hier naemaels vercrigen mach ende an allen die goeden die op dit voirsz. lant bevonden wort ende in wat manieren datse genoempt mach wesen, roerende ende onroerende, wair ende wair die gelegen of bevonden mochte worden, tsij binnen steden, dorpen off daer buten. Ende ic Willem voirn. gelove voir mij ende mijnen erve off nacomelingen dese voirsz. landen alijt te beteren ende niet te verarchen noch te ontgronden ende noch mede hier weer op te doen van enighe rechten of te verweren, tsij gheestelicke off waerlicke noch ghen nijewe vonden die men hier op ter contrarie souden mogen peijnsen, deijncken, vinden ofte verzijeren. Alle arch ende lijst wtgesondert. Hier hebben bij, an ende over geweest als tugen Pieter Willemsz. ende Gerrit Claesz. In kennisse daer wairheit soe hebbe ic Ghijsbrecht van Zwiten voersz. mijn zeghel hijer an gehangen in tegenwoirdicheijt der tugen voern. Int jair ons heren vijftienhondert ende achten op sinte Anthonis dach in Januario.

.....

Inventaris 0502-184

Regest 517 d.d. 10-02-1520.

Ick Ghijsbrecht van Zwieten ambochts heer ende scout inden ambocht van Zoeterwoude doe kondt allen luijden dat voir mij quam Pieter Willemsz. van Voirschoten geliede ende bekende dat hij vercoft heeft die deputaten ende memorij meesteren van sinte Pieters kerck binnen Leijden als heer Willem Dircxz., heer Pieter Stien ende heer Foij van Zijl priesteren, vier rins gulden tsiaers tstick veertich groot vlaems ewighe ende erflijcken renten, vrijs gelts van allen ongelden. Te versien, bewijsen, staende ende te mogen verhalen up ses morgen lants, bij den hoop sonder maet, gelegen inden ambocht voirsz. in den ban van Stompick. Ende hebben belegen an dat noorteijnde Meerburger wateringhe, an dat zuijteijnde Stompiker wech, an die oestzijde Huijch van Zwietens erfgenaemen, an die westzijde Wouter Dirck Jansz. Te betalen alle jaers tot sinte Pieters dach ad Kathedram viertijen dagen dair na ombegrepen. Dair off teerste jair renten verschijnen sal ende dach vander betalingh wesen tot sinte Pieters dage ad Kathedram als men scrijft duijsent vijffhondert en een ende twintich ende so voirt van jare tot jare gedurende tot ewigen dagen. Noch te mogen versien ende verhalen an alle andere gueden die Pieter Willemsz. voirsz. nu ter tijt heeft off hier namaels vercrigen sal mogen, gewonnen ende ongewonnen, roerende ende onroerende, wair ende wair an die gelegen zijn off bevonden mochte worden, tzij binnen steden, dorpen off dair buijten. Ende Pieter Willemsz. voirsz. ende Jan Willemsz. zijn broeder als wairborch geloven mit gesamender hant ende elcx een voir al dese voirsz. vier rins gulden jairlixen renten pajment voirsz. de voirgenoemde deputaten ende memorij meesteren off die hier namaels deputaten ende memorij meesteren worden sullen, vrij te waren jaer ende dach als recht is als men vrije renten op eijgen lant ende erve vrij ende onbecommert sculdich is te waren. Ende Pieter Willemsz. ende Jan Willemsz. voirsz. geloven voor hoer ende horen erven ende nacomelingen hier gheen weer van rechte tegens te doen off doen doen, in enigher manieren geestelijck noch waerlijck noch gheen loze nuwe vonden diemen hier op dencken, peijnsen, vinden off verzieren mochte. Ende Pieter Willemsz. voirsz. belooft Jan Willemsz. zijn broeder voirn. hier off scadeloes te houden. Van welcke coop Pieter Willemsz. voirsz. lijde ende bekent wel voldaan ende betaelt van heer Willem Dircxz., heer Pieter Stien ende heer Foij van Zijl priesteren, deputaten ende memorij meesteren totter memorijen behooff, den lesten penninck mitten eersten. Alle argelist wtghesondert. In kennisse der wairheit so hebbe ick Ghijsbrecht van Zwieten ambochts heer ende scout inden ambocht voirsz. desen brief bezegelt mit mijn zelfs zegel ende hier onder an gehangen. Dair an, bij ende over waren als tugen Bouwen Cornelisz. ende Jorijs Bouwensz. Int jaer ons heren duijsent vijffhondert ende twintich upten tijnden dach in Februario.

.....

Inventaris 0502-185

Regest 519 d.d. 04-03-1520.

Ick Ghijsbrecht van Zwijeten ambochts heer ende scout inden amboecht van Zoeterwoude doe kondt ende kenlijck allen luijden dat voer mijn quam Heijnrick Sijmonsz. Reewijck ende ghelijede ende bekende dat hij vercoft heeft Jan Jansz. vijer pont hollants tsjaers dertich comans grooten gherekent voer een pont eewijghe ende erflijke losrenten, vrijs ghelts van allen onghelden. Te betalen alle jaers op sinte Pieters dach ad Cathedram, waer of dat eerste jaer van betalinghe wesen ende verschijnen

sal op sinte Pieters dach ad Kathedram nu naestcomende ende soe voert van jaer tot jaer dese voersz. renten te betalen diijrende also langhe ende tot dijer tijt toe datze ghelost worden ende nijet langher. Ende dese voersz. renten sal Jan Jansz. voersz. of den houder van desen brieff jaerlijx moeghen verzijen ende verhalen an twijntijch morghen lants mijt een huijs, scuijer, barch ende poterije daer op staende, ghelegghen inden amboecht voersz. Ende heeft belegghen an die noert zijde Jacob Cornelijsz. ende an die zuitzijde Pieter Gherijtsz. ende Bouwen Willemsz., streckende van die Puijck sloet tot an Jacob Cornelijsz. werf toe. Ende voert te moghen verzijen ende verhalen an alle die goeden die Heijnrick Sijmonsz. voern. nu ter tijt heeft of hijer naemaels soude moghen verkrijghen, ghewonnen ende onghewonnen, roerende of onroerende, waer ende waer an die ghelegghen zijn of waermen die soude moghen bevinden, tsij binnen steden, dorpen of daer buijten. Ende Heijnrick Sijmonsz. voersz. ghelovede voer hem ende zijn erven hijer gheen weer van recht teghens te doen. noch doen doen in eenijgher maenieren tsij geestelijck noch waerlijck noch uijt ghenen nuwen vonden diemen hijer teghens contrarie soude moghen peijnsen, dencken of verzijeren. Ende Heijnrick Sijmonsz. ghelovede voer hem ende zijn erven dese voersz. vjer pont hollants tsijaers Jan Jansz. voersz. of den houder van dese brieff vrij te waeren jaer ende dach als recht is als men vrije renten op twijntijch morghen lants mijt een huijs, scuijer, barch voersz. sculdich is te waeren. Ende zijn voorwaerden dat Heijnrick Sijmonsz. of zijn erven Jan Jansz. voersz. of den houder van desen brieff sullen een half jaer te voeren waerschuwen wanneer hij dese voersz. vjer pont lossen wil. Ende zijn voorwaerden dat Heijnrick Sijmonsz. of zijn naecomelighen dese voersz. vjer pont hollants tsijaers sullen moghen vrijen, lossen ende ofcoepen tot welker tijt dattet hem belijeven sal sonder wedersegghen van Jan Jansz. of den houder van desen brieff, elcke pennijnck mijt seshijen, een gouden gulden van ghewecht voer achtendetwijntijch stuvers of ander pajment dier waerden mijt die verschenen ombetaelde renten naeden beloept des tijts. Van welcken coep hem Heijnrick Sijmonsz. voersz. lijdet ende bekendt van Jan Jansz. voern. wel voldaan ende betaelt te wesen den laetsten pennijnck mijten eersten. Alle arghelijst wtghesondert. In kennijssen der waerheijt soe hebbe ick Ghijsbrecht van Zwijeten amboechts heer ende scout inden amboecht voersz. desen brieff bezeghelt mijt mijn selfs zeeghel hijer onder an ghehanghen. Daer bij, an ende over waeren als tuijghen Eewout Jansz. ende Bruijn Gherijtsz. Int jaer ons heren diijsent vijf hondert ende twijntijch den vijerden dach in Marcijo.

Regest 539 d.d. 03-10-1523.

Ic Jan dije bastairt van Noirtwijck schout inden ambocht van Noirtwijck due condit allen luijden dat voer mijn quamen Dirck Woutersz., Havick Jansz., Adam Jansz., Mathijs Jansz. ende Claes Jansz. als erfgenamen van wijlen Jan Jansz. zoen ende bekenden vercoft, ghetransporteert ende oever gegeven te hebben meester Gheerijt van der Laen eenen bezegelden brief van vjer ponden tsijaers, spreekende op Heijnrick Sijmons zoen Rewijck zijne hofstede ende gueden, ghelegghen inden ambocht van Soeterwoude, daer dese teghenwoordighe brief duersteecken es, omme achtervolghende dijen de voersz. renten te innen, te ontfangen, te nemen, te gheven ende in als zijne vrije wille ende believen dair mede te doene. Ende bekenden hem de voersz. Dirck, Havick, Adam, Mathijs ende Claes als erfgenamen voersz. vanden voirnoemde meester Gerijt ter cause voersz. al wel voldaan ende betaelt te wesen, den lesten penning mitten eersten. Alle dinc zonder argelist. Hijer waren bij, an ende oever als tuijghen ende buijren van Noirtwijck, Pieter Lourijsz. ende meester Jan van Beloijs. Ende in kennisse des wairheijts, soe heb ick Jan dije bastairt schout voersz. desen brief ghesteecken ende getransfixeert duer den voersz. principaele rentebrief ende mit mijnren zegele wthangende bezeghelt. Op den vijftijnden dach in October inden jaer ons heren vijftienhondert drijentwintich.

Regest 545 d.d. 09-10-1527.

Ick Ghijsbrecht van Zwijeten amboechts heer ende schout inden amboecht van Zoeterwoude doe kondt ende kenlijck allen luijden dat voer mijn quam Heijnrick Sijmonsz. Rewijck ende ghelijede ende bekende voer hem ende voer zijn erven dat hij vercoft heeft Lambrecht Jacobsz. vjer pont hollants tsijaers, dertich comans groten voer een pont gherekenet, vrijes gheltes van allen onghelden. Ende die te betalen alle jaers te Korssavont, daer dat eerste jaer renten ende dach van betalijnghe hijer of wesen ende verschijnen sal te Korssavont nu naestcomende ende soe voert van jaer tot jaer dese voersz. renten te betalen, diijrende soe langhe ende tot der tijt toe datze ghelost worden ende nijet langher. Ende dese voersz. renten sal Lambrecht Jacobsz. of zijn erven alle jaers opten voersz. dach moghen verzijen ende verhalen, ende staen op twijntich morghen lants mijt een huijs, barch ende paeterije daer op staende. Ghelegghen inden amboechte voersz. ende belegghen an die noert zijde Jacob Cornelijsz., an de zuitzijde Pieter Gherijtsz. (R)uijs ende Cornelijs Florijsz. mijt zijn huijerweer, streckende van die Puijcksloet of tot an Jacob Cornelijsz. ende Pieter Gherijtsz. lant toe. Ende voert te moghen verzijen ende verhalen an alle die reste goeden die Heijnrick Sijmonsz. voersz. nuter tijt heeft of hijer naemaels sal moghen vercrijghen, waer ende waer an die ghelegghen zijn of waermen die sal

moghen bevijnden, tsij in steden, dorpen of daer buijten. Ende Heijnrick Sijmonsz. ghelovede voor hem ende voer zijn erven ofte naecomelijnghe hijer gheen weer van recht teghens te doen, noch doen doen in enijgher manijeren, tsij gheestelijck noch waerlijck noch mijt ghenen loose nuwe vonden diemen hijer op teghens contrarije soude moghen verzijeren om inder betalinghe soudē moghen letten of deeren. Ende zijn voerwaerden dat Heijnrick Sijmonsz. voersz. of zijn erven ofte naecomelijnghe dese voersz. vyer pont hollants tsijaers sullen moghen vrijen, lossen ende ofdoen tot wat tijden dattet hem belijeven sal sonder weder segghen van ijemant, elcken pennijnck mijt sestijen, mijt den gouden corvorster gulden ghevalueert van ghewecht voer acht ende twijntijch stuvers of ander pajment dier waerden mijt die verschenen renten ombetaelt nae beloepe des tijts als die lossinghe gheschijen sal. Ende van desen coope soe belijede hem Heijnrick Sijmonsz. voersz. van Lambrecht Jacobsz. voernt wel voldāen ende betaelt te wesen, den laetsten pennijnck mitten eersten. Alle arghelist wtghesondert. In een kennissen der waerheijt soe hebbe ick Ghijsbrecht van Zwijeten amboechts heer ende schout inden voersz. amboecht desen brijef bezeeghelt mijt mijn selfs zeeghel hijer onder an ghehanghen. Daer bij, an ende over waren als tuijghen Willem Claesz. ende Cornelijs Gherijtsz. Int jaer ons heeren vijftihjen hondert ende seven ende twijntijch den neghenden dach in Octobris.

Regest 553 d.d. 11-11-1533.

Ick Cornelis van Zwijeten ambochtsheer ende scout van Zoeterwoude doe condit allen luijden dat voor mijn ende buijren naegescreven quam Lambrecht Jacopsz. ende bekende mits desen vercoft, getransporteert ende ten vrije eijgen overgegeven te hebben meester Gerijt van der Laen een jaerlicxe rente ende rentbrieff van vyer ponden hollants tsiaers die hij staende ende sprekende hadde op Heijnrick Sijmonsz. Rewijck ende up zijn woning, landen ende goeden in Zoeterwoude, breder verclaert inden principalen rentbrief daer dese brief doersteken es. Omme de voersz. jaerlicxe renten achtervolgende den zelve principalen brief te innen ende te ontfangen ende oft noot waer rechts daer omme te spreken ende all daer mede te doen dat Lambrecht voersz. zelve daer mede zoude hebben mogen doen. Ende de voersz. Lambrecht stelde mits desen den voersz. Gerijt ter cause voersz. in zijnen stede ende gaff hem over ende cedeerde alle recht, actie ende toeseggen hem daer an competerende zonder hem ijet meer daer an te behouden. Ende bekende hem de voersz. Lambrecht voerts ter cause voersz. vanden voorn. Mr. Gerijt alle wel ende doechdelijck voldāen ende betaelt te wesen, den laetsten penninck mitten eersten. Ende dese toerconde heb ick Cornelis van Zwijeten ambochtsheer ende scout voersz. desen brief gesteken ende getransfixeert doer den dese principalen rentbrieff ende die alsoe vuythangende besegelt mit mijnen zegel hier beneden an gehangen. Daer mede bij, an ende on waeren als tuijgen ende buijren van Zoeterwoude Bruijn Gerijtsz. coster ende Wouter Gerijtsz. Ende is gedaen upten 11^e dach in November inden jaer on heren duijsent vijfhondert drie ende dertich.

Regest 576 d.d. 14-02-1545.

Ic Jan Dircxz. Vaender schout inden ambochte van Zoeterwoude doe condit allen luijden dat op huijden datum van desen voor mij ende getuijgen buijren des zelve ambochts hier onder gescreven, gecomen ende gecompareert es meester Gerijt van der Laen licentaet inden rechten ende heeft getransporteert ende overgegeven, transporteert ende ghift over bij desen den Deputaten in sinte Pieters kercke binnen Leijden als meester Floris Ghijsbrechtszoon pastor tot Oestgeest, heeren Willem van Zijl ende Quierijn Claesz. priesteren tot de gemeen cappellanen ende vice cappellanen behouf, twee rentebrieven elcx mit een transpoort daer op doersteecken, mit des zelfs rentebrieven recht daer desen mijnen brief doersteecken is. Omme de voorn. Deputaten ende diet namaels wesen zullen tot de voersz. cappellanen ende vice cappellanen behouf daer mede te winnen ende te verliesen in allen schijn oft meester Gerijt voersz. zelve waer. Ende waert zaecke dat dijpotheque der renten inde voersz. principale rentebrieven begrepen daer desen mijnen brief doersteecken is, voor de zelve renten ende hooft somme van dien souffisant en ware, soe heeft meester Gerijt voorn. daer voren gestelt ende stelt bij desen generalick ende specialick alle zijne goeden die hij nu ter tijt heeft ende naemaels vercrijgen zal, roerende ende onroerende, waer ende waer an die gelegen zijn of bevonden zullen worden, binnen steden, dorpen ende daer buijten geen wtgesondert. Ende meester Gerijt voersz. belijede hem van dese transpoorte wel voldāen ende betaelt den lesten penninck mitten eersten. Alle dijnck sonder arch ofte list. In oirconden desen brief bezegelt mit mijnen zegel ter presencie van Corstant Claesz. ende Philips Heijnricxz. als getuijgen buijren inden voersz. ambochte. Opten vierthienden dach in Februarie int jaer ons heren duijsent vijfhondert vijf ende veertich nae schrijven der kercke van Wtrecht.

Inventaris 0502-186

Regest 522 d.d. 03-11-1520.

Dit regest is zwaar beschadigd, een stuk is afgescheurd en er zitten gaten in.

..... amboechts heer ende scout inden amboecht van Zoeterwoude doe kondt allen luijden dat voer mijn quam Wouter voer hem ende voer zij erven dat hij vercoft heeft die Deputaten ende Memorie meesteren van sinte Pieters proechie binnen Leijden heer Claes van Leijden ende meester Kaerl Jansz. van der Laen priesteren tot den voersz. cappellenen ende vice cappellenanen behoef die summa tsjaers ewighe ende erflijke losrenten dertijch comants groten gherekent voer een pont, vrij's ghel'ts van allen onghelden, te betalen alleghen daghe ende in die Meijmaent daer an wel betaelt, waer of dat eerste jaer van betalinghe wesen ende verschijnen sal op Alreheijlighen dach annotjich ende in die Meijmaent daer an welbetaelt ende soe voert van jaer tot jaer dese voersz. renten jaerlix sullen betalen diijrende alsoe langhe ende tot dijer tijt toe dat ze ghelost worden ende nijet langher. Ende oft sake waer dat Wouter Gherijtsz. voersz. of zijn erven dese voersz. vijf pont hollants tsjaers nijet en betaelde op die daghen voersz. ende in die Maijmaent wel betaelt, soe soud'en die voersz. Deputaten ende Memorie meesters die nuter tijt zijn of die hijer naemaels wesen sullen teijnden die voersz. Meijmaent moghen verteeren elx daechs een braspenninck. Ende dese voersz. jaerlix renten mijtter terijncghe daer op ghelopen sullen die voersz. Deputaten of die hijer naemaels Deputaten of Memorie meesters wesen sullen, moghen verzi'en ende verhalen an drie morghen lants, gheleghe'n inden amboecht voersz. in Ghelderswouder broeck. Ende heeft beleghe'n an die noert zijde Jacob Jansz. ende an die zuijtzijde Pieter Pietersz., streckende van die Vlijet tot an den Broeck wech toe. Ende noch te verzi'en ende te verhalen an twee morghen lants, gheleghe'n in Wouter Gherijtsz. huijsweer inden amboecht voersz. ende heeft beleghe'n an die noert zijde Pieter Gherijtsz. ende an die zuijtzijde dat cloester lant van Poel, streckende wt die Vlijet tot an Wouter Gherijtsz. lant toe. Ende voert te moghen verhalen an alle die goeden die Wouter Gherijtsz. voersz. nu ter tijt heeft of hijer naemaels soude moghen verschijnen, ghewonnen of onghewonnen, roerende of onroerende, waer ende waer an die gheleghe'n zijn of waermen die soude moghen bevijnden, tsij binnen steden, dorpen of daer buijten. Ende voert te moghen verzi'en ende verhalen an Dirck Dircksz. als borch. Ende Wouter Gherijtsz. ghelovede voer hem ende voer zijn erven hijer Dirck Dircksz. scadeloes of te houden. Ende Wouter Gherijtsz. voersz. ghelovede voer hem ende zijn erven dese voersz. vijf pont hollants tsjaers die Deputaten voern. vrij te waren jaer ende dach als recht is als men vrije renten op vijf morghen lants voersz. sculdich is te waeren. Ende zijn voerwaerden dat Wouter Gherijtsz. of zijn erven dese voersz. vijf pont tsjaers sullen moghen lossen, vrijen ende ofcopen elcken pennijnck mijt seshijen, een gouden gulden van gheweicht voer achtendetwintijch stuivers ende een philips gulden voer vijf ende twintijch stuivers of dier waerden mijt verschenen ombetaelde renten nae den beloop des tijts verschenen tot welker tijt d... hem belijeven sal. Ende Wouter (Gherijtsz. voersz.) voererven hijer gheen weer van recht teghens te doen noch doen in enijgher manijeren, tsij gheestelijck noch waerlijck mijt ghenen hijer op contrarie soijde moghen peijnsen, dencken of verzi'en tot welker tijt dattet hem belijeven sal. Ende Wouter en bekendt van die Deputaten voersz. wel voldae'n ende betaelt te wesen den laetsten pennijnck mijtten eersten. Alle arghelist wt ghesondert. In een kennijssen der waerheijt soe hebbe ick Ghijsbrecht van Zwijeten amboechts heer ende scout inden amboecht voersz. desen brijef bezeghe't mijt mijn selfs zeeghe'l hijer onder an ghehanghen. Daer bij, an ende over waren als tuijghen Cornelijs Bouwensz. van Tol ende Gherijt Claesz. Int jaer ons heeren duijsent vijf hondert ende twijntich de derden dach in November.

Inventaris 0502-187

Regest 534 d.d. 24-05-1522.

Ick Ghijsbrecht van Zwieten ambochts heer ende scout inden ambocht van Zoeterwoude doe kondt allen luijden dat voor mij quamen Katrijn, Aernt Dircxz. wedwij Onderwater mit Jacob Aerntsz. haer zoen als bestorven voecht ende Jacob Aerntsz. voirsz. voir hem selven, Cornelis Aerntsz., Lambrecht Jansz. als man ende voecht van Adriaen Aerntsdochter zijn huijsvrou, Ghijsbrecht Claesz. als man ende voecht van Marritgen Aerntsdochter zijn huijsvrou ende Frans Aerntsz. mit Jacob Aerntsz. voirsz. als voecht ende Jacob voirsz. noch als voicht van Leenert Aerntsz., lijen ende bekennen dat zij mit ghesamender hant vercoft hebben heer Claes van Leijden, heer Gerrijt Vinck ende heer Heijnrick van Leuwen die deputaten ende memorie meesteren van sinte Pieters kerck binnen Leijden, vijff morghen lants, bij den hoop sonder maet, gelegen inden ambochte voirsz. inden Broock. Streckende dat noirtwesteijnde wt die Weijpoertze Vliet tot an die Broockwech toe, belegen an die zuijtoestzijde Jan die Costers erfgenaems diet nu ter tijt gebruijcken, an die noirtwestzijde Claes Gerrijtsz. Ende Katrijn ende Jacob, Cornelis, Lambrecht, Ghijsbrecht, Frans ende Jacob als voecht van zijn broeder voirsz. geloven mit gesamender hant ende elcx een voor al dese voirsz. vijff morgen lants in manieren voirsz. die deputaten ende memorie meesteren voirn. off die hier namaels deputaten ende memorie meesters worden sullen, vrij te waren ende ombecommert te leveren, jaer ende dach als trecht is ende alle commer off te doen tot nu ter tijt toe, als men vrij lant ende eijgen erve sculdich is te waren ghelijcke

buijrlant. Ende indien die voirsz. deputaten ende memorie meesteren nu ter tijt wesende off hier namaels worden sullen totter memorien behouff enich gebreck, hinder off scade hadde ander voirsz. woninghe, dat soude se mogen verhalen an een woninghe mit zijn toebehoren die tot den onderpant ende waringhe staet, daer Katrijn ende Cornelis ende Frans voirsz. nu ter tijt up wonen, dair Aernt Dircxz. Onderwater saliger gedachten mitter doot off geruijmt is, groot wesende een ende twintich morgen eijgen lants die belast zijn tsiaers mit dertich ponden hollants ende niet meer. Gelegen inden ambocht voirsz., belegen an die noirtwestzijde Dirck Jansz. ende dat convent sinte Jans heeren tot Haerlem ende Dirck Baertsz., an die zuijtoestzijde Pieter Claesz. ende Willem Ewoutsz., streckende dat noirtwestzijde wt die Vliet tot die Zoeterwouder wech toe. Ende dit al te gescijen sonder enich weer van rechts dair tegens te doen off doen doen, in enigher manieren, tzij geestelijck ofte wairlijck, noch gheen nuwe loze vonden hier op te dencken, vinden noch verliesen. Van welcke coop Katrijn, Jacob, Cornelis, Lambrecht, Ghijsbrecht, Frans ende Jacob voirsz. lijen ende bekennen vanden deputaten ende memorie meesteren voirn. wel voldaan ende betaelt, den lesten penninck mitten eersten, alle argelist wtgesondert. In kennisse der wairheijt so hebbe ick Ghijsbrecht van Zwieten ambochtsheer ende scout inden ambocht voirsz. desen brieff bezegelt mit mijn zegel ende hier onder an gehangen. Dair bij, an ende over waren als tugen Heijnrick Andriesz., Willem Engebrechtsz. ende Aernt Willemsz. van Delff. Int jaer ons heren duijsent vijffhondert twee ende twintich upten vier ende twintichsten dach in Meije.

.....

Inventaris 0502-188

Regest 558 d.d. 23-11-1538.

Ic Cornelis van Zweeten ambochtsheer van Zoeterwoude ende van Stompwijk doe kondt allen luijden dat op huijden datum sbriefs voer mij ende gebuijeren nae beschreven gecomen is Willem Jansz. inde Weijpoort ende bekende mits desen voer hem selven, zijnen erven ende naecomelingen wel ende wittelicken vercoft te hebben ende schuldich te wesen heer Foeij van Zijl, heer Bartholomees van Delff ende heer Dirck Splintersz. priesteren ende deputaten van sinte Pieters kercke binnen Leijden off den houder van desen brieve bij hoeren wille, die somme van zes gouden karolusse guldens van veertich groten vlaems tstuck tsiaers losrenten. Te betalen alle jaers op sinte Katherijnen daghe den vijff ende twintichsten dach in November, daer off teerste jaer renten verschinen ende den eersten dach van betaelinghe wesen sal tot sinte Katherijnen daghe anno 1500 neghen ende dorch naestcomende ende also voort van jaere te jaere tot dat dese renten volcomelicken of gelost zullen wesen. Twelck die voorn. Willem Jansz. ende zijnen naecomers doen zullen moghen tot allen tijden alst hem believen sal. Ende dat mits upleggende ende betaelende mit lopens ghelts, voer elcke penning zestien gelijcke penninghen tot eene reijse ende mitte renten die naeden beloep des tijts verschinen zullen wesen als die lossinghe geschiet. Ende bekende hem die voorn. Willem Jansz. van die coepe voorsz. alle wel ende doechdelicken voldaan ende betaelt te wesen, den lesten penninck mitten eersten. Ende die voorsz. Willem Jansz. beloefde voer hem ende zijnen naecomelingen den voorsz. deputaten ende hoeren naecomelingen off den houder van desen mit hoeren wille, alle jaers ten daghe voorsz. eerlick te betaelen, off bij gebreecke van dien, sullen die voorsz. deputaten die verschinen renten mitsgaders allen costen, schaden ende intrest daeromme gedaen ende geleden, versien ende verhaelen mit executie sHoofs van Hollant, off mit dijkagie recht, off mit executie van willekoer recht, off mit erfenninck recht off anders soe hem dat best gelieven sal. Eerst an zijn woeninghe mit barch, schuijer ende potinghe ende anders daer op staende, daer hij nu ter tijt op woent, groot wesende zestiendalff morgen lants, bijden hoop sonder maet leggende inden ambocht van Zoeterwoude voorsz. Ende hebben belegen die twaelftalff morgen voorsz. an die zuijtzijde Pieter Claesz., an die noortzijde Pieter Jansz., an die oostzijde die Brouckwech ende an die westzijde die Weijpoortse vliet. Ende die ander vier morgen lants voorsz. hebben beleggen an die zuijtzijde Gerijt Jansz. Onderwaeter, an die noortzijde Pieter Claesz., an die oostzijde die Brouckwech ende an die westzijde die Weijpoortse vliet voorn. Noch een stucke lants leggende in Ghelderswou, groot wesende acht hont lants, bij den hoop sonder maet ende heeft belegen an die westzijde Willem Dammensz., an die noortzijde oude Willem Claesz., an die zuijtzijde Dirck Sijmons. Kassenaer ende an die oestzijde die Benthuijsense kaede. Ende voort qualicken ende specialicken alle zijne andere gueden die Willem Jansz. voorn. nu ter tijt heeft ofte naemaels vercrighen sal moeghen, roerende ende ontroerende, gheen wtgesondert, waer ende tot wat plaetsen die bevonden sullen worden. Sonder enich weer van recht daer teghens te moghen doen in gheenre manieren, gheestelick noch waerlick, renunciërende ende te buijten gaende allen exceptien, relivementen, respijten, appellatien, offschriften, vrijheijden van jaermarten, privilegiën ende graciën van princhen ende allen anderen dier contrarie. Alle dinck zonder arch ende list. Des toerconden zoe hebbe ic Cornelis van Zweeten ambochtsheere van Zoeterwoude ende van Stompick voorn. desen brieff besegelt doer beede van Willem Jansz. voorsz. met mijn selfs zegel wthangende besegelt. In presencie van Louweris Huijgensz. ende Cornelis

Florijsz. Int jaer ons heeren duysent vijfhondert acht ende dortich upten drie ende twintichsten dach in November.

.....
Inventaris 0502-189

Regest 580 d.d. 25-11-1546.

Ic Jan Dircxz. Vaender schout inden ambochte van Zoeterwoude doe condit allen luijden dat voor mij ende getuijgen hier onder gescre. in parsonen gecomen ende gecompareert zijn Willem Jansz. wonende in de Weijpoort ende Phillips Jansz. ende belieden mit gesamen der hant elcx een voor all als principael voor hem hoiren erven ende nacomelingen wel ende wettelicken vercoft te hebben ende schuldich te wesen den deputaten ende memorimeesteren der capellanen ende vice capellanen in sinte Pieters kercke binnen Leijden als meesters Gerijt Heerman, Jan Willemsz. ende meester Jan Petit priesteren, diet nu zijn of naemaels wesen zullen tot de gemeen capellanen ende vice capellanen behouf, de somme van zes gouden karolus guldens van veertich grooten vlaems tstück tsiaers eewige ende erflicke losrenten. Te betaelen alle jaers opten eersten dach in Decembri of binnen een maent daer nae onbegrepen, binnen der stede van Leijden in zeeckeren behout, daer of teerste jaer renten verschijnen zal opten eersten dach in Decembri als men schrijft duysent vijfhondert zeven ende veertich ende zoe voort van jaere te jaere daer an volgende, te betaelen elck jaer renten geduijrende zoe lange ende ter tijt toe dat de voorsz. renten ofgecoft ende gelost zullen wesen. Twelck de voorn. comparanten, hoiren erven ende naecomelingen tot alre tijt zullen mogen doen teffens ende teenen maele den penninck mit zestien gelijcke penningen in hooftelde ende mit de verscheenen ende onbetaelde renten naer beloope des tijts als de lossinge geschiet. In pajments te weten den gouden coirvorster gulden van gewichte voor zes ende vijftich grooten vlaems, den gouden philippus gulden van gewichte voor vijftich groten vlaems, den gouden carolus gulden van gewichte voor veertich grooten vlaems ende allen anderen gouden ende zilveren penninghen geëvaueert naer de laetste evaluatie der keij. ma^t dier waerde. Ende bekenden hem die voorsz. comparanten van dese coope wel ende doichdelick voldoen ende betaelt vanden deputaten voorsz., den lesten penning mitten eersten. Belovende den deputaten voorsz. alle jaers ten daege ende plaetse voorseijt de voorsz. renten eerlick te betaelen vrij ende onbecommert, of bij faulte van dien zullen die voorsz. deputaten de verscheenen renten mitsgaders alle costen, schaden ende interesten daer om gedaen ende geleden, versien ende verhaelen mit heerlicke ende reale executie sHoofs van Hollandt, in alsulcken ende gelijcken verbandt als of zij comparanten zelve an den raedt des voorsz. Hoofs versocht hadden daer in gecondempneert te zijn ende doir hoir versouck daer inne gecondempneert waeren. Ende voorts texemteren op dijcagije recht of mit erfpennig recht, hoe hoir des believen zal. Belovende voorts die voorsz. comparanten hem hier tegens niet te verweren noch te doen verweren mit gheenen rechten, geestelick noch waerlick ende renuchierende mits desen voor hoir, hoiren erven ende naecomelingen ende elcx van hem bijsondere alle exceptien, pantkeeringen, hantvesten, kueren, defensien, respiten, cessien, privilegien in eeniger manieren, tzij appellatien of schriften, vrijheden van marcten, gratien van princhen ter contrarien ende generalick van al tgunst dat hoir (contrarie des voorsz. staet) te hulpe of tot de defencie zoude mogen wesen. Alle arch, list ende fraude bujten gesloten. Hier voren stellende ende ijpothequerende als speciaal ijpotheque, eerst elf ende een halve morgen lands, gelegen inden voorsz. ambochte in de Weijpoort. Ende hebben belegen noortwaert Hillegont Jans dochter, an de zuijtzijde Pieter Claes Ghijsen, an toosteiijnde den Broucwech ende an twesteiijnde den Ommedijck. Noch vier morgen lands, oock gelegen aldaer. Ende hebben belegen an de noortzijde Pieter Claesz., an de zuijtzijde Gerijt Jansz. Onderwater, an toosteiijnde den Broucwech ende an twesteiijnde den Ommedijck. Ende noch acht houdt lands mede gelegen inden voorn. ambochte in Gelderswoude. Ende hebben belegen an de noortzijde Willem Claesz., an de zuijtzijde Dirck Sijmonsz. Cassenaer, an toosteiijnde Benthuijser cade ende an twesteiijnde Willem Dammasz. Ende voorts generalick ende specialick alle die andere goeden die de voorsz. comparanten ende elcx van hem nu ter tijt hebben ende naemaels vercrijgen zullen, roerende ende onroerende, waer ende waer an die gelegen zijn of bevonden zullen worden binnen steden, dorpen of daer bujten geen goeden noch plaetsen wtgesondert noch bujten gehouden. Hier waren bij, an ende over als getuijgen Jacop Jans zoon ende Jan Bruijnen zoon buijren des voorschreven ambocht. In oirconden desen brief bezegelt mit mijnen zegele hier an gehangen ter presentie der voorn. getuijgen. Int jaer ons heeren duysent vijfhondert zes ende veertich opten vijf ende twintichsten dach in Novembri.

.....
Inventaris 0502-190

Regest 606 d.d. 07-02-1559.

Ick Willem Adriaens schout inden ambocht van Soeterwoude doe condit ende kenlick allen luijden dat voer mijn ende gebuijren des selven ambochts hier onder gescreven, ghecomen ende gecompareert is selver parsoenlick den Dammas Willemsz. woenende tot Leijderdorp anden Hoegen Rijndijck inden

ambocht van Soeterwoude voersz. ende bekende mits desen voer hem, sijnen erven ende nacomelingen wel ende wettelicken vercoft te hebben ende doechdelicken schuldich te weesen die deputaten ende memorie meesteren in sinte Pieters kercke bijnnen Leijden, als meester Gerijt Heerman, meester Jan Willemsz. ende meester Henrick Jansz. Eenhoorn priesteren ende diet naemaels weesen sullen, tot der selver deputaten ende memorie behouff ofte actie van henluijden hebbende, die somme van drije carolus guldens van veertich grooten vlaems tstuck tsiaers eewijghe ende erfflicke losbaere renten. Te betaelen alle jaers opten laetsten dach Januarij binnen Leijden in handen vanden memorie meesteren inder tijt wesende ofte actie van desen van henluijden hebbende. Vrij van thienden penning ende van allen anderen impositien, lasten, costen ende commer van als vrij sonder eenijghe cortinge. Daer off teerste jaer renten vallen ende verschijnen sal opten laetsten dach Januarij anno 1500 ende tsestich naestcomende ende soe voorts van jaere tot jaere daer an volgende, te betaelen elcke jaer renten geduerende alsoe lange ende ter tijt toe dat dese voersz. renten ofgeloste ende ghevrijt sullen weesen. Twelck Dammas Willemsz. voern. ende sijnen erven ende nacomelingen tot allen tijden sullen moegen doen tot hoeren wille ende believen, teffens ende tot eenen maele mit acht ende veertich der voersz. carolus guldens in hooftelde ende mit die verschenen ende onbetaelde renten die naeden beloop des tijts verschenen ende onbetaelt sullen weesen als die lossinghe geschiet. In pajmente den gouden coervorster rijnsche gulden tot zessenvijftich grooten vlaems tstuck, den gouden philippus gulden tot vijftich grooten vlaems tstuck, den gouden carolus gulden voersz. tot veertich grooten vlaems tstuck, een zilveren vlijs voer zes grooten, een dubbelde stuver voer vier grooten, een stuver voor twee grooten ende alle andere gouden ofte zilveren penningen goet van goude ende gewichte dier waerden naer advenant, mits dat men dese voersz. jaerlicxe renten niet en sal moegen smaeldeelen in gheender manieren, maer telcken ende bij elcken geheelen teffens te betaelen. Ende die voersz. Dammas Willemsz. bekende hem ter cause voerseijt all wel voldaan ende doechdelicken te vollen betaelt te weesen, den laetsten penning mitten eersten. Ende omme dese voersz. renten alle jaers ten daghe ende in handen als vooren wel te betalen ende wel te versequeren, zoe was Dammas Willemsz. voirn. hijer onder ende ter cause voerseijt specialicken mits desen verbindende, veronderpandende ende ijpoticerende als speciael ijpoteeck, inden eersten twee hont lants, bij den hoop sonder maet, mit huijs, barch, schuijer ende poterije daer op staende, daer Dammas Willemsz. voern. nu ter tijt selver op woont, gelegen inden ambocht van Soeterwoude voersz., streckende wten Rijn tot anden Hoegen Rijndijck toe. Ende heeft belegen ande zuijtzijde Cornelis Garbrantsz. ende ande noortzijde Anthonie Andries dochter, mit alle datmen inde wooninge ende upt voirsz. landt bevinden sal moege. Ende verclaerde hij comparant bij eede, dit voersz. landt mit thuijs daerop staende all vrij te weesen van eenijghe pachten ofte rente daer op staende, anders dan dese tegenwoerdige renten voersz. Ende voerts generalicken ende specialicken alle sijne andere goeden dien hij comparant voern. nu ter tijt heeft ofte naemaels vercrijgen sel moegen, roerende ende ontroerende, waer ende waeran die gelegen zijn ofte bevonden sullen werden, gheen goeden ofte plaetsen wtgesondert ofte buijten gehouden. Omme bij gebreke der voersz. jaerlicxe betalinge ende hooftsomme van dijen, daer an te moeghen versien ende verhaelen als erfpenning mit erfpenning recht, ofte als willecoer ghelt bij willecoer recht, ofte als sheeren penningen bij bedwanck executie ende verbant van allen sheeren rechten ende rechteren, gheestelicken ende waerlicken, daer alsulcx ende aen welcke goederen den houder sbriefs tot sijne koere gelieven sal te procederen mit alle die costen daeromme doende ende lijdende soe wel als de principael penning. Alle dunck sonder arch ofte list. Desen toirkonden soe hebbe ick Willem Adriaensz. als schout voersz. desen brief doer beede ende verlijden van Dammas Willemsz. voern. besegelt mit mijnen zegele vuijthangende hier beneden an desen brief gehangen. Daer mede bij, an ende over waeren Jacop Bruijnen coster ende Claes Claes zoen buijerluijden inden ambochte voersz. als getuijgen hier over geroepen ende gebeden, die welcke elcx hoere naem ofte dagelicx hantgeschrift hier mede ondergescreven hebben. Int jaer ons heeren duijsent vijfhondert neghen ende vijftich upten zevenden dach Februarij na gemeen scrijven.

.....

Inventaris 0502-191

Regest 616 d.d. 10-02-1563.

Ick Jan Cornelisz. van Nierop schout inden ambachten van Zoeterwoude ende Stompwijck doe condit ende kenlick allen luijden dat voer mij ende voer Vranck Jacobs zoen ende Lenaert Willemsz. buijren van Soeterwoude voern. ghecoemen ende gecompareert is selver parsoenlick Neeleman Sijmon Gherijtsz. woenende inden ambochte van Soetermeer (sic) voersz. ende bekende mits desen voer hem sijnen erven ende nacomelingen wel ende deuchdelicken schuldich te weesen die Deputaten ende Memorijs meesteren tot behouff van die cappellanen ende vice cappellanen in sinte Pieters kercke binnen der stede van Leijden, diet nu sijn ende namaels weesen sullen, die somme van vier carolus gulden van veertich grooten vlaems tstuck, tsiaers eewijghe ende erfflicke losbaere renten. Te

betaelen alle jaers opten thienden dach in Febrero ende dat onvermaent binnen der stede van Leijden in handen vanden Deputaten ende Memorie meesteren inder tijt wesende, tot behouff vanden cappellanen ende vice cappellanen voersz. Vrij van allen costen, commer ende lasten, beeden, subventien, impositien, contributien, schattinghen, thienden penninck (meer of min) hoe tselve ghenomt ende bij wijen die gheordonneert zijn ende noch gheordonneert sullen werden, tzij bijden staeten vanden lande ofte bij ijemandt anders, gheene wtgesondert ofte buijten gehouden. All waer daer bij expresselick verclaert, cortinge in heel of deele te gheschien. Daer of teerste jair renten vallen ende verschijnen sal opten thienden dach in Febrero anno 1500 vjerendetsestich naestcomende ende alsdan soe voorts van jaer tot jaere daer altijt aen volgende, te betalen elcke jaer renten gheduerende alsoe langhe ende ter tijt toe dat dese voersz. renten ofgelost ende ghevrijt sullen sijn. Twelck hij comparant voern. sijnen erven ende nacomelinghen tot allen tijden sullen moeghen doen tot hoeren wille ende gelieven, mits opleggende teffens ende tot eenen maele van elcken penning zestien gelijcke penninghen, bedragende vjer ende tsestich gelijcken carolus guldens voersz. in hooftgelde. Ende dat mit eijnckele stuvers, mit halve vjerijzers ofte drije groeten ende anders gheen ghelt. Mits daer toe oick opleggende ende betaelende de verlopen ende onbetaelde renten die naer beloope des tijts verscheenen ende onbetaelt sullen sijn als den lossinghe geschiet. Ende Neeleman Sijmon Gerijtsz. comparant voern. bekende hem van de hooftsomme deser rente ter somme toe als vooren, al wel voldaan ende in goede getelde penninghen betaelt te weesen, den laetsten penninck mitten eersten. Ende omme dese voersz. renten mit den hooftsomme van dijen wel te funderen ende wel te verseeckeren, soe was hij comparant voern. mits desen hier vooren stellende, verbindende ende ijpotekerende specialicken twee campen landts, bij den hoop sonder maet gelegen in Ghelderswoude inden ambachte van Soeterwoude voersz. Ende heeft belegen ande oostzijde, ant westeijnde, ant noorteijnde Jacop van der Graft ende ande zuijtzijde die Zegwaertse wateringhe. Ende verclaerde hij comparant voern. voer mijn schout ende den buijren voersz. bij eedt als dat dese voersz. twee campen lants sijn vrij gelijck buijerlandt, sonder eenich opstal van renten, wtgesondert ofte eene campe, daerop heeft tgoodshuijs van Soetermeer vijftien stuvers tsiaers. Ende noch dese vjer carolus guldens voersz., sonder meer. Ende voorts generalicken ende specialicken alle hem comparant andere goederen, jegenwoerdige, toecomende, roerende ende onroerende, gheen goeden ofte plaetsen wtgesondert ofte buijten gehouden. All tot bedwanck executie ende verbant van allen sheeren rechten ende rechteren. Daer alsulcx ende aen welcke van sijne comparants goederen den thoonder van desen tot sijne koere gelieven sal te procederen, bij faulte der voersz. betalinghe, tot inninge vande voersz. verlopen renten ende den hooftsomme van dijen. Mit alle die costen ende schaeden daeromme doende ende lijdende, soe wel alst principaele. Hier toe bij desen renunchierende ende te buijten gaende alle seccien, respiten, terminnis juris gratien van heeren, beneficien van rechten, alle privilegiën ende vrijheijden van marken, plaetsen ende parsonen, oick alle exceptie ende weeren van rechten desen contrariërende in eenigher manieren. Ende bijsonder de exceptie verclarende alle generale renunciatiën nul ende van onwaerden, ten zij dat dair speciale vooren gaen. Alle dunck sonder bedroch arch ofte list. Desen toerkonden soe hebbe ick Jan Cornelisz. van Nierop als schout voersz. desen brief doer begheerte ende verlijden vanden voersz. comparant besegelt mit mijnen zegele wthangende hier onder an desen brief gehangen. Daer mede bij, an ende over waren den buijerluijden voern. als getuijgen hier over geroepen ende gebeden. Aldus gedaen upten thienden dach Februarij int jaer ons heeren duijsent vijfhondert drije ende tsestich nae ghemeen scrijven der stede van Leijden.

Inventaris 0502-212

Regest 351 d.d. 17-07-1481.

Wij scout, burgemeesteren ende scepenen der stede van Leijden doen condit allen luijden dat voir ons inden gerechte ghecomen zijn de procurators ende sangmeesteren vanden seven getijden diemen houdt in sinte Pieters kercke binnen Leijden als Dirc van Honthorst, Jacop Thijmansz. ende Aernt Pieter Florijs Asswijnsz. voir hem ende horen nacomelingen vander seven getijden wegen bij consente ende goetduncken vanden gerechte an die een zijde ende Huce van Zwieten ende joncfrou Luytgairt van Bosschuijsen zijn wijf an die ander zijde. Ende belieden dat zij tsamen manlick ende vriendelijck inden eren goede ende tot enen rechten testamente om salicheijt van Huce van Zwieten ende van voirsz. Luytgairt van Bosschuijsen zijn wijf ende hoir beijder ouderen ende vrienden zielen ende in vermeerderinge van goids dienste overgecomen zijn ende vander seven getijden voirsz. wegen angenomen hebben twee singende missen, alle weke te doen singen in sinte Pieters kercke bijden achte cantors ende sangers ende metten coralen vanden voirsz. getijden, in sulker manieren als hier nae volcht ende verclairt staet. Dats te weten dat die procuratoir vanden seven getijden diet nu sijn ende namails wesen sullen inder eren ende waerdicheijt des heiligen waerdigen sacraments ter ewigen dagen durende alle donredages nader priemie vander metten upt hoge altair in sinte Pieters kercke

zullen doen singen een schone ende eerlicke misse vanden heiligen sacrament soe sij dat bequaemste ende eerlicste sullen mogen doen mit dijake ende subdijake alse dat behoirt. Ende sullen alle donredages eens tot der voirsz. misse doen luijden ende onder die voirsz. misse doen beijeren ende oick die voirsz. misse doen spelen opte organe soe swemmelijck als men mach gelijk ende alre mannen als zij dat omtrent dese naiste twee jaren hebben doen doen. Item doen spelen die commenduijer of zijn heren of zij willen dese missen doen ende want dat zijse self in persone niet doen en wouden, soe souden die sang meesteren van sinte Pieters kerck dair enen anderen priester toe setten die vanden sangers inden getijden niet en is. Ende soe wie die misse doet sel hebben vier comans groot ende men sel geven die achte sangers heren mit die dienres die de epistele ende evangelijs singen in die misse elcx ses penningen pajments. Item die vier coralen onder hem vieren tsamen anderhalven groten. Item den organist ander halven groten. Item den beijerman ende blaser tsamen anderhalven groten. Item die twee costers tsamen anderhalven groten. Voort soe sullen die procuratoirs ende sange meesteren vanden seven getijden voirsch. tot ewigen dagen dienende alle manendage nader prieme vander metten inder voirsz. kercke upt hoge altair bijden achte sange heren ende vier coralen doen singen een eerlike ende statige misse van requiem voir die ziele van Willem van Zwieten saliger gedachten, Hugen voirsch. broeder ende oick die zielen van Hugen van Zwieten ende joncfrou Luijtgairt Clais dochter van Bosschuijsen sijn wijf van soe veel als zij elck dair toe doen gelijk ende in alre manieren als zij die selve zielmisse omtrent drie jaren gedaen hebben. Ende want dattet soe gebuerde dat men des manendage onder hoichtijt willen die op dien dach quamen geen requiem houden noch singen en mochte, soe selmen des dijnxdage dair an die misse van requiem houden ende singen, gelijk men die des manendage gehouden soude hebben. Item soe sel die commenduijer of sijn heren of zij willen dese misse doen. Ende want dat zijse selve in persone niet doen en wouden soe sullen die procuratoirs ende sange meesteren dair enen anderen priester toe setten die vanden sangers ende inder getijden niet en is. Ende soe wie die misse doet sel hebben drie comans groot ende men sel geven achte sangeren mitten dienres die die epistele ende evangelie singen inder voirsz. misse, elcx ses penningen pajments, den overcoster vier penningen pajments ende die vier coralen onder hem vieren te samen anderhalve groten. Voort soe sel die priester die de misse gesongen heeft als hij vanden outair gaet hebbende een quaste mit wijwater in sijn hant terstondt mitten achte sangeren ende mitten vier coralen in hoir religie nae elker misse vander voirsz. twee missen gaen ten grave dair Willem van Zwieten in begraven leijt gelegen in sinte Pieters kerck besijdent outair van Zwieten ende aldair samentlick lesen die salmen misterere mei deus ende depfundis mitten colecte voir die zielen dair toe dienende gelijcken zij dat tot desen dage toe gedaen hebben. Ende voir dese voirsch. twee missen ende memorijen nae elker misse tot ewigen dagen te doen als voirsz. is, soe hebben Hugen van Zwieten ende joncfrou Luijtgairt voirsch. den procuratoirs ende sangmeesteren vanden seven getijden voirsch. gegeven ende bewesen sulke goeden als hier nae volgen. Eerst twedalen rinsche gulden tsiairs staende op vijf mergen lants gelegen bij Zwietersluijs ende voort up alle Dirc vander Does goeden, soe den brief dat wtwijst die zij den voirsch. procuratoirs ende sangmeesteren dair of overgegeven hebben. Item noch vijf rinsche gulden tsiairs, staende op die Donct inden ambochten van Voirschoten, soe den scepenen brief die dair of is dat wtwijst die zij mede den voirsch. sangmeesteren overgegeven hebben. Item noch vijf mergen lants gelegen inden ambocht van Soeterwoude in een weer lants van seven mergen die Gerijt Woutersz. nu ter tijt bruijct. Item noch twalef rinsche gulden veertich comans groot voor elken rinsche gulden gerekent tsiairs ewige renten, te betalen alle jair tot Voirschoten ende Valkenburger marcten, welcke renten Hugen van Zwieten ende joncfrou Luijtgairt van Bosschuijden den voirsch. seven getijden versekert ende bewijst hebben, versekeren ende bewijzen mit desen brieve te versien ende te verhalen an alle hoir beijder goeden die zij nu ter tijt hebben of hier namails bevragen mogen roerende ende onroerende wair ende wair an dat die gelegen sijn binnen der stede van Leijden of dair buijten. Behoudelijck soe wanneer dat Hugen van Zwieten ende joncfrou Luijtgairt sijn wijf voirsch. of horen erven den seven getijden twalef rinsche gulden pajments voirsch. tsamen bewijzen an andere goeden zekeren renten, gelegen binnen den mencken van Rijnlant dair zij wel an gehouden sijn, soe sellen Hugen ende joncfrou Luijtgairt voirsch. vanden voirsch. twalef rinsche gulden tsiairs staende op alle hoir goeden dair mede vrij quijt ende ongehouden wesen dan dair voort meer ijet of te betalen. Ende hier toe soe hebben Hugen van Zwieten ende joncfrou Luijtgairt voirsch. elck mit hoir amijten ende alven dair toe behorende. Ende een zwerte woesteijnde casuffel mit twee tunecalen elck mit hoir amijte ende alven dair toe behorende. Ende die procuratoren vanden seven getijden voirsch. geloveden voir hem ende den genen die namaels procuratoirs wesen sullen vander seven getijden voirsch. wegen Hugen van Zwieten ende joncfrou Luijtgairt voirsch. ende horen erven dese voirsch. diensten ende voirwairden volcomelijck in allen horen punten ende elck punt bij sonder te onderhouden ende te voldoen tot ewigen dagen sonder verbreken of dair tegen te doen of te doen doen in eniger manieren. In kennisse der wairheit soe hebben wij desen brieve bezegelt mitter stede zegele van Leijden hier an gehangen.

Ende onder mere sekerhede ende vesticheijt willen der voirsz. voirwairden ende geloften soe hebben wij Dirck van Werve ende Huge Andriesz. desen brieve mede bezegelt mit onsen zegelen hier an gehangen. Int jair ons heren duysent vierhondert een ende tachtich upten seventienden dach in julio. Ende hier of zijn twee brieven dair of dat heeft den seven getijden voirsz. ende Huge van Zwieten mit joncfrou Luijtgairt zijn wijf voirn. de anderen.

Inventaris 0502-269

Regest 427 d.d. 19-06-1500.

Ick Dirck Engebrechtsz. scout inden ambocht van Oestgeest doe condit allen luijden dat voer mij quam Wouter Jansz. ende geliede dat hij vercoft heeft IJsack Aelwijnsz. veertien hont lants bijden hoop sonder maet, gelegen inden ambocht van Oestgeest. Ende heeft belegen an dat westeijnde die Poelstege, an dat oesteijnde Adriaen van der Boechorst erfnamen, an die noortsijde tcapittel vanden Hogelande tot Leijden ende Cornelie Willems weduwe ende an die suijtsijde die kerck tot Oestgeest ende Daniel Pietersz. Ende Wouter Jansz. voersz. lovede IJsack Aelwijnsz. voernt dese voersz. viertien hont lants inder manieren voersz. vrij te waren jair ende dach als recht is ende als men vrij lant ende eijgen erve schuldich is te waren ende allen commer off te doen die daer nu ter tijt upstaet, sonder alsulcken tijns penninck als men tvoersz. lant jairlicx mede vertijnt. Voort soe beliede hem Wouter Jansz. voersz. van desen cope wel voldaan ende betaelt den lesten penninc mitten eersten. Hier waren bij, an ende over als tugen ende buerluijden inden ambocht voersz. alse Willem Bouwensz. ende Dirck Joosten. In kennisse der waerheijt soe hen ick Dirck Engebrechtsz. schout inden ambocht voersz. desen brieve besegelt in tegenwoerdicheijt der tuijgen voornt. mit mijnen zegele hier an gehangen. Int jair ons heren duysent ende vijffhondert upten negentienden dach in junio.

Regest 437 d.d. 06-07-1502.

Ic Heijnrick van Raephorst scout inden ambocht van Catwijck doe condit allen luijden dat voir mij quam Jacob Dircxz. buijrman inden zelven ambocht van Catwijck ende geliede dat hij vercoft heeft IJsack Aelwijnsz. zoon poerter tot Leijden zulcke twee perchelen van landen als hier nae bescreven staen. Eerst die rechte helfte van zes hont lants, gelegen inden ambacht van Catwijck daer die wederhelft of toebehoert Gharbrant van Buijten wonende te Haerlem. Ende heeft belegen an die noortzijde Jacob (...) van Delft, an die zuijtzijde Aernt Jansz., an dat oesteijnde den heerwech ende an dat westeijnde Bouwen die snijder. Welck voersz. lant is gehieten Pieter Hagen weije. Item noch die rechte helfte van vier hont lants gelegen inden ambocht voersz. daer die wederhelft of toebehoert Garbrant van Buijten voersz. Ende heeft belegen an dat oesteijnde den heerwech, an dat westeijnde Jan Gherijtsz., an die noortzijde dat cloester te Reijnsburch ende an die zuijtzijde meester Willem die Ergamst tot Leijden. Ende Jacob Dircxz. voersz. gelovede IJsack Aelwijnsz. voern. dese voersz. helft van zes hont ende vier hont lants vrij te waren jaer ende dach als recht is ende als men vrij lant ende eijgen erve schuldich is te waren gelijck buijrlant inden ambocht voersz. Voert zoe beliede hem Jacob Dircxz. voersz. van desen cope wel voldaan ende betaelt, den lesten penninc mitten eersten. Alle dinck zonder argelist. Hier hebben bij, an ende over geweest als thuijgen ende buijrluijden inden ambocht voersz. Jan Gherijtsz. van der Goude ende Pieter Aernts. In kennisse der waerheijt. Soe heb ic Heijnric van Raephorst scout inden ambocht voersz. desen brieve bezegelt in tegenwoerdicheijt der tuijgen voern. mit mijnen zeghele hier an gehangen. Int jaer ons heeren duysent vijfhondert ende twee upten zesten dach in julio.

Regest 471 d.d. 19-05-1507.

Wij Cornelis Mast ende Dirck van der Boechorst scepenen in Leijden oirkonden dat voir ons quam Fije, Gerijt Vrancken wedewij mit hoers gecorens voechts handt ende geliede dat zij vercoft heeft IJsack Aelwijnsz. acht morgen lants bij den hoep sonder maet, gelegen inden ambocht van Stompjick. Ende heeft belegen an dat noorteijnde die Vliet, an die oestzijde tcloester tot Reijnsburch, an die zuijtzijde Meerburger weteringe ende an die westzijde die kercke van Voircscoten ende tcloester tot Reijnsburch. Ende Fije, Gerijt Vrancken wedewij lovede IJsack Aelwijnsz. voern. dese voersz. acht morgen lants vrije te waren jaer ende dach als recht is ende als men vrij buijer lant schuldich is te waren inden ambocht daer gelegen is. Voirt zoe beliede hoir Fije voern. van desen coepe wel voldaan ende betaelt den lesten penninc mitten eersten. In oirkonden desen brief besegelt mit onsen zegelen. Int jaer ons heren duysent vijfhondert ende seven opten negentienden dach in meije.

Regest 480 d.d. 13-07-1510.

Wij Cornelis Jansz. van Noirde ende Dirck van der Boechorst scepenen in Leijden oirkonden dat voiden gerechte quam IJsack Aelwijnsz. ende gaff over den sangmeesteren vanden Seven Getijden die men houdt in sinte Pieters kerck binnen Leijden als meester Ewout Wel, Pieter Gerijtsz. Goel ende Aernt Jansz. tot den voirsz. Seven Getijden behoeft een scepenen brief van Leijden ende twee schouten brieven, den eenen besegelt mit den segele vanden schout van Oestgeest ende den

anderen mit den segele vanden schout van Catwijck, dair desen brief doirsteken is, mit recht ende mit vonnisse als recht is. Ende scepenen wijsden den sangmeesteren voirsz. ende diet naemaels wesen zullen tot den voirsz. Zeven Getijden behoeff dair mede te winnen ende te verliesen in allen schijn oft IJsack Aelwijnsz. voirn. selver wair. In oirkonden dezen brief bezegelt mit onsen segelen. Int jair ons heren duijsent vijfhondert ende thien upten derthienden dach in julij.

Inventaris 0502-288

Regest 24 d.d. 17-11-1375.

Ic Dirc van den Bosche scout in den ambocht van Zoeterwoude doe kond allen luden dat voir mi quam ende voir Wigger Buser ende Wiggheer Jacobs soen Bus inden ambochte voirsch. Jan Ghijskiaens soen ende gheliede dat hi vercoft heeft Gherijd Heerman viertich scellinghe hollants tsiairs comans pajmente. Te betalen alle jair tot Alreheijligen misse. Te versiene ende staende op vierdalf morghen lants ende op een driedeel van enen helen huijse dair Jan voirseijt nu ter tijt in woent. Welc lant voirsch. gheleghen is inden ambocht voirsch. in Jacob Brouwers weer ende belegghen heeft an die westzide Wouter Aelwijns soens kinder, streckende voir van den weghe afterwairts op an Meerburgher weteringhe. In kenneesse der wairheijt heb ic Dirc van den Bosche scout voirsz. desen brief open beseghelt mid minen seghel int jair ons heren duijsent drie hondert vive ende tseventich tsaterdaghes sinte Maertijns dach inden winter.

Regest 173 d.d. 21-04-1445.

Wij Simon Vredric van Zwieten ende Coen van Oosterwijk scepenen in Leijden oirkonden dat voir gerechte quam Goidscalck Oem ende gaff over den procuratoirs vanden Seven Getijden in sinte Pieters kerck geset bijden gerechte van Leijden, alse Jacop van Sonnevelt, Pieter Dircxz. ende Wermhout Nannensz. totten Getijden behoiff, enen schouten brieff van Zoeterwoude dair dese brieff doirsteken is, mit recht ende mit vonnesse alse recht is. Ende scepenen wijsden die procuratoirs voirsz. of diet namails wesen sullen tottert Getijden behoiff, dair mede te winnen ende te verliesen in allen schijn ijoft Goidscalck Oem selve wair. Welken brieve Goidscalck voirn. gegeven heeft in rechte aelmissen ende testament voir Pieter Heermans ziele ende zijnen ouderen zielen. Ende voirt meer voir alder gheene siele dairt of gecomen is. In oirkonden desen brieve bezegelt mit onsen segelen. Int jair ons heren duijsent vierhondert vijff ende veertich opten een ende twintichsten dach in aprilie.

Inventaris 0502-289

Regest 82 d.d. 24-08-1415.

Ic Dirc vanden Bosch scout inden ambocht van Zoeterwoude doe condit alle luden dat voir mi quam Ghijsbrecht Jans soen ende gheliede dat hi vercoft heeft Phillips Jans soen vanden Bosch twee goude engelsche nobel siairs goet van goude van munte ende zwair genoeg van ghewichte. Te betalen alle jair tot sinte Louweris daghe ghelike erfpenninghe. Te versien ende staende op zeventien margen lands luttel min of meer, ghelegen inden ambocht van Zoeterwoude voirsz. mit alsulker huijsinge ende tijmmeringe als dair nu ter tijt op staen, dair Ghijsbrecht voirsch. nu ter tijt op woent. Ende dese zeventien morgen lands voirsch. lovede Ghijsbrecht voirsch. vrij te waren van allen commer die dair nu ter tijt op staen mach wtgeseyt veertich scellingen siairs pajment die dair nu ter tijt op staen. Ende hi sel dit lant niet arghen, niet delven noch niet barnen. Welc lant voirsz. belegen heeft an die westside Pieter Laghelande ende sijn suster ten weghe toe ende vanden weghe voirt Dirc hoeft ende Lijsbeth Jan Wiggers soens mit horen kinderen ter meer toe, an die oestside die Heilige Gheest van Voirschoten mit erve ende mit eijgen, uter meer op streckende tot Meerburger wateringhe toe. Hier hebben over ende an gheweest als buerlude Louweris Claes soen ende Pieter Evers soen. In kenneesse der wairheijt so heb ic Dirc vanden Bosch scout voirsch. dese brief besegelt mit minen zeghel. Int jair ons heren duijsent vierhondert ende vijftien op sinte Bartholomees dach apostel.

Regest 144 d.d. 15-12-1439.

Jan van Zijl Claesz. ende Jan Dirc Coenensz. scepenen in Leijden oirkonden dat voir gerechte quamen Pieter Jansz. van Bossch, Alijdt Jans dochter mit Heijnric Jansz. horen rechten voicht ende Aechte Jans dochter mit Mees Dircxz. horen rechten voicht ende kenneden ende ghelieden dat Aef Phillips van Bosschen wedewij behouden soude enen brieff dair dese brieff doirsteken is, inhoudende van twee gouden engelsche nobels tsiairs, dat dair Aef horen vrien wille mede doen mach sonder enijch toe seggen van ons of onsen nacomelingen. In oirkonde desen brieff bezegelt mit onsen zegelen. Int jair ons heren duijsent vierhondert negen ende dertich upten vijftiende dach in decembri.

Regest 161 d.d. 05-05-1442.

Wij Gerijt van Oestgeest ende Willem Heerman scepenen in Leijden oirkonden dat voir gerechte quam Ave Phillips van Bosschen wedewij mit hoirs gecorens voichts hant ende gaff over den procuratoirs vanden Seven Getijden in sinte Pieters kerck, alse Jacob van Zonnevelt, Jan vander Graft ende Dirc Coen Gerijtsz. totten Getijden behoiff enen scouten ende enen scepen brieff dair dese brieff

doirsteken is, mit recht ende mit vonnesse alse recht is. Ende scepenen wijsden den procuratoirs voirsz. of die namails procuratoirs wesen sellen mede te winnen ende te verliesen in allen schijn ijoft Ave voirsz. selve wair. In oirkonde desen brieff bezegelt mit onsen zegelen. Int jair ons heren duijsent vierhondert twee ende veertich upten vijften dach in meije.

Inventaris 0502-290

Regest 106 d.d. 23-12-1428.

Wij Jan Heerman ende Willem Bort Dirc Nuweveensz. scepenen in Leijden oirkonden dat voir ons quamen die godshuijs meesters van sinte Pieters kercke te Leijden alse Heijnric Harmansz., Willem Heerman Pietersz., Aelwijn Baerentsz. ende Werbout Nannensz. ende gelieden dat si vercoft hebben van des goedshuijs wegen voirscr. bi consente des bisscop van Vtrecht ende bi rade ende goetduncken des gherechts ende der vroetscap vander prochi, Florijs Paedzensz. sulke renten mitten houde als hier na bescreven staen. Eerst vier pont ende viertien scellingen hollants comans pajment tsiaers mitten houde, staende op een sticke lants dat hout derdalf hont ende twee ende dertich roeden dat Willem Martijnsz. toebehoirt ghelegghen over der Kuepoort. Ende heeft belegen an die een zide Willem voirscr. ende an die ander zide Vranc die vleischouwer, streckende vanden Hoeflaen an Pieter Butewech Willemsz. lant. Item noch vier pont hollants comans pajment tsiaers mitten houde, staende op een stick lants dat hout twee hont veertich roeden ende achte voet dair Vranc die vleischouwer of toebehoirt die tweedeel ende Zibrant Louwensz. dat derdendel. Ende heeft belegen an die een zide Willem Martijnsz. ende an die ander zide Ghibe Cor(nelis), streckende vander Hoeflaen after wairts an Pieter Butewech Willemsz. ende Aernt Jan Godensz. lant. Item noch zeventien scellingen vier pennijngen ende een mite tsiairs mitten houde hollants comans pajment op een geergen lants ende hout twee ende vijftich roeden ende een half voet dat Ghijs Cherij toebehoirt ende is gelegen buten der Kuepoort. Ende heeft belegen an die een zide Zibrant Louwensz. ende an die ander zide Gherit Emmensz., streckende vander Hoeflaen afterwairts an Aernt Jan Godensz. ende Gherit Emmensz. Ende die goedshuijs meesters voirscr. loveden van des goedshuijs wegen voirsz. voldaan ende betaelt den lesten pennijnc mitten eersten. In oirkonde desen brieve bezegelt mit onsen zeglen. Int jair ons heren duijsent vier hondert acht ende twintich tsonredages na sinte Thomas dach.

Inventaris 0502-291

Regest 220 d.d. 06-07-1452.

Wij Gerijt Heerman ende Gerijt Rijswijc scepenen in Leijden oirkonden dat voir ons quamen die procuratoirs vanden Seven Getijden in sinte Pieters kerck tot Leijden alse Willem Heerman, Vop Jansz. ende Wermhout Nannensz. vander Getijden wegen, bij consent vanden gerechte an die een zijde ende Heijnric Heijnricxz. an die ander zijde. Ende bekenden dat zij tsamen een sticke lands leggende hebben buijten der Coepoort inden ambocht van Zoeterwoude anden Hoflaen, houdende omtrent twee hondert gaerden lands dat de Hantbogeschutters Doelen nu lest geweest is. Welc landt voirsz. die procuratoirs ende Heijnric voirsz. belieden dat zij dat van malkander gescheijden ende gedeelt hebben inder manieren hier nae volgende. Dats te weten dat zij doir dit voirsz. lant te rechte mit wegen, een heijninghe gesteken ende geslegen hebben. Des soe is den Zeven Getijden voirsz. te deel gevallen die helfte vanden voirsz. lande ende is die zuijtzijde, dat die voirsz. procuratoirs te poortrechte wt gegeven hebben Jan van Schoeten ende Pieter Aelbrechtsz. die dat nu ter tijt gebruijcken. Ende die ander helft vanden voirsz. lande ende is die noortzijde, is Heijnric voirsz. te deel gevallen, die dat selver nu ter tijt gebruuft. Ende dit voirsz. geheel lant heeft belegen an die noortzijde Jan Gerijtsz. ende an die zuijtzijde Aelwijn die verwer, streckende voir vanden Hoflaen after tot in die graft. Ende mit deser scheijdinge gelieden die procuratoirs voirsz. voir hem ende horen nacomelingen van der Getijden wegen voirsz. ende Heinric Heijnricxz. voir hem ende sijne nacomelingen, te vreden wesen ende dat sij tot ewigen dagen gescheijden sullen bliven sonder die een den anderen op zijn deel enich toe seggen, eigendom of rechte dair an te hebben. Deser brieve zijn twee alliens daer of dat hebben die Seven Getijden voirsz. die een ende Heijnric voirn. die ander. In oirkonden desen brieve besegelt mit onsen zegelen. Int jair ons heren duijsent vierhondert twee ende vijftich opten sesten dach in julio.

Inventaris 0502-292

Regest 229 d.d. 13-04-1454.

Wij Sijmon Paedze Pietersz. ende Willem Vos Jansz. scepenen in Leijden oirkonden dat voir ons quam Danel Willem Florijsz. ende geliede dat hij vercoft heeft die seven getijden meesteren in sinte Pieters kerck alse Jacop van Noorde, Wermhout Nannensz. ende Jan Aelwijnsz. totter Seven Getijden voirsz. behoiff, drie morgen lands luttel mijn of meer gelegen inden ambocht van Soeterwoude inde polre dair Bosschuijsen in staet. Ende heeft belegen aen dat oesteijnde sinte Katrijnen gasthuijs, aen

die suijsijde dat cloester van Leijderdorp, aen dat westeijnde Katrijn Willem Florijsz. wedewij ende aen die noortsijde Willem van Leewen. Ende Danel voirsz. ende Louwerijs Jacopsz. loveden mit gesamender hant ende elcx voir al die seven getijde meesteren voirsz. of diet namails wesen sullen totter voirsz. Getijden behoiff dit voirsz. lant vrij te waren jair ende dach alse recht is ende alsmen vrij lant ende eijgen erve sculdich is te waren. Ende Danel voirsz. lovede Louwerijs voirn. hier of schadelois te houden. Voirt soe beliede hem Danel voirsz. hier of wel voldaan ende betailt, den lesten pennijn mitten eersten. In oirkonden desen brieve besegelt mit onsen zegelen. Int jair ons heren duijssent vierhondert vier ende vijftich opten dertiensten dach in aprille.

Inventaris 0502-293

Regest 292 d.d. 19-02-1467.

Wij Huce Spruijt ende Jan Aernt Pouwelsz. scepenen in Leijden oirkonden dat voir quamen Dirc vander Does ende Mouwerijn van der Does zijn zoen ende gelieden dat zij samenliken vercoft hebben Gerijt Jacop Gerijtsz. tiendalven gouden rijsche gulden, veertich comans groot voordien rijsche gulden, tsiaers ewige renten. Te betalen alle jair tot sinte Pieters dage ad Cathedram. Te versien ende staende op vier morgen lants mit die rietzude ende wterdijck dair toe behorende die Dirck voirsz. leggende heeft inden ambocht van Zoeterwoude ende Jan van Leijden plegen toe te behoren. Ende heeft belegen an die oestzijde heer Pieter Post priester mit zijn even knijen ende an die westzijde Danel Willemsz., streckende voir vten Rijn after anden Hogen dijk. Ende wairt dat dit voirsz. lant niet goet genouch en wair dese voirsz. renten dair an te verhalen, soe selmen die voirsz. renten dan voir versien ende verhalen op alle die goeden die Dirc ende Mouwerijn voirsz. nu ter tijt hebben of hier namails vercrigen mogen, roerende ende onroerende, wair ende wair an dat die gelegen zijn, binnen der stede van Leijden of daer buijten. Ende Dirc van der Does ende Mouwerijn van der Does voirsz. loveden mit gesamender hant ende elcx voir all Gerijt Jacop Gerijtsz. dese voirsz. tiendalven gouden rijsche gulden tsiaers vrij te waren jair ende dach alse recht is ende alsmen vrij renten op eijgen lant ende op eijgen rietzude ende wterdijcken sculdich is te waren. Ende Dirck van der Does voirsz. lovede Mouwerijn voirn. hier of schadelois te houden. Voirt soe belieden Dirck ende Mouwerijn voirsz. hier of wel voldaan ende betailt, den lesten pennijn mitten eersten. In oirkonden desen brieve bezegelt mit onsen zegelen. Int jair ons heren duijssent vierhondert seven ende tsestich opten negentienden dach in februario.

Regest 329 d.d. 29-07-1474.

Wij Coen van Oesterwijck ende Jan Aernt Pouwelsz. scepenen in Leijden oirkonden dat voir gerechte quam Gerijt Jacop Gerijtsz. ende gaf over Huce van Zwieten enen scepenen brief daer dese brief doersteken is mit recht ende mit vonnesse alse recht is. Ende scepenen wijsden Huce van Zwieten voirsz. daer mede te winnen ende te verliesen in allen schijn oft Gerijt Jacopsz. voirn. selve wair. Ende wairt sake dat die renten inden principael brief begrepen bij Gerijt voirsz. ijet becommert, belast of bezwaert waren boven dat inhouden vanden voirsz. principael brieve daer dese brief doersteken is, dat gelovede Gerijt Jacopsz. voirsz. Huce van Zwieten voirn. tot alre tijt of te doen ende hem dat up te rechten ende te beteren. In oirkonden desen brieve besegelt mit onsen zegelen. Int jair ons heren duijssent vierhondert vier ende tseventich upten negen ende twintichsten dach in julio.

Regest 343 d.d. 20-02-1479.

Wij Pieter die Grebber ende Adriaen van der Does scepenen in Leijden oirkonden dat voir ons quam Willem Jansz. tot Voirschoten ende geliede dat hij voir hem, zijnen erven ende nacomelingen van Huce van Zwieten an genomen heeft in eenen erfpachte vijftalf morgen lants gelegen inden ambocht van Voirschoten ende is gehieten die Dont om vijff gouden rijsche gulden, veertich comans groot voordien rijsche gulden gerekent, tsiaers ewige ende erflike renten, vrij gelts sonder enige cortinge off offbreck om wat saken dattet is. Te betalen alle jair tot Voirschoten ende Valkenburger marcten dair of dat eerste jair verschijnen sel tot Voirschoten ende Valkenburger marcten in dit tegenwoordige jair van negen ende tseventich naestcomende. Ende wairt sake dat Willem Jansz., zijn erven ende nacomelingen dese voirsz. erfpacht Huce van Zwieten, zijnen erven ende nacomelingen die verschenen waren tot Voirschoten ende Valkenburger marcten niet en betailde voir sinte Odulfo dage int jair dair an volgende, soe sel dese voirsz. erfpacht of doot ende te niet wesen ende Huce van Zwieten, zijn erven ende nacomelingen sullen dese voirsz. vijftalf morgen lants vrij weder an vaten gelijk hoir vrij eijgen lant sonder enich toesegeen of weer van rechte, tsij geestelic off wairlic van Willem Jansz. voirsz., zijn erven ende nacomelingen dair tiegen te doen of te doen doen in eniger manieren. Welke voirsz. vijftalf morgen lants gelegen in die Dont belegen heeft, an dat zuijteijnde die ban weteringe, an dat westeijnde Jan van Berendrecht Gerijt Jansz., an dat noerteijnde Jan Gerijtsz. van Berendrecht voirsz. ende Heijnric Pouwelsz. ende an dat oesteijnde sinte Katrijnen gasthuijs tot Leijden. In oirkonden desen brieve besegelt mit onsen zegelen. Int jair ons heren duijssent vierhondert negen ende tseventich opten twintichsten dach in februario.

Regest 352 d.d. 23-07-1481.

Wij Gerijt Claesz. die Vroede ende Dirc van Werve scepenen in Leijden oirkonden dat voir gherechte quamen Huce van Zwieten ende joncfrou Luijtgairt Claes dochter van Bosschuijden zijn wijf ende gaven samenlicken over die procuratoirs vanden Seven Getijden in sinte Pieters kerck tot Leijden alse Dirc van Honthorst, Jacop Thijmansz. ende Arent Pieter Florijs Asselijnsz. ende diet namails wesen zullen totte Seven Getijden voirsz. behoef, drie scepenen brieven dair desen brief doirsteken is, mit recht ende mit vonnisse alse recht is. Ende scepenen wijsden die procuratoirs voirsz. ende diet namails wesen zullen totter voirsz. Seven getijden behoef mede te winnen ende te verliesen in allen schijn oft Huce van Zwieten ende joncfrou Luijtgairt voirsz. selve waren. Welke brieven ende goeden inden voirsch. brieve begrepen Huce van Zwieten ende joncfrou Luijtgairt zijn wijf voirsz. den Seven Getijden voirn. gegeven hebben ende bewesen voir des heijlich sacraments misse ende voir die misse van Requiem die de voirsch. Seven getijden aengenomen hebben te doen nae inhoud der brieven die dair of zijn bezegelt mitter stede zegel ende mit twee scepenen zegelen van Leijden dair in dat dese voirsz. goeden mit andere goeden genoemt gescreven ende betiejckent zijn. In oirkonden desen brieve bezegelt mit onsen zegelen. Int jair ons heren duijsent vier hondert een ende tachtich upten drie ende twintichsten dach in julio.

.....
Inventaris 0502-294

Regest 310 d.d. 05-03-1470.

Ick Dirck van Bossch Pieters zoon scout inden ambocht van Zoeterwoude doe condit alle luijden dat voer mijn quam Pieter Willemsz. ende geliede dat hij vercoft heeft Huce van Zwieten een half mergen lands gelegen inden ambocht van Zoeterwoude gemengeder vuer ende gemengeder aerde in een weer lands van seven morgen mit Huce van Zwieten selve ende Gerijt Zijbrantsz. Welck weer lands belegen heeft an die suijtsijde Griet Gerijt die Bijters wedewij ende an die noortsijde Pieter Jansz., Jan Pieter Clarensz., streckende wt die Zwet tot an Jacob Heijnricxz. de Bruijn ende Pieter Willemsz. voirsch. hoer lant. Ende Pieter Willemsz. voirsch. lovede voer hem ende sijnen erven Huce van Zwieten voirn. hem ende sijnen erven, dit voirsch. lant vrij te waren jair ende dach alse recht is als men vrij lant ende eijgen erve sculdich is te waren. Ende Pieter Willemsz. voirn. geliede hem van dese voirsch. coop vanden lande wel voldaan ende betaelt, den lesten penninck mitten eersten. In kennesse der waarheit so heb ic Dirck van Bossch als scout voirsch. desen brief besegelt mit mijnen segel hier an gehangen. Int Jaer ons heren duijsent vierhondert ende tseventich upten vijften dach in mairte.

.....
Inventaris 0502-295

Regest 433 d.d. 20-04-1501.

Regest 313 niet aanwezig.

Ick Huijge Huijgensz. van Zwieten scout inden ambocht van Zoeterwoude doe condit allen luijden dat voir mij quam Pieter Dircxz. ende geliede dat hij vercoft heeft die seven getijde meesters van sinte Pieters kercke binnen Leijden alze Aernt Heerman, meester Clais vander Gheest doctoer in medecijnen ende meester Ewout Well totten Seven Getijden behoef, twee pondt hollants comans pajments tsairs ewijgen ende erflijcke renten nae vuytwijsinge den principalen scoutenbrief dair desen brieve doirgestoken is. Ende waert sake dat dese voirsch. renten iet becommert, belast of bezwaert waren boven tinhouden van den principalen scoutenbrief voirsch., dat gelovede Pieter Dircxz. voirsch. ende Jacop Heerman mit gesamender handt ende elcx een voir alle den selven ghetijde meesters diet nu sijn off diet namails wesen sullen tot alre tijt af te doen, op te rechten ende te beteren. Ende dat sellen die seven ghetijde meesters inder tijt wesende alsdan mogen versien ende verhalen an alle die goeden die Pieter ende Jacop voirsch. samentlijck off elcx van hem bijsunder nu ter tijt hebben of hier namaels vercrijgen mogen, zij sijn roerende off onroerende wair ende wair an dat die geleden sijn oft bevonden moge werden. Ende Pieter Dircxz. lovede Jacop Heerman voirn. hier of scadeloes te houden. Hier waren an ende over alse tuijgen Thijeman Jacopsz. ende Jacop Pietersz. In kennisse der waarheit so hebbe ick Huijge van Zwieten scout voirsch. mijn zegel in tegenwoordicheijt der tuijgen voirn. an desen brief gehangen. Int jair ons heren duijsent vijf hondert ende een upten twijntichsten dach in aprilie.

.....
Inventaris 0502-296

Regest 332 d.d. 16-01-1476.

Wij Jan van Tetroede ende Dirck Wouter Danelsz. scepenen in Leijden oirkonden dat voir ons quamen die kerkmeesteren van sinte Pieters kerck tot Leijden alse Jacop Vinck, Jan Aernt Pouwelsz., Jacop Coop ende Claes Hugensz. bij consent vanden gerechte van Leijden ende gelieden dat sij vander voirsch. kercke wegen vercoft hebben die seven getijden meesteren van sinte Pieters kerck tot Leijden alse Nanne Paidze, Jan van der Laen ende Jacop Dirc Tijemansz. tot den Seven Getijden voirsch.

behouf, sulke twee perchelen van landen als hier na volgen ende beschreven staen. Item eerst derdalven morgen lants gelegen in een weer lants van twintich morgen ende zijn gelegen inden ambochten van Zoeterwoude ende Hazertswoude gemeen mit heer Florijs Vranckensz., heer Claes van Zijl ende Danel Willemsz. Ende heeft belegen an die westzijde Hüge van Zwieten ende an die oestzijde Adriaen van Poelgeest, streckende wten Rijn after an die kae. Item noch die helft van twee morgen lants gelegen inden ambocht van Zoeterwoude gemeen mit die Seven Getijden voirn. ende is der voirsz. kercke aen gecomen van Machtelt Jacop Jansz. Ende die kerckmeesteren voirsz. voir hem ende voordien ghenen die namails kerckmeesteren wesen sellen loveden vanden voirsz. kercke wegen die seven getijden meesteren voirn. ende diet namails wesen sullen tot den Seven Getijden voirsz. behoef die voirsz. landen inder manieren voirsz. vrij te waren jair ende dach alsoe recht is ende als men vrij lant ende eijgen erven schuldich is te waren geliken buijer lant inden ambocht dairt gelegen is. Ende hier of belieden hem die kerckmeesteren voirsz. tot den voirsz. kercke behoiff wel voldaan ende betaelt, den lesten pennijnc mitten eersten. In oirkonden desen brieve besegelt mit onsen segelen. Int jair ons heren duijssent vier hondert sesende tseventich upten sestienden dach in Januario.

Inventaris 0502-297

Regest 337 d.d. 24-08-1477.

Wij ministra ende gemeen convent der susteren van sinte Ursulen huse binnen Schiedam vander derden oirden doen condit allen luijden mit desen brief dat wij vercoft hebben den gemenen convent der susteren tot sinte Margrieten op Rodenburch buijten Leijden vanden selver oirden voirsz. seven morgen lants luttel min off meer bijden hoop sonder maete, gelegen inden ambocht van Zoeterwoude, streckende wt Meerburger weteringe after an Mees Hovensz. huijsweer. Ende heeft belegen an die zijdtoestzijde die erfgenamen van mijn heer van Alkemade, an die noortoestzijde sinte Katrinen gasthuijs. Ende wij ministra ende gemeen convent voirsz. geloven den convent van sinte Margrieten voirsz. dit voirsz. lant vrij te waren jair ende dach alst recht is ende als men vrij lant ende eijghen erve sculdich is te waren inden ambocht dairt gelegen is. Ende van desen coope voirsz. belien wij ons voldaan ende wel betaelt, den lesten penninck mitten eersten. In kennissen der wairheijt soe hebben wij onsen convents zegel hier an gehangen. Int jair ons heren duijssent vier hondert seven ende twintich den vier ende twintichsten dach in agusto.

Inventaris 0502-298

Regest 377 d.d. 07-04-1489.

Ic Hüge Hugensz. van Zwieten scout inden ambocht van Zoeterwoude doen condit allen luijden dat voir mij quam Jan IJsbrantsz. ende bekende dat hij in erfpacht ten rechten poortrechte an genomen heeft vanden seven getijde meesteren van sinte Pieters prochie binnen Leijden alsoe meester Phillips Bertelmeesz. doctoir in medecinen, Ghijsbrecht Jan Wittgensz. ende Cornelis Jansz. drie morgen lants luttel mijn off meer bij den hoop sonder maet, gelegen inden ambocht van Zoeterwoude. Ende heeft belegen an die zuijtzijde die broederen van Leijderdorp, an dat weesteijnde Willem Aerntsz., an die noortsijde Clais van Leeuwen ende an dat oesteijnde sinte Katrijnen gasthuijs, om seven pont comans pajments tsairs ewige ende erflike renten. Te betalen alle jair tot Voirschoten ende Valkenburger marcten dair of dat eerste jair erfpachts verschijnen sel tot Voirschoten ende Valkenburger marcten naistcomende ende soe voirt van jaren te jaren tot Voirschoten ende Valkenburger marcten dair naistcomende, dese voirsz. erfpacht te betalen durende tot ewigen dagen. Te versien ende te verhalen an die voirsz. drie morgen lants ende voirt te versien ende te verhalen an een stücke lants van negen morgen bijden hoop sonder maet, gelegen inden ambocht voirsz. Ende heeft belegen an die weestsijde Pieter Jansz., an die oestzijde Zijburch Claes Dircxz. weduwe, an tnoorteijnde Voirschotenre vliet ende an dat zuijteijnde Meerburger weteringe. Ende noch te verhalen an alle die goeden die Jan voirsz. nu ter tijt heeft of hier namaels vercrijgen mach, roerende ende onroerende, wair ende wair an dat die gelegen sijn, binnen steden, dorpen of dair buijten. Des sijn voirwairden dat die Seven Getijden voirsz. dese voirsz. renten ende erfpacht indien die niet betaelt en worden ten dage voirsz., mogen inwinnen mit recht ende versien ende verhalen alsoe wel an die vruchten die op beide die voirsz. perchelen van landen staen, als an die beesten die die seven getijden meesteren inder tijt wesende, up beide die voirsz. perchelen van landen bevinden sullen gelikerwijs of dese renten lanthuijer binnen tsairs wair. Des soe gelovede Jan IJsbrantsz. voirsz. voir hem, sijnen erven ende nacomelingen hem hier jegens niet te verweren ofte doen verweren mit enige rechten, geestelic of wairlick ofte mit enige anderen nuwe vonden diemen hier tegens soude mogen dencken, peijnsen, vinden off vizieren, in eniger manieren. Alle dinck sonder argelist. Ende hier hebben bij, an ende over geweest als tugen Clais Claisz. ende Jan Pouwelsz. In kennisse der wairheijt soe heb ic Hüge Hugensz. van Zwieten scout inden ambocht voirsz. desen brieve in tegenwoirdicheijt

der tugen voirn. bezegelt mit mijnen zegel hier an gehangen. Int jair ons heren duijsent vierhondert negen ende tachtich upten sevenden dach in aprile.

.....
Inventaris 0502-299

Regest 484 d.d. 09-01-1513.

Regest 380 niet aanwezig.

Ick Ghijsbrecht van Zwijeten ambochts heer ende scout inden ambocht van Zoeterwoude doe kondt allen luijden dat voir mi quam Cornelis Dirc Huijghesz. mit sijn drie kinderen als Willem Cornelisz., Koenraet Cornelisz. ende Alijt Cornelis dochter ende gheliede dat sij mit ghesamender hant vercoft hebben die seven ghetijde meesteres van sinte Pieters kerck tot die Seven Getide behoef, als meester Ewout Welle, Pieter Gherijt Goelensz. ende Volpert Roelofsz. vijftalf morghen lants biden hoop sonder maet na wtwisinghe den ouden brief die neghen morghen begrepen heeft ende dair dese voirsz. vijftalf morgen die ene helft of is van die neghen morghen dair dese brief op doirsteken is. Welcke vijftalf morghen lants gheleghen is inden ambocht van Zoeterwoude inden ban van Stompick. Ende heeft nu ter tijt beleggen an die suijtwestside Hubrecht Heijnricxz., an die noortoostside Huijghe Gherijtsz., streckende van die heerwech tot an Stompiker wech toe. Ende Cornelis Dirc Huijghesz. mit de drie kinderen (gat in het papier) gheloveden mit ghesamender hant ende elcx voir al die seven ghetijde meesters voirnoemt, diet nu sijn of namaels worden sellen dit voirsz. lant te waren jair ende dach als recht is ghelike buer lant, wtgeleit vijftien stuvers tsiairs die die Seven Ghetiden voirsz. dair op hebben ende sijn ewijghe ende erflike renten. Ende wairt dat die seven ghetijde meesters diet nu sijn of namaels worden sellen, meer hinder of scade quaem dan voirsz. is, dat soude si moeghen verhalen an alle Cornelis Dircxz. of sinen kinderen voirsz. hoir goeden die si nu hebben of hier nae vercrigen soude moeghen. Ende van desen cope so belieden hem Cornelis Dirc Huijghesz. mit sijn kinderen voirsz. van die seven ghetide meesters voirnoemt al voldaan ende wel betaelt te wesen, den lesten penninc mitten eersten. Alle dinc sonder arch of list. Hier bi hebben an ende over gheweest als tuijghen Jacob Leeuwe Pieter Pietersz. ende Ewout Jansz. Ende in kennisse der wairheit so heb ick Ghisbrecht van Zwijeten ambochts heer ende scout voirsz. minen zeghel hier an ghehanghen. Int jair ons heren duijsent vijf hondert ende derthien opten neghenden dach in januario.

Aan de achterzijde: De vijftien stuvers siaers int blanck aen desen begrepen zijn bij consente van mijn heren vanden gerechte der stede van Leijden gelost ende afgecoft bij Bosch Cornelisz. van Stompwijck ende dat bij handen van Jan van Dompseleer procureur postulant voordien Hove van Hollant in 's-Hage upten 24^e septembris 1500 twee ende vijftich

.....
Inventaris 0502-300

Regest 392 d.d. 10-08-1492.

Ic Hüge Hugén zoon van Zwieten schout inden ambocht van Zoeterwoude doen condit allen luijden dat voir mij quam Aernt die bastaert van IJselsteijn ridder ende geliede dat hij vercoft heeft Jacob van Busschuijsen tot behoef die Seven Getijden van sinte Pieters kerke tot Leijden vijff morgen landts, bijden hoop sonder maet ende is gehieten een Rietsudze zoe groot ende cleijn alse heren Aernt voirsz. die voortijts gecoft heeft van Foije van der Does, gelegen inden ambacht van Zoeterwoude voirsz. Ende heeft belegen andie noortzijde den Rijn en dat oostelijnde Dirck van Delff mit Jacob van Noorde ende meester Salomon Vranckensz. priester gemengender vuer, andie zuijtzijde den Rijndijck ende aen dat westelijnde die Regulieren tot Leijderdorp. Ende heren Aernt van IJselsteijn voirsz. ende Foije van der Does geloveden mit gesamender hant elcx voir al Jacob van Busschuijsen tot behoef die Seven Ghetijden in sinte Pieters kerck voirn. dese voirsz. riedsudze van vijf morgen landts bij den hoop sonder maet inder manieren voirsz. te waren jair ende dach alse recht is ende allen commer off te doen die dair nu ter tijt op staet sonder thiendalven rijnsche gulden veertich comans groot voir den rijnsche gulden gherekent die de voirsz. Seven Getijden jairlicx selver dair up hebben. Ende heeren Aernt voirsz. lovede Foije voirn. hier off schadeloes te houden. Voirt zoe beliede hem heeren Aernt voirsz. van Jacob van Busschuijden voirn. wel voldaan ende betaelt den lesten penninc mitten eersten. Ende hier hebben bij, aen ende over geweest als buijrluijden ende tuijchen inden ambocht voirsz. Phillips Meesz. ende Joest Hugesz. In kennissen der wairheit soe hebbe ick Hüge Hugén zoen van Zwieten schout inden ambocht voirsz. desen brieve in tegenwoirdigheit der tuijgen voirn bezegelt mit mijnen zegel. Int jair ons heren duijsent vierhondert twee ende tnegentich upten thienden dach in augusto.

.....
Inventaris 0502-301

Regest 521 d.d. 06-10-1520.

Wij Wermhout Pietersz. ende IJsaack Claesz. scepenen in Leijden oerconden ende kennen dat wij up huijden datum van dezen indier stede kenning boeck van Leijden gescreven ende geregistreert

bevonden hebben twee dingtalen metten vonnisse daer up gewezen tusschen die zeven getijden meesteren van sinte Pieters kercke als eijsschers ter eenre ende Aelbaren van Noerde gematich van die weduwe van Jacop van Bosschuijsen als verwere ter andere zijden, luidende van woerde te woerde gelijk hier nae volcht ende beschreven staet. Die zeven getijde meesteren van sinte Pieters kerck id hoer dingtael jegens Aelbaren van Noerde als gemachticht van die weduwe van Jacop van Bosschuijsen saliger gedachten als boelhoutster ende die eijsschers voersz., seggende dat zij die verweerster te recht hebben doen dagen ende beclagen als dat zij schuldich zel wezen te bewijzen ende te leveren alsulcke acht morgen landts leggende inden ambocht van Zoeterwoude, gelijk Jacop van Bosschuijsen die zeven getijden meesteren vercoft heeft tot behoef vanden Zeven Getijden voersz. Ende dat nae vuytwijsinge een scepenbrief als Jacop van Bosschuijsen voern. die getijde meesteren tot behoef vanden Zeven Getijden voersz. getransporteert heeft of duijsent rinsche gulden daer voer te geven, etc. Ten anderen zeggende die eijsschers voersz. als dat zij zullen bewijzen ende betugen mit gescrijfte ende mit getugenisse der waerheijt als recht is dat Jacop van Bosschuijsen voern zekere somme van penningen ontfangen heeft vanden zeven getijde meesteren in dier tijt wezende van den voersz. landen. Ende die voersz. eijsschers seggen indien zij bewijzen ende betugen al tgene dat voersz. staet dat die verweerster schuldich sal wezen te voldoen ende te leveren den eijssche die de voersz. eijsschers eijsschende zijn. ende zeggende dat dit recht is des zij begeven vomnisse van scepenen ende eerst hier op gehoert te wezen mit heren getugenisse ende bescheijdt. Aelbaren van Noerde gemachtich van jouffrou Alijt Jan Heermans dochter weduwe van wijlen Jacop van Bosschuijsen pre memorie is zijn dingtael jegens die zeven getijden meesteren van sinte Pieters kerck binnen Leijden ende zeijt dat deijsschers die verweerster mit onrecht hebben doen dagen ende beclagen om leveringe van acht morgen lants of duijsent rinsche gulden daer voer die deijsschers zeggen dat Jacop van Bosschuijsen hem vercoft zoude hebben. Antwoert die verweerster ende ontkent geheel ende alle want deijsschers nijmmermeer bewijzen en zullen als recht is datten zij in coop ande brieven van tvoersz. lant gecomen zijn mer is waer dat Jacop van Bosschuijsen een brief van lant getransporteert was van mijn vrou van Dorp zijn zuster mede te winnen ende te verliesen of zijt zelf waer, etc. Mer mijn vrou van Dorp en heeft noijt eigendom noch possessie van tzelve lant gehadt noch Jacop van Bosschuijsen. Mede noch en hebben nije huijer daer of ontfangen, noch die seven getijden meesters des gelijcx. Concludeert die verweerster dat deijsschers nijmmermeer bewijzen en sullen als recht is dat Jacop van Bosschuijsen enige penningen van tvoersz. lant ontfangen heeft. Ende alsoe die eijsschers den boel van Jacop van Bosschuijsen niet mit recht toe gesproken en hebben binnen een jaer ende zes weecken nae die dode de boere geruijmt is dat sij vrij ende quijt wesen sal van des eijsschers eijssche ende ansprake naden rechte ende huere vander stede van Leijden. Des zij begeert vonnisse van scepenen up haer meer seggen ende eerst hier op gehoert te wezen. Aldus zoe wijsen scepenen alsoe Jacop van Bosschuijsen voertijts vercoft heeft die seven getijde meesteren van sinte Pieters kercke tot behoef vanden zelve Getijden achte morgen lants, gelegen inden ambochte van Zoeterwoude blijckende bij scepenen brieven van Leijden. Ende scepenen claerlicken gebleken. Is bij toegifte vanden voersz. Seven Getijden ende oeck bij doechdelicke tugen dat Jacop van Bosschuijsen voersz. die penningen daerof ontfangen heeft, dat die voersz. weduwe als boelhoutster schuldich sal wezen die voerseijde getijde meesteren tot die voern. Getijden behoef te leveren sulcke acht morgen lants als Jacop voersz. die voersz. Getijden voertijts vercoft heeft ofte den getijde meesteren mit penningen daer of te vernoegen ter scepenen ofter bureu scattinge end egeven die seven getijde meesteren inden name vanden Seven Getijden die kenning gewonnen ende Aelbaren van Noerden inden name soe hij procedeert verloren. Actum vier ende twintich dagen in julio anno 1500 ende vierthien. Ende want godlick ende verdienstelick is in allen rechtvaerdigen saecken der waerheijt getuijchenisse te geven als men des versocht wordt. Zoe hebben wij scepenen voersz. des versocht zijnde dezen brief besegelt mit onzen zegelen hier op gedruet. Int jaer ons heren duijsent vijfhondert ende twintich upten zesten dach in octobri.

Was getekend: (G.) Florijsz.

Volgen nog ettelijke brieven, attestaties e.d., te veel om hier over te nemen.

Regest 525 d.d. 05-02-1521.

Upten dach van huijden compareerden voordien Hove van Hollandt Dirck van Waveren als procureur van die getijde meesteren van sinte Pieters kercke binnen Leijden impetranten, omme executie gedecerneert te hebben up tvonnisse van Leijden. Die hadden doen presentereb up ende jegens Jan van Boschuijsen cum socijs gedaichden te repliceren ende zeggen jegens die conclusie bijden zelve gedaichde genomen upten 10^e decembris anno 1521. Ende bij sekere middelen concludeerde ten fijne van nijet ontfanckelijck in reformacie. Ende voirts tot approbacie van tvonnisse daer questie omme is ende dat het zelfde zijn executie hebben sal ten minsten bij provisie up cautie. Maeckende eijsch van costen. Off tot anderen alsulcken fijnen ende conclusien als tvoirsz. Hoff bevinden sal den voirsz. impetranten oirboirlijcxst te wesen. Omme waer tegens te zeggen Florijs van Boschuijsen als

procureur vanden voirsz. gedaechden dach genomen heeft tacht dagen naestcomende. Gedaen inden Hage upten 5^e dach van Februario anno 1500 ende 21 stilo curie. Bij meesters Jasper Lievensz. ende Joost Sasbout raidsluijden als commissarissen bijden voorsz. Hove daer toe geordonneert. In kennisse van mij (Santhorst?).

Regest ... d.d. 23-02-1521.

Upten drie ende twintichsten dach in februario anno vijftienhondert een ende twintich soe compareerde voordien gerechte der stede van Leijden die seven getijden meesteren van sinte Pieter kercke binnen Leijden als Jacop Cornelisz. ende Jan Jansz. van Middelburch inden name vanden zelve Getijden ter eenre ende Jan van Bosschuijsen voer hem zelve ende inden name van jouffrou Lijsbeth van Bosschuijsen zijn zuster ter ander zijden. Ende die voorsz. seven getijden meesteren bekenden dat zij bij rade ende guetduncken vanden burgermeesteren der voern. stede ende Jan van Bosschuijsen inden name zoe hij procedeeert, hoer questie ende geschille die sij jegens malcander vuytstaende hebben vuyt sake van acht mergen lants die Jacop van Bosschuijsen die voorsz. Zange mit scepene brieve over gegeven heeft, etc. gebleven zijn int zeggen ende ende verclaringe van eersamen ende wijsen heren. Te weten van wegen der voorsz. getijde meesteren an meesters Pieter Duijst ende Pieter Dircxz. pater vanden convente van Apcoude licentaten inden rechten. Ende van wegen Jan van Bosschuijsen inden name zoe hij procedeeert an broeder Jan Blenckvliet prior ende pater vanden Witte Nonnen die men hiet Jacopnissen ende meester Jan van Adrichem oeck licentaet inden rechten. Welcke zegsluijden een overman kiezen mogen indien zij hem behoeven. Welck gebliff die voorsz. pertijen gedaen ende gebleven hebben op een peijne van twintich philippus guldens te verbueren zoe wije van hem beijden niet en onder hilde sulcken zeggen ende vuytsprake als die voorsz. segsluijden of tmeerendeel van hemluijden seggen zullen, behoudelick dat die gene die tvoorsz. zeggen niet en onderhilde bijder voorsz. vuytspraecke niet vorden bezwaert en sal sijn dan in die voorsz. twintich philippus guldens ende dat hij zoe vrij ende onbelast sel staen up zijn eerste recht als hij stonde eer ende voordien tijt dat hij in dit gewijss geconsenteert ende hem verbonden heeft. Ende sonder die zelve vuytspraecke te trecken in consequentie, noch tot voordeele van die een pertije ende tot achterdeel van die ander pertije, mer sel wesen ende blijven nul negeen ende van onwaarden. In alle schijn of die noeijt geschiet noch vuyt gesproken en waer. Ten waer dat beijde die pertijen die voorsz. vuytsprake geliefden te acseptereren ende daer inne consenteerden. In dat geval zel die voorsz. vuytsprake van waerden wezen ende blijven ten ewijghen dagen. Ende op die condicie ende voerwaarden soe hebben die voorsz. seven getijden meesteren voert beloeft dat zij hem voer desen tijt niet behelpen en zullen voorde voorsz. zegsluijden zulcken vonnisse als zij voortijts tot voordele vanden zelve Getijden in dezer zaecke van scepenen van Leijden vercregen hebben ende anders niet. Al welck geschiet is upten dach ende int jaer als voren daer ic bij was.

Was getekend: (G.) Florijsz.

Regest 526 d.d. 16-03-1521.

Upten sestienden dach in maerte anno vijftienhondert een ende twintich zijn die pertien in die ander zijde deser acte genoemt in presentie vanden burgermeesteren geaccordeert ende hebben over gegeven an beijden zijden dat zulcke twintich philippus gulden ofte pande dier waerde als elck van hem beloeft heeft te stellen tot een peijne ende onderpant, zijluijden nampteze..en zullen onder hoerluijder segsluijden. Ende die pertijen beloefden dat indien gemacht van hem die vuytsprake vanden voorsz. zegsluijden niet en onder hilde, dat in dat geval die selve segsluijden alsulcke twintich philippus gulden als bijden onwilligen pertie in geleijt zijn zullen distribueren ende bekeren daer ende alsoe hemluijden duncken sullen dat die behoren te gaen zonder daer uijt of weder te geven den genen die hoer vuytsprake niet en onderhilde. Ende die voorsz. pertijen beloefden voort hem niet te doen relieven vander voorsz. peijne ende renunchierden van alle exceptien die hem daer inne te baten zoude mogen comen, hoemen die zoude mogen noemen. Alle dunck sonder arch ofte liste. Gedaen daer ic bij was (G.) Florijsz.

Regest 532 d.d. 26-02-1521.

Opten dach van huijden compareerde voordien Hove van Hollant Dirck van Waveren als procureur van Jacop Cornelisz., Ghijsbrecht Huijgensz. ende Jan Jansz. getijde meesters van st. Pieters kercke tot Leijden impetranten ende dede van monde van zijnen advocaet proponeren ende ...gen hoe dat de Zeven Getijden upten 24^e dach van julio anno 1500 ende vierthien geobtaineert hebben sekere sententie tot horen voordeele up ende tegens die weduwe van Jacop van Boschuijsen als boelhouster vanden voirsz. Jacop achtergelaten goeden, bij dewelcke zij gecompneert is die selve Getijden te leveren acht margin lants, bij hueren man den Zeven Getijden bijnnen zijnen leven vercoft oft de getijde meesters mit penningen daer van te vernougen tot buerschattinge. Ende hoewel Jan van Boschuijsen zijn zusters ende andere erfgenamen vanden voorsz. weduwe ende hueren man wel schuldich hadden geweest die Zeven Getijden acht mergen geleverd te hebben oft die slechte waerde daer van te betalen, desen nijet jegenstaende zijn des onwettich ende in gebrecke geweest tot des

impetranten grooten achter deele. Maer omme die selve impetranten vanden voorsz. hove clachtich gecomen zijn ende hebben vanden selven hove verworven openen brieve van m.....m vuyt crachte vanden welcken den voorsz. Jan van Boschuijsen ende jouffrou Lijsbeth van Bosschuijsen zijn zuster als erfgenamen vanden voorsz. Jacop geboden ende bevolen geweest dat zij achtervolgende die voorsz. sententie den impetranten leveren soudén onbelast die voorsz. acht margen lants den voorsz. Zeven Getijden toegewesen. Oft te betalen die gerechte waerde vandien tot goede mannen seggen. Ende overmits hueren oppo....., soe zijn zij voer dese hove verdachvaert geweest daer off den dach up huijden dienen is. Concluderende daeromme die voorsz. Dirck van Waveren inden name als boven dat bijden voorsz. hove (brieven?) van executorien gedeceoneert soudén worden upten voorsz. vonnisse. Makenden eisch van costen, schaden ende interesten bijden impetranten geleden ende die zij noch bij lijden sullen hangende desen processe bij gebreck vanden penningen inden selven vonnisse bij..... Oft tot an dezen alsulcken sijnen endesien als tvoorsz. hoff bevinden sal den voorsz. impetranten oirbairlijxste te wesen. Waer jegens Florijs van Boschuijsen als procureur vanden voorsz. Jan van Boschuijsen ende zijn zuster gedaichden, dede seggen alsoe die impetranten alsnu zijn in indicio dat zij hem te hoiren te houden voer verdachvaert inden sake van reformatie, etc.

.....
Inventaris 0502-304

Regest 425 d.d. 08-02-1500.

Wij Phillips Nachtegael ende Claes Hugensz. scepenen in Leijden oerconden dat voir ons quam Claes Jan Claes die Blinden zoen ende bekende dat hij in voireden jaren tiegens Huce van Zwieten die god genadich zij, gecoft gehadt heeft een huijs ende erve gelegen inden ambocht van Zoeterwoude ende is een wterdijck die belegen heeft an die een zijde die banvliet ende an die ander zijde Coppertgens weteringen streckende voir vanden Rijndijck tot inden Rijn. Up welck huijs ende erve voorsz. Huce van Zwieten behouden heeft drie wilhelmus scilden siairs mitten houde, een ende twintich placken voirden wilhelmus scilt gerekent. Ende soe den rentenbrief van den voorsz. drie wilhelmus scilden siairs mitten houde inden tijden als heer Reijner van Broechuijsen die stede van Leijden dieflick ingenomen hadde mit zijne adherenten rebelle ende andere ballingen ende quatwillende, die Huce van Zwietens huijsinge ende erve staende binnen Leijden mitten camerén daer in wesende, opsloegen, spolieerden ende beroifden, mits welcke dat vele ende diversche brieven Huce van Zwieten gespokeert ende ofhandich gemaict worden ende bijzonder den brieve vanden drie wilhelmus scilden siairs mitte houde. Ende wair Huce van Zwieten bij zijnen leven die voorsz. drie wilhelmus scilden siairs mitten houde in testamente geordonneert ende gemaict heeft an den Seven Getijden in sinte Pieterskerck om die jairlicx te ontfangen alst blijkt bijden brieven van testamente gemaict ende bezegelt mit den zegelen van Huce van Zwieten ende heer Aelbrecht van Bair commenduij van sinte Pieters kerck. Wesende vander date duysent vierhondert een ende tachtich upten sesten dach in Octobrij. Soe is dat Clais Jan Claes die Blinden zoen voorsz. voir hem ende zijnen erven bekent die voorsz. drie wilhelmus scilden siairs mitte houde jairlicx den Seven Getijden wt te reijcken ende betalen alle jair tot Voirschoten ende Valckenburger marctén. Ende heeft de renten voirsch. versekert ende bewijst te versien ende te verhalen upt voorsz. huijs ende erve mijtten wterdijck, gelegen ende belent als boven gescreven staet. In oirkonden desen brieve bezegelt mit onsen zegelen. Int jair ons heren duysent ende vijfhondert opten achtsten dach in februario.

.....
Inventaris 0502-306

Regest 431 d.d. 19-02-1501.

Wij Cornelis Jansz. ende Heijnrick Florijsz. scepenen in Leijden oerkonden dat voer ons quam Andries Florijsz. van Velde ende geliede dat hij vercoft heeft die zeven getijden meesteren van sinte Pieters kerck tot Leijden alse Aernt Heerman, meester Claes van der Geest doctor in medicinen ende meester Ewout Wel ende die geene diet namaels wesen zullen tot de voorsz. Zeven Getijden behoef, twee pont hollants comans pajments tsiaers ewige ende erflicke renten. Welck renten verschijnen alle jair op sinte Bonifae dach of binnen viertien dagen daer nae onbegrepen. Ende zijn staende up een zate lants toebehorende Diewer Sijmon Andriesz. wedewij, houdende vijf ende twintich morgen lants luttel min of meer, gelegen tSompick inden ambocht van Zoeterwoude. Ende heeft belegen an die oestzijde Machtelt Reijers wedewij, an die westzijde Huijch Jansz. ende Lijsbet Dirck Coenen dochter, streckende voer wt Zoetermerer meer tot an Meerburger weteringe. Ende Andries Florijsz. voorsz. ende Weijndelmoet Ewout Florijsz. wedewij mit hoere gecoerens voochts hant geloveden mit gesamender hant ende elcx voir al de zeven getijde meesteren voorn. ende diet namaels wesen zullen totten voorsz. Zeven Getijden behoeft dese voorsz. twee pont hollants comans pajments tsiaers, vrij te waren jair ende dach als recht is ende als men vrije renten op lant ende erve schuldich is te waren. Ende Andries voorsz. lovede Weijndelmoet voorn. hier of schadeloes te houden. Voirt soe beliede hem Andries Florijsz. voorsz. van desen coepe wel voldaan ende betaelt, den lesten penninc

mitten eersten. In oerkonden desen brief bezegelt mit onsen zegelen. Int jaer ons heren duijsent vijfhondert ende een upten negentienden dach in februario.

.....

Inventaris 0502-307

Regest 478 d.d. 20-01-1510.

Ick Ghijsbrecht van Zwieten ambochts heer ende scout inden ambocht van Zoeterwoude doe kondt allen luijden dat voir mi quam Vranc Meesz. ende gheliede dat hi in erfpacht an ghenomen heeft van Jan Jansz. anderhalff morghen lants bi den hoop sonder maet om seventien stuvers tsiairs, vrijs ghelts. Welc lant ghelegghen is inden ambocht van Zoeterwoude ende heeft belegghen an die oost side den Rijsacker, an die west side Mees Vranczensz., an dat noorteijnde Jacob Cornelisz. ende an dat suijt eijnde den Ommendijcx wateringhe. Welcke seventien stuvers tsiairs erfpacht verschinen sal alle jair tot Alre Heilighen daghe. Ende wairt dat Vranc Meesz. of sinen nacomelighen niet en betaelden alle jair op die tijt voirsz. of binnen viertien daghen dair nae onbegrepen, so mach Jan Jansz. of sinen erven dat verhalen an dat lant voirsz. of an alle Vranc Meesz. sijn ander goeden die hi nu heeft of hier na vercrighen mach. Alle dinc sonder arch of list. Hier bi hebben an ende over gheweest als tuijghen Pieter Pietersz. ende Dirc Jansz. Ende in kennisse der wairheit so heb ic Ghijsbrecht van Zwieten ambochts heer ende scout voirsz. minen zeghel hier an ghehanghen. Int jair ons heren duijsent vijfhondert ende tien opten twintichsten dach in februario.

Regest 500 d.d. 09-05-1516.

Ick Ghijsbrecht van Zwieten ambochts heer ende scout inden amboecht van Zoeterwoude doe kondt ende kenlick allen luijden dat voer mij quam Gheertruijdt Jans dochter mit hoeren rechten voecht als Eewout Jansz. hoer vaeders broeder ende gheliede dat sij mijt ghesamender hant vercoft hebben Jan Claesz. of den houder des brijefs seventhijen stuvers tsiaers eewighe ende erflike renten, nae wtwijsen den brief daer desen brief mede doer steken is. Ende van desen coepe belijede haer Gheertruijdt Jans dochter mit hoeren voecht voersz. wel voldae te wesen den laetsten pennijnck mitten eersten. Alle arch of list wt ghesondert. Ende in kennisse der waerheit so hebbe ick Ghijsbert van Zwieten ambochts heer ende scout inden amboecht voersz. desen brief bezeghelt mit mijn selfs zeghel hier onder an ghehangen. In teghenwoerdicheit der tuijgen als Gherijt Claesz. ende Willem Huijchensz. Int jaer ons heren dusernt vijf hondert ende seshijen den negenden dach in mejj.

Regest 540 d.d. 28-04-1524.

Ick Ghijsbrecht van Sweten ambocht heer ende scout inden ambocht van Soeterwou doen condt allen luden dat voer mijn ghecomen is Griete Jans dochter mijt Pieter Simonsz. hoer ghecoren vocht in dese saicke ende gaf over Jan Pietersz. of bringer des briefs twee scouten briefven daer desen brief doorsteken. Ende Jan Pietersz. daer mede te wijnnen ende te verliesen in alle scin oft griete Jan dochter self waer. Ende waert bij al soe dat erfbrief ijert belast waer boven het inhout van den priyncipal brijf dat gheloft Griete Jan dochter tot aller tijt up te leggen int te betalen als dat ghevoren sal. Ende wat Jan Pietersz. mijn geft van desen brief. Dan waer dach is gaf ick Griete Jansdr., Jan Pietersz. voer dat hij mijn man salijger gedachten ende mijn gheevent heeft want Jan Pietersz. ons Jan gegheevent heeft. In kannisse daer waerheit so heb ick Ghijsbrecht van Swieten ambocht heer ende scout inden ambocht van Soeterwoude voersz. dese brijef besegelt met mijnnen zegel hier an genagen in tegenwoerdichheit ter tugen ende..... van den ambacht voersz. Harmen Jacopsz. ende Frans Gorijzzen. Int jaer ons heren dusernt vijf hondert vier ende twijntic hupten 28^{sten} dach in april.

Regest 544 d.d. 29-06-1527.

Wij Frans Gerijt Doensz. ende Florijs van Adrichem scepenen in Leijden oirkonden dat voordien gerechte quam Jan Pietersz. ende gaff over Jan Jansz. van Middelburch drie schouten brieven van Zoeterwoude dair desen brief doirsteken is, mit recht ende mit vonnisse als recht is. Ende scepenen wijsden Jan Jansz. voirsz. dair mede te winnen ende te verliesen in allen schijn oft Jan Pietersz. zoen voirn. zelve waert. Ende waert zaicke dat die landen mit die renten dair up staende inden principalen brieven begrepen ijert becommert, belast of bezwaert waren boven tinhouden van den zelve principalen brieven dair dezen brijf doirsteken is, dat gelovede Jan Pietersz. voirsz. Jan Jansz. voern. tot alre tijt of te doen, up te rechten ende te beteren. In oirkonden dezen brief bezegelt mit onsen zegelen. Int jaer ons heeren duijsent vijfhondert zevenendetwintich upten negentienden dach in junio.

Regest 547 d.d. 03-02-1528.

Wij Claes Claesz. ende Frans Gerijt Doensz. scepenen in Leijden oirkonden dat voordien gerechte quam Jan Jans zoen van Middelburch ende gaff over die zeven getijde meesteren van sinte Pieters kercke binnen Leijden als Willem Aelbrechts zoen, Dirck Adriaensz., meester Phillips van Henegouwen ende Gerijt Heerman, drie schouten brieven van Zoeterwoude mit een transfix dair up doirsteken dair desen brief doirsteken is, mit recht ende mit vonnisse als recht is. Ende scepenen wijsden die zeven getijde meesteren voirsz. ende diet naemaels wesen zullen totten voirsz. Zeven

Getijden behoef dair mede te winnen ende te verliesen in allen schijn ofte Jan Jansz. voirn. zelve waer. Ende waert zake dat die landen mit die renten dair up staende inden principalen brieven begrepen ijēt becommert, belast of bezwaert waren boven thinhouden vanden zelve principalen brieven dair desen brief doirsteken is, dat gelovede Jan Jansz. voirsz. den zeven getijde meesteren voirn. ende diet naemaels wesen zullen tot des voirsz. Zeven Getijden behoef tot alre tijt of te doen, up te rechten ende te beteren. In oirkonden desen brief besegelt mit onsen segelen. Int jaer ons heren duijssent vijfhondert acht ende twintich upten derden dach in februario.

Inventaris 0502-308

Regest 482 d.d. 25-10-1511.

Ick Ghijsbrecht van Zwieten ambochts heer ende scout inden ambocht van Zoeterwoude doen kondt allen luijden dat voir mij quam Gerrijt Willem Woutersz. ende geliede ende bekende dat hij in rechten poortrecht ende tot een ewige erffpacht angenomen ende verpacht heeft vanden Seven Getijde meesteren van sinte Pieters kerck binnen Leijden, als meester Ewout Wel, Pieter Gerrijtsz. Goel ende Florijs Jacobsz., acht morgen lants bij den hoop sonder maet, gelegen inden ambocht van Zoeterwoude inden ban van Stompick, toebehorende die Seven Getijde voirsz. Ende heeft belegen an die noirtzijde die Vliet, an die oestzijde tconvent tot Reijnsburch, an die zuijtzijde Meerburger weteringe, an die westzijde die kerck tot Voirschoten ende tconvent tot Reijnsburch voirsz. Des jaers om elff pont thien scellinge hollants comans pajment, vrijs gelts van allen ongelden ende sel dat eerste jaer renten verschijnen ende dach vander betalinge wesen tot Voorschoten ende Valkenburger marcten. In die twalef nachten wel betaelt als men scrijft duijssent vijffhondert ende elff ende so voirt van jare te jare dese voirsz. erffpacht jairlix te betalen tot Voirschoten ende Valkenburger marcten in die twalef nachten wel betaelt, duerende tot ewigen dagen. Des zijn voirwaerden dat Gerrijt voirsz. zijnen erven ende nacomelingen dese voirsz. landen niet verdelven noch wtgraven en sal maer altijt verbeteren ende niet verarghen. Te versien ende te verhalen, eerst an dese voirsz. acht morgen lants of dat dair op bevonden wert. Ende wairt sulcx dat dese voirsz. acht morgen lants niet goet genoeg en waren dese voirsz. elff pont thien scelling hollants jairlix an te verhalen, so sellen die Seven Getijde meesteren voirsz. ende diet namaels wesen sullen, dat voirt versien ende verhalen an Gerrijt voirsz. huijsinge ende erve mitter schuijer, barge ende boemte dair op staende, gelegen inden ambochte van Voirschoten dair Gerrijt voirsz. nu ter tijt in woent. Ende heeft belegen an die oestzijde die pastoirs laen van Voirschoten, an die zuijtzijde die voirsz. pastoirs woninghe, an die westzijde Herper Pietersz., an die noirtzijde die wech. Ende zijn voirwaerden tot welcker tijt dat derdalff morgen of die morgen lants van dat voirsz. lant toegemaect is, so sel Gerrijt voirsz. huijsinge ende erve mitten scuijer, barg ende boemte vrij ende ontlast wesen vander onderpant dairmen die voirsz. erffpacht an verhalen mocht. Ende Gerrijt Willem Woutersz. gelooft voor him ende zijnen erven of nacomelingen hier niet jegens te doen noch doen doen enich weer van rechte, tzij geestelijck ofte waerlijck noch mit ghenen nuwen vonden diemen hier op soude mogen peijnsen, dencken, vinden of verweren. Alle argelist wtgesondert. In kennisse der wairheijt so hebbe ick Ghijsbrecht van Zwieten ambochts heer ende scout inden ambacht voirsz. desen brief bezegelt mit mijn zelfs zegel ende hier onder an gehangen. Dair bij an ende over waren als tugen Pieter Pietersz. ende Cornelis Woutersz. Int jaer ons heren duijssent vijffhondert ende elff upten vijff ende twintichsten dach in Octobrij.

Inventaris 0502-309

Regest 495 d.d. 15-02-1515.

Niet aanwezig regesten 520, 573, 584 en 591.

Ick Gijsbrecht van Zwieten ambocht heer ende schoudt inden ambocht van Sueterwoude doen kondt allen luijden dat voor mijn quam Bos Cornelisz. ende bekende dat hij gehuijert heeft tegen die seven getijde meesters van sinte Pieters kerck in Leijden als Jan van Honthorst, Frans Gijsbert Mourijnsz. ende Volpert Roelofsz. een voor lants van vijftals margen bijden hoop sonder maet, gelegen inden ambocht van Sueterwoude inden ban van Stompick. Ende heeft nu ter tijt belegen an die zwijtwest sijde Hubrecht Henricxz., an die noert sijde Huge Gerijtsz., streckende van die Goewech tot an Stompicker wech toe. Thien jaer lanc duerende ende after een volgende, daer teerste jaer huer of ingaet sinte Pieter in die vasten anno 1500 ende 15 om thien pont pajments tsiaers, te betalen alle jaer binnen die twalef nachten of vierthien dagen daer an onbegrepen. In sulker manieren ende voirwairden als hier na bescreven staet. Inden eersten sient voirwairden dat Bos Cornelisz. die afterste twee morgen toe maken moet binnen die eerste drie jaeren ende hij en moet dit lant oeck niet broken noch oock niet vervreemden in geenene maniere. Ende Bos voorsz. sel doen al dat een guet out huijzman sculdich is te doen ende sel dit lant buijten scade houden ende alle ongelden ende costen selver betaelen die daer binnen den thien jaeren op comen moegen, vuytgeseijt nijeuwe cueren die dair bij den hiemraet op gecoort moegen worden, dat sel die eijgen selver betaelen ende indien Bos dit lant te vollen toe

maeckt als voorsz. is ende altijd wel betaelt, zoe en selment hem niet op steken noch verhoegen om dat hij die twee morgen toe gemaect sel hebben. Ende voort indien Bos voorsz. in enich van desen punte niet te vollen en hilt ende en volde als voorsz. staet soe altijd die huijr of doet ende te niet wesen ende van geender waerde. Ende waert saek dat Bos Cornelisz. alle jaers niet en betaelde als voorsz. staet, soe heeft hij voor ons overgegeven dat houder van desen brieve dan sal moegen comen tot Sueterwoude ende tijsschen dese voorsz. thien pont vanden scout. Ende men sal Bos voorsz. dan ontbieden ende ist dat hij dan comt ende leijt dese penningen op, soe en sal hij geen scade lijden ende hij dat niet en dede, soe sal die scout dan dese voorsz. 10 pont up leggen den houders brieffs ende salse weder inhalen als tseren penningen an dubbelt gelt oft vierscat an pande an boetes voorsz. sijn gereeste goeden daer die scout zijn hant up leijt. Hier hebben bij geweest als buijerluijden ende tuijgen Eeuwout Jansz. scout van Sueterwoude ende Huijch Gerijtsz. In kennisse der waerheijt zoe heb ic Gijsbrecht van Zwieten ambocht heer ende scout inden ambochte voorsz. mijn zegele in presencie van die voorsz. buijrluijden ende tuijgen hier angehangen. Int jaer ons heren duijssent vijfhondert ende vijftien opten vijftiensten dach in Februario.

Inventaris 0502-310
Regest 577 d.d. 20-05-1545.

Copie.

Ick Jan Dircxz. Vaender schout van Soeterwoude doe condt allen luijden dat voor mij ende die buijren hier naegescreven gecomen sijn Mees Joris zoen woonende t'Zoeterwoude voorsz. ende Claes Jans zoen wielmaker woonende binnen Leijden. Ende Mees Joris zoen voorsz. bekende mitsdesen vercoft te hebben ende doechdelijcken schuldich te wesen die seven getijden meesteren van ste. Pieters kercke binnen Leijden als meester Frans Adriaensz., Dirck van der Does, Henrick de Wilde Cornelisz. ende Cornelis Adriaensz. ende diet namaels wesen sullen, tot der selver Getijde behouff, negen gouden inckele carolus gulden van gewichte off pajmente dier waerde, erfelijcke renten t'sjaers die Mees Jorisz. voorsz. voer hem sijnen erven ende nacomelingen den voorsz. getijde meesteren of actie van hoer vercrijgende, belooffde wel ende doechdelicken te betaelen ende vrij van allen costen ende commer in handen vande getijde meesteren ofte hoere rentmeester, te leveren ende oock bij sijnen erven ende nacomelinge te sullen doen betaelen alle ende telcken jare opten 20^e dach in meije ende binnen de meij maent onbegrepen, wel betaelt te wesen. Daer van deerste voorsz. renten vallen ende verschijnen sullen opten 20^e dach in Meije anno 1546 eerstcomende ende soo voort van jare tot jaere eeuwelijcken geduijrende. Ende bekende hem daer off doechdelijcken voldaan ende wel betaelt te wesen, den laetsten penninck mitten eersten. Ende omme dese renten wel te verseeckeren ende betaelen, soe was Mees Joris zoen voorn. daer onder ende ter cause voorsz. specialijcken verbindende, veronderpandende ende ijpotiëerende drije morgen lants bijden hoop sonder maet, gelegen inden ambachte van Zoeterwoude voorsz. Ende heeft belegen ande suijtsijde Mees Jorisz. voorn. selver, ande noortsijde Cornelis Woutersz., ant westende Zoeterwouder santwech ende ant oostende Corstant Dircxz., met alle datmen opte voorsz. landen bevinden sal. Noch sijn ende sijnder erven ende nacomers persoenen ende alle andere ende haerluijder goeden, roerende ende onroerende die sij ende elck bijsonder mitter tijt hebben ende namaels noch vercrijgen moegen, omme bij gebrecke der voorsz. betaelinghe ten dage ende inder manieren voorsz. daer an of aen elcken persoene ofte perceele van goeden zoe wel generalicke als specialijcken verbanden dese voorsz. verschenen renten mit alle costen, oock vanden vermaninge ofte sumatie, executie executoir ende anders te moegen versien, verhaelen ende doen executeren als willecoer gelt bij willecoer recht, off als sheeren penningen bij heerlijcke ende reale executie van allen hoven, plecken ende rechteren, soe dat den houder van desen believe sal. Sonder eenige exceptie, pantkeringe of weer van rechten daer tegen te moegen doen, in eeniger manieren. Ende Claes Jansz. mede comparant voorsz. heeft hem selven ende alle sijne goeden ter cause voorsz. als caucie ende waerborge gestelt ende belooft bij gebrecke der voorsz. jaerlijcxe betalinge als selff principael daer vooren in te staen ende te betaelen off doen betaelen ten daghe ende inder manieren voorsz., al opgelijck verbant ende executie alsvoeren. Des sijnt voorwaerden datmen dese voorsz. renten tot allen tijden sal mogen off lossen ende quijten met hondert vier ende veertich der voorsz. gouden carolus gulden van gewichte tot vierentachtich int marck, in hoeftgelde, off ander goet ende gefalueert pajment van goudt ofte van silver nae die evaluatie der k. mat. lestmael gepubliceert dier waerde ende mitten verschenen onbetaelde renten, oock nae tverloop vander tijt verschenen wesende als die lossinge geschiet. Alle dinck sonder arch off list desen toirconden soo hebbe ick Jan Dircxz. Vaender als schout van Soeterwoude voorsz. desen brief door beede ende verlijden vande voorsz. comparanten besegelt mit mijn zegele uijthangende hier beneden aen desen brief gehangen. In presentie ende bijwesen van Cors Claes zoen ende Gherijt Jans zoen als buijrluijden inden voorsz. ambachte ende getuijgen hier

overgeroepen ende geboden. Int jair ons heeren duijsent vijff hondert vijff ende veertich opten 20^e dach in meije.

Ter secretarije der stadt Leijden gecopieert naer de principale, sijnde van date ende geteijckent alsboven ende is dese naer gedane collatie voor soo veel tgeëxtraheerde aengaet daer mede accorderende bevonden. Actum den 3^e maert vanden jaere 1600 tweeensetich.

Bij mij G. v. Hoogheveen.

Bekenne ick ondergescreven rentemeester vanden Memorie ende Getijden, den principalen brieff waer van copie hier boven staet, gelicht te hebben om aen mij d'hooftsomme vanden afgelost te werden. Belovende daer van te verantwoorden naer behoren. Actum den 4^e maert 1600 twee en setich.

Was getekend: R. Groenendijck.

Hier na is volgt nog een exacte copie opgenomen.

.....

Inventaris 0502-311

Regest 579 d.d. 15-05-1546.

Copie.

Ick Jan Dircxz. Vaender schoudt inden ambachte van Zoeterwoude die condit ende kenlic allen luijden dat voor mij ende getuijgen hier onder gescreven gecomen ende gecompareert is selver persoonlicken Cornelis Willem Lambrechts zoon ende bekende mitsdezen vercoft te hebben ende deuchdelicken schuldich te wezen de zeven getijde meesters van sinte Pieters kercke binnen Leijden als Jan Frans zoon, Philips van Noorde, Dirck Willems zoon ende Cornelis Adriaens zoon tot behouff vande Zeven Getijden voorn. die somme van acht gouden carolus gulden van vierentachtich int marc off pajiment dijer waerde tsiaers ewighe ende erfflicke renten die Cornelis Willems zoon voorn. beloefde voor hem sijnen erven ende nacomelingen den getijde meesteren inder tijt wesende ofte actie van desen vercrijgende wel ende doechdelicken te betaelen ende vrij van allen costen ende commer te leveren ende te brengen binnen Leijden in handen vanden getijde meesteren van den Zeven Getijden voorn. Ende bij zijnen naecomers te sullen doen betaelen ende leveren alle ende telcken jaere opten twintichsten dach van meije, daer van deerste voorsz. renten vallen ende verschijnen sullen opten twintichsten dach in meije anno 1500 zeven ende veertich nu eerstcomende ende alzo voort van jaere tot jaere daeran volgende te betaelen elcke jaer renten, geduerende alzo langhe ende ter tijt toe dat dese voorscreven renten afgecoft ende gelost zullen wezen. Twelc Cornelis Willemsz. voorn. ende sijnen erven ende naecomelinghen altijt zullen moghen doen teffens ende tot eenen maele mit hondert acht ende twintich gelijcke gouden carolus guldens voorsz. in hooftgelde ofte mit andere guede ende gefalueerde penninghen van goudt ofte van zilver, nae de evaluatie der k. mat. lestmael gepubliceert mitten verschenen ende onbetaelde renten die naeden beloop des tijt verschenen zullen wezen als die lossinghe geschiet. Des sal Cornelis Willems zoon voorn. ofte zijnen erven ende naecomelingen gehouden wezen den getijde meesteren vande Zeven Getijden voorn. inder tijt wesende, een halff jaer te vooren te waerschuwen als men dese renten zal begheeren te lossen. Ende Cornelis Willemsz. voorn. bekende hem ter cause voorseijt vanden voorsz. getijde meesteren al wel ende doechdelicken voldaan ende betaelt te wezen, den laetsten penninc mitten eersten. Ende omme deze voorsz. renten alle jaers ten dage als vooren wel te betalen ende wel te verzeckeren, zoe heeft Cornelis Willems zoon voorn. hier onder ende ter cause voorseijt specialicken mits dezen verbonden, veronderpandt ende geijpotequeert als speciael ijpoteec, vier morgen lants bijden hoop sonder maet, legghende inden ambachte van Zoeterwoude voorsz. Ende heeft belegen ande oestzijde de erfgenamen van men heer van Warmond, ant zijtende Meerburger weteringe, ant noorteijnde Adriaen Henricx zoon ende ande westzijde Cornelis voorsz. zelve. Ende voort generalicken ende specialicken sijn persoon ende ooc zijnder erven ende nacomers personen ende alle andere hoerluijden gueden, roerende ende ontroerende die zij nu ter tijt hebben ofte hier naemaels vercrijgen mogen, geen gueden ofte plaetssen uijtgesondert ofte bujten gehouden. Omme bij ghebreecke der jaerlix betaelinghe vande renten voorsz. ande hooftsomme van dien mitte costen ende schaeden daeromme ghedaen ende geleden daeraen (mit alle datmen dair op bevinden zal) te moghen versien ende verhaelen als sheeren penningen ofte als erfpenningen ofte willecoer gelt, bij heerlicke ende reale executie van allen hoven, plecken ende rechteren zoe dat den houder van dezen gelieven zal. Sonder eenighe exceptie, pantkeringhe, cessen ofte weer van rechten daer tegens te mogen doen of te doen doen in eenigher manieren ter contrarien. Alle arch ofte bedroch bujten gesloten. Desen toerconde zoe hebbe ick Jan Dircxz. Vaender als schout van Zoeterwoude voorscreven desen brieff doer beede ende verlijden van Cornelis Willems zoon voorsz. bezegelt mit mijnen zegele vuythangende hier onder aen desen brieff gehangen. In presentie ende bijwezen van Gerijt Pietersz. ende Jan Henricxz. buijerluijden inden ambachte voorsz. als getuijgen hier over

geroepen ende gebeden. Int jaer ons heeren duijsent vijfhondert zessendeveertich opten vijftienden dach in meije. Ende was gezegelt mit een groen zegelken uijthangende aen dobbel franchijnen staert. Voor copije uijtgegeven vande originalen brieff bezegelt als boven, daer mede dese naer collatie bevonden es taccorderen.

Bij mij J. van Hout.

Den originalen brieff van dese jegenwoordige auctentijcke copije es gelicht bijden rentmeester Treslong die daer aff verantwoorden zal in zijne reeckeninge ende es dese in plaetsse vande voorsz. originale opgeregen aende coppel vande Zeven Getijden, geteeckent C ende a tergo no. 147. Actum den 17^e januarij 1586 stilo novo.

Was getekend: L. van Treslong.

Vande hoofdsomme der voorgaende rente heeft den rentmeester Treslong ontfang gemaect in zijne reeckening vande jaere '86 folio 64 verso ter somme toe van £ 82-10-00.

Was getekend: onleesbaar.

.....

Inventaris 0502-312
Regest 587 d.d. 05-11-1549.

Ick Adriaen Vranckensz. schout inden ambochte van Zoeterwoude doe condit allen luiden dat voor mij ende den getuijgen hier naer bescreven gecompareert is Jan Aelwijn Claesz. buijerman in Leijderdorp ende bekende voor hem zijnen erven ende naecomelingen vande zeven getijde meesteren in sinte Pieters kercke binnen Leijden, als Dirck Willemsz., Adriaen IJsbrants zoen, Huijch Willemsz. ende Jan van Brouhoven bij consente ende believen van die vande gerechte der zelve stede angenommen te hebben ende aanneemt mits dezen in eenen ewigen erfhuijer, vijf margen lands bij den hoop sonder maet gelegen inden ambochte van Zoeterwoude voorsz. omtrent den huijse van Zwieten buijtsdijcx. Ende hebben belegen aen die noortzijde den Rijn, aen toesteijnde Bruijn Vrancken zoen cum socijs, aende zuijtzijde den Rijndijck ende aen twesteijnde de Regulieren tot Leijderdorp. Den hoop tsiaers omme vijf ende twintich karolus guldens van twintich stuvers tstuck, vrij gelts. Verschijnende alle jaers Voerschoeten ende Valckenburger marcten. Ende den dach van betalinge zal wesen inde twaleff nachten van Kersmisse, daer af teerste jaere erfhuijer verschijnen zal Voerschoeten ende Valckenburger marcten anno 1500 vijftich naestcomende. Des zijn condicie ende voorwaerden dat die voorsz. Jan Aelwijnsz. zijnen erven ende naecomelingen deze voorsz. vijf morgen lands altijts verbeteren ende toemaecten zullen tot slands oerbaer ende niet verargeren. Ende oft gebeurde dat die voorsz. Jan Aelwijnsz. zijnen erven ende naecomelingen dit voorn. landt vercoften of vervreemden, zoe zullen sijluiden gehouden wesen tzelve anden getijde meesteren inder tijt wezende tot der voorsz. Getijden behouf te versoucken met een halve huijere. Des en zal die voorsz. Jan Aelwijnsz. ofte zijnen erven ende naecomelingen tvoorn. landt niet moegen splitsen noch smaeldeelen, maer tzelve laten blijven in zijne grote ende geheel als dat nu ter tijt leggende es. Voirt zijnt voerwaerden dat Jan Aelwijnsz. voorsz. ofte zijnen erven ende naecomelingen dit voorn. landt zullen moegen sloeten tot slants oerbaer ende profijt. Ende omme deze erfpachte te verzekeren soe heeft die voorsz. Jan Aelwijnsz. hier voeren ten onderpande gestelt die voorsz. vijf margen erfpacht lands ende voerts generalick alle zijne ende zijnder erven goeden ende renten, roerende ende onroerende die zijluiden nu hebben ofte naemaels vercrijgen moegen, waer ende waer an die gelegen zijn gheen daer aff vuytgesondert, omme bij faulte der jaerlicxe betaelinghe tzelve daer an te moegen verhaelen op heerlicke ende reale executie vanden Hove van Hollandt ende van allen anderen hoven, wetten ende gerechten, alle tot believen vande getijde meesteren inder tijt wezende. Renuchiërende ende te buijten gaende hier op de voorsz. Jan Aelwijnsz. alle exceptien, beneficien van rechten, gratien, preveligien ende voorts alle andere loose subtile vonden, lijsten ende practijcken diemen ter contrarie zoude moegen bedencken ofte vinden in eniger manieren, wel verstaende indien de voorsz. getijde meesteren ofte andere inder tijt wezende op hoere tijde nijet betaelt en worden vande voorsz. erfpachte, te weeten een half jaer naden dach der verschijninge, oeck ingevale tvoorn. landt bij vercopinge of vervreemdinge nijet versocht en worde gelijk voorsz. staet ende mede indien tzelfde landt gesplit ofte gesmaeldeelt worde contrarie voeren verhaelt staet, dat alsdan bij faulte van eenige der zelve conditiën die voorsz. erfpachte verbuert zal wesen zoe verde die voorn. getijde meesteren tzelfde belieft ende anders niet. Alle dinck zonder bedroch. Ende van deze erfhuijere zijn gemaict twee brieven dair of dat hebben die voorsz. getijde meesteren tot des zelfs getijden behouff den eenen, ende Jan Aelwijnsz. voorn. den anderen. Des torkonde soe hebbe ick Adriaen Vranckensz. scout voorsz. in presentie van Joest Woutersz. ende Willem Adriaens zoen als getuijgen ende buijrluiden inden ambochte voorseijt dezen brief besegelt mit mijnen zegele hier an gehangen. Int jaer ons heeren duijsent vijfhondert negen ende veertich upten vijften dach in Novembrij.